



6

20-d




255
Biblioteca
majori Coll. Rom.
Societ. Jesu

~~20 cat~~

20.6.1.
20
2





Bibl: LAVRENTII *Jac*
LE BRVN
NANNETENSIS

coll: E SOCIET. IESV *Pom*
ECCLESIASTES
Joc SALOMONIS *Joh*
Paraphrasi poëtica explicatus.

EDITIO VLTIMA.

Bibl:
Lev:
Luc:




Coll: Jac:
Jac:



PARISIIS,
Apud SEBASTIANVM CRAMOISY,
Regis & Reginae Architypographum:
Et GABRIELEM CRAMOISY, viâ Iaco-
bæ sub Ciconiis.

M. DC. LIII.
CVM PRIVILEGIO REGIS.








ILLVSTRISSIMO
AC LAUDATISSIMO VIRO
PETRO SEGVIERO
GALLIARVM
CANCELLARIO.



 *D quem de cunctis orbis partibus populi confluebant, (VIR ILLVSTRIS- SIME) nunc ipse ad te properat Salomon recentibus sapientia tua miraculis excitus: immo & eius sapientia prasidium ambit tua, qua regno nuperis in conuentibus prasidio fuit. Quod si audet coram te concionari, pie cuidam ambitioni tribuendum est, qua eruditissimarum aurium iudicium quarit, cupitque te auditore vno maximè gloriari, in quo collectos omnium saeculorum attentosque sapientes habet. Ne-*

EPISTOLA.

*que hîc pœtîcè loquar, si affirmaverò man-
cam esse veluti Salomonis sapientiam, nisi
sigillum apposueris, absolutamque tuo iudi-
cio reddideris. Sed dum de utriusque sapien-
tia sermo mihi est, vix insipientia notam
effugio; si enim hanc opellam fœtûmque li-
terarium tibi vouero; non deerunt, qui te-
meritatem accusent meam prudentiamque
desiderent, quòd te in gravissimis regni
negotîis gerendis occupatissimum interpel-
lem; at contra quæ erit mihi ratio iusta de-
fensionis, si sapientissimum aui superioris,
sapientissimo nostra ætatis omittam conse-
crare? Accipe igitur hunc libellum (Re-
diuiue Salomon) si arriserit, satis gran-
dem & amplum; sin minùs, placendi vo-
luntate, & nisu saltem laudabilem, quem
offert multis tum religiose, tum priuata fa-
milie nominibus*

AMPLIT. T.

Addictissimus
LAVRENTIUS LE BRUN
è Societ. IESV.

ECCLESIASTES
SIVE
SALOMON
CONCIONATOR.



ECCLESIASTES

QVI AB HEBRÆIS

C O H E L E T H

appellatur.

CAPVT PRIMVM.

Argumentum.

Ostendit sapiens humanum studium, quod rebus sublunaribus vel comparandis, vel cognoscendis impenditur, vanum esse, ex quo scilicet minimum fructus, molestiæ plurimum percipiatur.

1. *Verba Ecclesiasta filij David, Regis Ierusalem.*

2. *Vanitas vanitatum, dixit Ecclesiastes: vanitas vanitatum, & omnia vanitas.*

Arab. Interpr. *uniuersitas rerum vana.*



ECCELESIASTES

SIVE

SALOMONIS

DE RERVM HVMANARVM

VANITATE ET CONTEMPTV,

CONCIO

Paraphrasi poëtica explicata.



CAPVT PRIMVM.

1. **Q**VAE Salomon Dauide satus, rectôrque
Sionis

Proximus à primo, diuinâ oracula mente
Fuderit, huc dictis aures aduerte, docebo.

2. Omnia mentitis illudunt vana figuris,
(Ingeminat sapiens) nihil est, nisi futilis vmbra
Quidquid grande sonat, vultûque tumescit inani:
Non ea sunt tanti, mendaci splendida fuco
Perstringunt hebetes oculos, & imagine pulcrâ
Sensibus imponunt, solo pretiosa colore.



3. *Quid habet amplius homo de uniuerso labore suo , quo laborat sub sole ?*

4. *Generatio praterit , & generatio aduenit , terra autem in aeternum stat.*

Arab. Interpr. *Generatio discedit , & generatio venit , & terra in aeternum est.*

5. *Oritur sol , & occidit , & ad locum suum reuertitur : ibique renascens ,*

3. Quis tibi tum fructus, cum mille per obuia vitæ
Tædia, per casus, variæque pericula fortis,
Anxius ingratos in luctibus egeris annos?

Quippe laboris erit tanti, labor, vnica merces.

4. Mortibus alternis soboles humana perennat;
Atque per æternos ortus, æternæque passim
Funera statq; caditq;, nec vnquã intercidit orbis;
Fit natus patri, matri fit nata superstes,

Ille perit nascente alio, gnatûsque parentes
Excipit, huic proles succedit, & ista vicissim
Casuram sobolem reparanda in damna propagat:
Sic atavis, proauisq; superuenisse parentes
Aspicias, his natos esse, & sperare nepotum
Agmina, sicque aliam ex aliâ succrescere gentem;
Vsq; adeo humanæ nil stat durabile sorti,
Sed cedit, atque sua sobolescit clade propago.

Sustinet hanc scenam tellus stabilita polari
Axe super, quanquam & similis iam iamq; ruenti,
Pendulæque expectat casum, radicibus hæret
Ipsa suis, atque indefesso vertice montes
Inconcussa gerit, fundatæque mole suâ stat
Haud virtutis egens alienæ, haud indiga fulcri;
Ast oneris super ipsa sui libramine nitens,
Ardua ponderibus superaddita pondera ridet,
Et stans perpetui sternit fundamina motûs.

5. Sol contrâ in gyros agitur, dum terra quiescit,
Et inodò nocturnis purum caput erigit vndis,
Mox idem occiduum pronus descendit in æquor;
Tum redit ad primos sua per vestigia calles,
Séque remetitur, reuoluto ex orbe renascens:
Hinc Austrum petit, inde Arcton; sic flexibus errâs
Oppositis, varium trahit in discrimina tempus;
Annorum sic longa facit, sic parua dierum

6. *Gyrat per meridiem, & flectitur ad Aquilonem: lustrans uniuersa in circuitu pergit spiritus, & in circulos suos reuertitur.*

Syriac. Interpr. Et oritur sol, & occidit sol, & ad locum, quo oritur ipse reuertitur, ut inde etiam oriatur, & circumiens circuit, & alit spiritus, & ad circulos suos reuertitur spiritus.

7. *Omnia flumina intrant in mare, & mare non redundat: ad locum unde exeunt flumina, reuertuntur, ut iterum fluant.*

Shirm. Omnia flumina vadunt ad mare, & mare illud non est impletum, ad locum quo flumina exeunt, illuc illa reuertuntur ut egrediantur.

8. *Cuncta res difficiles, non potest eas homo explicare sermone. Non saturatur oculus visu, nec auris auditu impletur.*

Olympiad. Laborat oratio atque hebescit in exacta certaque rerum notione nuncianda: hanc enim nullus erit qui possit aequè scrutari.

Gloss. Tota rerum natura maxime vana.

Chald. Neque potest oculus videre omnia, ne-

Curricula, & radiis lucem dispensat iniquis.

6. Iam vario venti ludunt per inania cursu

Et mox opposito repetunt sua tecta recursum

Parendi dociles: iam fulmine cuncta videbis

Fervere, & irato sylvas aquilone moueri,

Montibus audiri, ponto increbrescere murmur;

Mox contrà posito mitescere flamina fastu

Senferis, & fractas in claustra redire procellas.

7. Sed quid ego non digna loquor vertigine tanta?

In mare tot passim decliui vomice currunt,

Et Nereo pendunt æterna tributa parenti

Vndique flumina vasta, disique exercita longo

Impete, perpetuâ nec aquarum exuberat æquor

Alluie exundans, nec iniquâ mole tumescit

Tot circumfusus hinc inde accessibus auctum:

Non rapido euincit disrumpa repagula fluctu,

Immensumve furens vndante supernatat aluco

Altius, aut tumido circumfremit impete cautes

Durius incurians, nec fundamenta procellis

Atterit, aut ripæ victrix insultat adersæ;

Obice sed tenui iacet inuiolatus arenâ

Terminus, vnde redit fluctus, suâq; ipse resorbet

Per vestigia sese, & mole repressus amicâ

Littori inoffenso tantum oscula mollia figit.

8. Hactenus humanis quæcunque obtutibus astât;

Nunc animos intra, & penitus scrutare; quietum

Repperies nihil, & nullo sudore paratum.

Quo res fonte fluant, vel quo se sine resoluant,

Est penetrare labor; neque quis, si proderententes

Voce, recensendis modus est, cum copia sese

Fundat inexhausta, & cunctis sermonibus impar,

Nâ nec habent numerû, nec rerû pondera nomen.

Aspice quâ cælumq; patet, tellusq;, profundumq;

que potest auris impleri auditu verborum omnium habitatorum terra.

9. *Quid est quod fuit? ipsum, quod futurum est. Quid est, quod factum est? ipsum, quod faciendum est.*

10. *Nihil sub sole novum. Nec valet quisquam dicere: ecce hoc recens est: iam enim praeceffit in saeculis, quae fuerunt ante nos.*

Chald. Cost. *Detur enim res de qua facile quisquam pradicet: vide novum inuentum est: videntur tamen veterum memoria id aliquando contigit.*

11. *Non est priorum memoria, sed nec eorum quidem, quae postea futura sunt, erit recordatio, apud eos, qui futuri sunt in novissimo.*

Et totus spatio immenso diffunditur orbis,
Fontesque, & fluuios, terræ iuga, & infima terræ,
Arboreumque genus; tū quidquid reptile arenam
Ventre terit, liquidumve citis secatur aëra pennis,
Tot vultus vsque absimiles, tot regna, tot vrbes,
Sparsaque diuerso populorum examina tractu,
Tot variis genera inter se distantia formis;
Ausculata tacitus quod murrat amicus amico,
Clamque auidam tectus interiore susurrat in aurē
Et ferē inauditus: vel quod contrā intonat altum
Voce theatri, & disrupto guttore præco;
Non oculum visu hoc satias, non vocibus aurem:
Sæuit inexpletum rabies, gliscitque medendo
Acrius in venas, exardescitque fruendo:
Semper anhelantes sinuoso fornice conchas
Auris habet, noua semper amat spectacula visus.
9. Quæ sunt facta, & quæ facimus, faciēda recurrēt:
Quæ vidēre patres, eadem ventura videbit
Posteritas: & iam, quidquid fuit antē, videre est.
10. Nil oritur sub sole nouum, nec sæpe recurans
Phœbus præteriti testis, testisque futuri,
Orbe pererrato noua iam spectacula cernit:
Quæ capiunt auditu aures, quæ lumina visu,
Omnia sunt primis auditæque, visæque sæclis:
An scire est animus, quam rerū posthumā messem
Sæcla dabunt, quam lapsa retro iam protulit ætas?
11. Gesta patrum ignorat, facit ignoranda futuris
Cæcus homo, æternas nāq; intercepta sub umbras
Fama subit mutū indecori cum mole sepulchrum;
Et nimis ante loquax, subito post fata tacere
Edidicit, legesque sacras seruare silentium:
Quære opibus laudes, & inanis nomina famæ;
Inmemor hæc condet sub inertī nocte vetustas:

Nyssen. *Quemadmodum rerum priorum obliuio inualuit ac viguit in iis, quæ ab unoquoque sunt facta, ita quæ modo sunt, poſteri obliuioni mandabunt.*

12. Ego Eccleſiaſtes fui Rex Iſraël in Ieruſalem: & propoſui in animo meo quæ-
rere, & inueſtigare ſapienter de omnibus,
quæ ſunt ſub ſole.

13. Hanc occupationem peſſimam Deus
dedit filiis hominum, ut occuparentur in ea.

Septuag. *Quoniam diſtentionem malam dedit Deus filiis hominum ut diſtendantur in ea.*

Chald. Coſt. *Anmaduertique facinoroſa illa hominum opera, malum quiddam hominibus à Deo datum, ut in eo ſeipſos conficerent.*

14. Vidi cuncta quæ ſunt ſub ſole; &
ecce vniuerſa vanitas, & afflictio ſpiritus.

Interpr. Venet. *Omnia ſunt vanitas, & irritamentum ſpiritus. Defatigatio ſpiritus. Aqua vapor, paſſio venti.*

Syria. *Sollicitudo ſpiritus.* Arab. *anguiſtia ſpi-
ritus.*

15. Peruerſi difficile corriguntur, & ſtultorum infinitus eſt numerus.

Inferre corticibus titulos, vt in arbore viuant
 Accrescântque simul, duris incide metallis
 Marmoribûsque; metet plantas inimica securis
 Artificum, vel lentâ pigro, falx temporis, ictu;
 Mors veniet saxis, monumenta exesa fatiscunt.

12. Sûmus ego Solymæ Princeps, atq; Isacidû Rex.

Obtutu tacito mecum vndique circumspexi,
 Quod sensu solo, aut vna lustrabile mente est;

13. Sic placitû est superis, ista dum mole grauamur,
 Quisque habet immensi fastidia ferre laboris,
 Nec potis est vnquam extremo discrimine fungi.

Quo ruit implexus studiis certantibus orbis,
 Infidûsque sibi, & vota in contraria pugnax?

Quid vigiles curæ, defudatîque labores?

Scilicet impellunt saxum reuolubile nisu
 Sisyphio, & summis fugientia flumina labris
 Prensent frustrati, delusâque vota fatigant:
 Omnibus hunc toto Deus arbiter orbe laborem
 Imperat, aut æquâ vel iniquâ mente ferendum.

14. Quâ tellus porrecta patet, quâ liquitur aër
 Fusus in immensum, quâ latè extenditur æquor,

Aspexi, solémque oculis, ac mente secutus
 Lustraui quæcumque videt; sed cuncta tuenti
 Visa molesta mihi, grauiora & pondere terræ,
 Mobiliora salo, leuiora fugacibus euris.

Aspice quicquid inest circûque infrâque, supràq;
 Nil nisi spectra vides, quæ ludificantia mentes
 Obtusas hominum, dulci perstringere norunt.

Illicio, fictâque boni fulgere sub vmbra;
 Omnia sunt vani mendacia splendida fuci.

15. Quæ distorta semel nodo riguère tenaci,
 Luctatus contrâ nequicquam inflectere tentes;
 Sic rectâ semel abreptus regione viarum,

Interpret. Venet. *Quod incurvatum est, non potest rectari. Curvitas non potest dirigi.*

16. *Locutus sum in corde meo dicens; ecce magnus effectus sum; & precessi omnes sapientiâ, qui fuerunt ante me in Ierusalem; & mens mea contemplata est multa sapienter & didici.*

17. *Dedique cor meum ut scirem prudentiam atque doctrinam errorisque, & stultitiam, & cognoui quod in his quoque esset labor, & afflictio spiritus.*

Venet. ex Hebr. *Cognoui hoc etiam esse passionem spiritus, irritamentum spiritus, cognitionem vesania, stoliditatis, vanitatis.*

Vix redit, & gressum in vestigia prima retorquet:
 Stultorum numerū innumerum quicūq; negabit,
 Stultorum augebit numerum stultissimus ipse.

16. Sic tacitus: quis me regum felicior alter?

Quin animus sophiæ cupidus, tellure relictâ
 Exuere infernæ cœpit contagia labis,
 Calcatas per opes, & per fastidia terræ
 Sidera rimari, patriisque assurgere regnis:
 Dūmque polum subij, titulos exosus inanes,
 Emeritæ virtutis opes, humilisque triumphos
 Antetuli regnis, didici mage flore caduco
 Deciduam pœmpam; regnum mutabile sortis.
 Incertæ spoliū; vitam ceu fluminis vndas,
 Aut volucres euros, ceu denique missile telum
 Effluere, & lapsis discedere promptius umbris:
 Cuncta rapi foliorum instar, vanescere cuncta.

17. Quidquid & humanæ solers industria mentis
 Audet, & assequitur; sum solus adeptus, & ausus;
 Dum visu per cuncta feror, nil suggerit orbis
 Vndique non vanum: rosei vanissima vultus
 Purpura, quam canis infuscat decolor ætas;
 Quidquid & è spoliis superest, hoc esca secundis
 Hostibus in tunulo cedit: vanissima fama est,
 Quæ busto caput exertat, sed labilis æui
 Mox restat spoliū: vana est Cytherea, per ipsos
 Si fatum ruat amplexus, & tæda iugalis
 Acceleret mortis tenebras: est vana iuuentus,
 Atque ætatis honos, si dulcibus Atropos annis
 Infert se mediam: cupidi vanissima Ditis
 Munera, si naulum nequeunt exanguibus umbris
 Soluere: vanus honos regni, si fata ligones
 Exæquant sceptris: vana est doctrina, diurnum
 Quam studium, & vigili, curæ, de nocte laborant,

18. *Eo quòd in multa sapientia, multa sit indignatio: & qui addit scientiam, addit & dolorem.*

Arab. *Qui augetur doctrinâ, augetur dolore.*

CAPVT SECVNDVM.

Argumentum.

Exponit vanitatem, atque inconstantiam humanæ mentis, necnon leuitatem immoderatæ concupiscentiæ, quæ sapientiæ studio propter difficultatem dimisso, auidissimè se transtulerit ad corporis voluptates consecretandas; ac rursus frustra redierit ad sapientiam cum voluptatibus conciliandam: atque vtroque tandem illo fastidito, vanissimè se tradiderit sollicitudini colligendarum opum, non tam sibi, quàm suis, quos nescit, hæredibus profuturarum.

1. *Dixi ego in corde meo: vadam, & affluam deliciis, & fruam bonis, & vidi quòd hoc quoque esset vanitas.*

2. *Risum reputavi errorem; & gaudio dixi: quid frustra deciperis?*

Venet. *Risui assuetum vocavi amentem.*

3. *Cogitavi in corde meo abstrahere à vino carnem meam, ut animum meum trans-*

18. Doctrinâ sed enim crescente , molestia crescit
 Et velut ad radios fumosæ est nata lucernæ ,
 Sic sapit auctorem vigilata scientia fumum.

CAPVT SECVNDVM.

1. **S**ic igitur mecum tacitus: iuuat ire per omnes
 Delicias, curâsq; omnes immergere baccho;
 Mensa coronetur dapibus, quas pontus, & aër,
 Quas melior dat terra sinu, luxûsque superbâ
 Ambitione tumens, elementa per omnia quærit.
 Huc ades, ô domitrix curæque famîsque voluptas,
 Funde merum pateris; aliò deferre dolorem,
 Et luctum, & gemitus, & singultantia verba
 Ventorum officiosa cohors; per inane faceffat,
 Si qua meis posthac se cura penatibus infert:
 Ast vbi discussus sopor, & mens reddita luci est;
 Hæc mecum: ô fallax Siren! ô lena voluptas,
 Quæ blando arguræ caprum modulamine vocis
 Cæcos in scopulos, & proxima funera ducis:
 Hîc vbi festa strepunt, geniôque curique litatur,
 Nobiscum paribus cyathis mors ebria ludit:
 Scilicet has inter pateras, libatâque mensæ
 Fercula, de tenui filo tibi pendulus astat,
 Et capitis lambit fastigia desuper ensis:
 2. Turpiter informi qui risum effusus hiatur
 Præcipitat, nimio distendit & ilia motu,
 Insanum hunc dixi: & vultu dum gaudia prodit,
 Sic ego, quid vecors felici sorte triumphas
 Stultius, elatâque tumens ceruice superbis?
 ; Protinus hæc animo: pudet heu quod sola fruēde
 Cura fuit lucis, pronique in fercula ventris.

ferrem ad sapientiam, deuitarémque stultitiam: donec viderem, quid esset utile filiis hominum, quo facto opus est sub sole numero dierum vite sua.

Chald. Cost. Animum autem conuertere ut ducem sapientiam sequeretur. Catena Græcor. Cogitavi quâ ratione rerum intelligibilium studium superius, carnis sensum intelligibili anima parti obedire cogat, quasi tracto, & cedente deteriore præstantiori.

4. Magnificavi opera mea, edificavi mihi domos, & plantavi vineas.

5. Feci hortos, & pomaria, & conserui ea cuncti generis arboribus.

Syriac. Feci mihi hortos, & paradisos, & plantavi in illis omnes arbores omnium fructuum.

6. Et extruxi mihi piscinas aquarum, ut irrigarem siluam lignorum germinantium.

Tum subito auersatus opes, & commoda vitæ,
 Sublimem erexi propria ad penetralia mentem,
 Rimantem diuina, absentem & pectore toto,
 (Corpore nam quanto tardanti longius illa
 Exierit, tanto volat altius ardua, terras
 Supra omnes, victrix & sensus sub iuga mittit,))
 Ut semota cibus, cælo & vicina capeffens,
 Séque supra assurgens, & inani parte relictâ
 Corporis, exciperet purgata per organa lumen,
 Et supra populorum vndas, & inertia vota,
 Disceret ire viam ignotam mortalibus ægris,
 Inspectura, omni si quid sit amabile vitâ:
 Exemplis, non iudiciis humana reguntur
 Consilia; & numerus, non pondus queritur; at quò
 Vulgus iners ruit in præceps, huc vota feruntur.

4. Regifico struxi non vna palatia luxu

Marmore conspicienda, & barbarico elephanto:
 Exundans iuxta turgentibus vua racemis
 Purpurat, & largo pubescit vinea fructu.

5. Nec fuit arborei foetus studiosior alter,
 Namque subest multæ cultissimus arboris hortus,
 Vix & opes fert planta suas, sed pondere multo
 Indigâque auxiliij terræ incuruata recumbit:

Nec minus & multum cælo nemus arbore densâ
 Surgit, vbi spirant argutæ in frondibus auræ:
 Sunt loca congressu celebrata, acceptâque fessis,
 Seu iuga, seu ripæ virides, muscosâque saxa:

6. Non longè irriguis piscinas nutrit ab vndis
 Riuus, & umbriferas vaga per sinuamina currens
 Irrorat plantas, præterque innoxia rura
 Labitur, erranti similis, florésque comantes
 Parturit, aut genitis foecundum sufficit imbrem,
 Et modò melle agros, modò pingit florib. hortos,



7. Possedi seruos, & ancillas, multamque familiam habui: armenta quoque, & magnos ouium greges, ultra omnes, qui fuerunt ante me in Hierusalem.

8. Coaceruaui mihi argentum, & aurum, & substantias regum, ac prouinciarum: feci mihi cantores, & cantatrices, & delicias filiorum hominum, scyphos, & urceos in ministerio ad uina fundenda.

9. Et supergressus sum opibus omnes, qui ante me fuerunt in Hierusalem: sapientia quoque perseuerauit mecum.

10. Et omnia, qua desiderauerunt oculi mei, non negaui eis: nec prohibui cor meum, quin omni voluptate frueretur, & oblectaret se in his, qua preparaueram: & hanc ratus sum partem meam: si uterer labore meo.
[11. Cumque me conuertissem ad uniuersa opera, qua fecerant manus meae, & ad la-

Dum lenes prouoluit agens anfractibus vndas :
 Sic gemina hortorū pariter nemorūq; voluptas
 His passim nutritur aquis. 7. Fremit aula ministris,
 Vernarūque cohors volat obsequiosa iubentis
 Ad domini nutus ; quid dicam armenta boare ,
 Et balare greges numero pretiōque carentes ?
 Nam quis diuitiis regem præuerrere tentet ?
 8. Sed dites inter procures ditissimus ipse
 Confideo, sceptris speculatus cuncta iacere
 Inferiora meis, solitā nec sorte vetusti
 Contentus decoris, nulli superanda nepotum,
 Nulli æquata patrum, laudem ad fastigia, supra
 Omne tuli votum : graue pondus diuitis auri
 Obscurat veteres, obscurabitque futuros,
 Quos verax vel fama tulit, vel fabula finger
 Insignes opibus : mihi vectigalia pendunt
 Vicini : lætis aures concentibus implent
 Cantores, queis cantatrices adde puellas,
 Incantatrices hominum : non aurea desunt
 Pocula, nec quidquid conquirat vbique locorum
 Prodigia luxuries, & amans splendescere fastus.
 9. His me, præ reliquis Solymæ rectoribus, auctū
 Vna gubernatrix, vitæque magistra gerendæ
 Vsq; affixa comes lateri sapientia duxit.
 10. Nil votis renuo, seu quod sit amabile cordi,
 Seu cupido quodcumque placet spectabile visu :
 Mens fruitur, quodcumq; rogat, licet vna rogandi
 Mensura est, votis quidquid feruentibus ingens
 Extremūq; venit ; nil iam superesse quod optet,
 Conqueritur cumulata : & quò sese ipsa fatigans
 It magis, augetur magis, exuperatque voluptas :
 11. His tamē ad cumulū, & votū super omne posito
 Vita labor visa est, crux sceptrum, laurea pondus.

bores, in quibus frustra sudaueram, vidi in omnibus vanitatem, & afflictionem animi, & nihil permanere sub sole.

Syriac. Ecce enim omnis res est vanitas, & perurbatio spiritus, & non est lucrum sub sole.

12. Transiui ad contemplandam sapientiam, errorésque, & stultitiam (quid est, inquam, homo, ut sequi possit regem factorem suum?)

Hicronym. Quis est hominum qui possit ire post regem autefactorem suum?

13. Et vidi quòd tantum prederet sapientia stultitiam, quantum differt lux à tenebris.

14. Sapientis oculi in capite eius: stultus in tenebris ambulat: & didici, quòd vnus vtrisque esset interitus.

Hxc

Hæc vulgus miretur iners, cuique aris habendi
 Dira sitis crassâ oblimat præcordia tabe;
 Fascinat argenti fallax nitor, & nitor auri.
 Cui venâ saliente sitim sub valle recurvâ
 Sistere, frondentiq; datum est dormire sub vlmô;
 Felix, ô nimium felix, non toxica gemmis
 Excipit, aut pleno mortem miser ebibit auro.

Quoquò oculos verto, quoquò vestigia flecto,
 Stultitiâ pars nulla vacat, locus exhibet omnis
 Pro rebus simulacra, leues pro fructibus umbras;
 Queis nimium addictus segni torpore fatiscit
 Spiritus, occultas quia non cœlestia vires
 Pabula sufficiunt, languôrque inuadit inertem:
 12. Proinde vigil cuncta explorâs, mētisq; pererrâs
 Luminibus tacitis, requiescere pectore sensus
 Incipio, & propriâ mentem statione locare
 Se supra fortisq; vices, vbi tota penetrat
 Se totam, ingens ingentem, & defixa recedit
 In sese, fœcundum exercens pectore numen,
 Orbe procul nostro, mûdi præuecta quod usquæ est:
 Dúmque hoc hospitio potitur, seque ipsa fatigat
 Acrius, & vires intra se colligit omnes,
 Solerti studio vigilique expendere curâ
 Et volui & cœpi, valeat sapientia quantum
 Rebus in humanis, quantum dementia possit:
 (Nam nec ego æquandus, nedum superabilis vlli
 Consilio, Isacidum princeps, quo nulla priorem
 Sæcula, nulla dabunt animo & virtute secundum)
 13. His ita collatis tantum sapientia præstat
 Stultitiæ, quantum superat lux aurea noctem:
 14. Nâ sapiens, tanquã excubiis speculator ab altis
 Erectus mentem, summaque in sede locatis
 Luminibus, velut arce super; latè omnia visu

15. Et dixi in corde meo, si unus & stulti & meus occasus erit, quid mihi prodest quod maiorem sapientia dedi operam? locutusque cum mente mea, animaduerti, quod hoc quoque esset vanitas.

16. Non enim erit memoria sapientis similiter ut stulti in perpetuum: & futura tempora oblivione cuncta pariter operient, moritur doctus similiter ut indoctus.

17. Et idcirco tadeit me vita mea videntem mala uniuersa esse sub sole, & cuncta vanitatem, & afflictionem spiritus.

18. Rursus detestatus sum omnem industriam meam, qua sub sole studiosissime laboravi habiturus heredem post me.

19. Quem ignoro utrum sapiens, an stultus futurus sit, & dominabitur in laboribus meis, quibus defudavi, & sollicitus fui: & est quidquam tam vanum?

20. Vnde cessavi, renunciauique cor meum ultra laborare sub sole.

21. Nam cum alius laboret in sapientia, & doctrina, & sollicitudine, homini otioso quasita dimittit, & hoc ergo vanitas, & magnum malum.

22. Quid enim proderit homini de uniuerso labore suo, & afflictione spiritus, qua sub sole cruciatus est?

23. Cuncti dies eius doloribus, & arumnis pleni sunt: nec per noctem mente requiescit. Et hoc nomen vanitas est?

Circumſpectat agēs, animūque per omnia voluit;
 Stultus inerte gradu per compita deuius errat.
 Nec tamen uſque ſuis fidat ſapientia rebus,
 Prudentem ſtultūque eadem fortuna ſequetur,
 Lex ſimilis necis, ut vitæ communis origo;
 15. Vnde alto mecum tacitus ſub pectore dixi;
 Si ſtultus prudēſque pari conduntur in vīnā,
 Diſſimiles vitā, ſi fato æquantur eodem,
 O vanum, Pimplæa, decus! quid tempora cingit
 Phœbeus decor, & bene deſudata lucernā
 Pallenti laurus, ſi meta nouiſſima cunctos
 Sōrſque manet ſimilis, potare obliuia lethæ?
 16. Geſtarum fugitiua dies obliuia rerum
 Inducit, nequeunt magni cultīve labores
 Ingenij, doctum communi à lege ſepulchri
 Soluere, & æternæ ſpirantem oſtendere famæ.
 17. Hinc oneroſa grauis ſurgunt mihi tædia vitæ
 Spectanti, quàm ſæua viros fortuna fatiget,
 Et quibus ærumnis, quot tempeſtatibus acti
 Præcipites diram in mortem, & ſuprema feramur
 Exitia, oppreſſi, nec opis nullius egentes.
 18. Dāno operam, dubius quis ſumat inēpta laborū
 19. Præmia, num compos animi, nū mētis egenus:
 20. Quo quid inane magis? iā cum ſudore perēni
 21. Veſtigēs altè, & magno rimeris amore
 Palladias artes; tanto ſudore paratas
 Hæredi deceptus opes tranſmittis inertī,
 Quas ſtertens gratis recipit molimine nullo.
 22. Poſt matutinos veſpertinōſque dolores
 23. Quiſ tibi tum fructus? duro ſol igne labores
 Accendit, velut imbre pluit nox anxia curis,
 Non ſine nube dies, neque nox ſine turbine trāſit,
 Quis neget hoc vanum, magnūq; in rebus inane?

24. Nónne melius est comedere, & bibere, & ostendere anima sua bona de laboribus suis? & hoc de manu Dei est.

25. Quis ita deuorabit, & deliciis affluet, ut ego?

26. Homini bono in conspectu suo dedit Deus sapientiam, & scientiam, & latitiam: peccatori autem dedit afflictionem, & curam superfluum, ut addat, & congreget, & tradat ei, qui placuit Deo: sed & hoc vanitas est, & cassa sollicitudo mentis.

CAPVT TERTIVM.

Argumentum.

Ex vicissitudine, & mutatione rerum omnium sublunarium cum tempore fluentium, & suas etiã cum tempore habentium durationis periodos, colligit cupiditatem humani cordis, atq; humanę sollicitudinis vicissitudinem, varietatē, inconstantiam, statum, intereundi terminum; ex stabilitate verò diuinorum operum, & diuinę prouidentię cursu cognito hortatur ad tranquillam vitam, & multiplices curas tã preposterar, quã preproperas & immaturas abiiciendas, prout tempus tulerit.

1. Omnia tempus habent, & suis spatiis trans-eunt uniuersa sub cælo.

2. Tempus nascendi, & tempus moriendi: tempus plantandi, & tempus euellendi quod plantatū est.

3. Tempus occidendi, & tempus sanandi. Tempus destruendi, & tempus adificandi.

4. Tempus flendi, & tempus ridendi. Tempus plangendi, & tempus saltandi.

24. Temnere amat benè cautus opes mage quisque,
que, potiri

Quam studeat: quantum ipsa finit natura, diurno
Pane famem, vinóque sicim compescere præstat.
Grande Dei donum est, & nulli æquāda voluptas,
Delicias inter placidæ transmittere vitæ

Quodcumq; est super, & pungentes fallere curas.

25. Libarunt alij, plenis quas sensibus hausi

Delicias, quis enim vixit me lautius alter,
Séque voluptatum maiori gurgite merfit?

26. Hostiles vitare manus, aperire sagaci
Corde dolos, iustis Deus, & sua signa secutis

Munificus præbet; sed luctifico comitatu

Exercet sceleratum, & edacibus aspera curis

Pectora, vt assidui sibi nutrimenta doloris

Diuitias cogat, quas mox sibi vindicet alter,

(Vt visum est superis) verus non occupet hæres;

Hoc quoq; grande malū, & stolidæ vesania mētis.

CAPVT TERTIVM.

1. OMNIA secū affert, secū aufert omnia tēpus:

Alternas Cytherea vices, Libitināq; seruāt:

2. Cuique suæ data meta viæ; primordia vitæ

Parca trahit, rumpit signato tempore fila;

Ordo suus stat cuique? suóque arbusta seruntur

Tempore, & ex patriâ radicibus eruta sede

In melius virgulta, solum geniūque mouentur.

3. Tēpus habet medicina suum, sua tēpora vulnus.

Nunc terræ, nunc cœlo æquare palatia tempus.

4. Est cūm flere iuuat, fletūque expellere risū,

Et variare vices; oculos iam lachryma foedat,

5. *Tempus spargendi lapides , & tempus colligendi : tempus amplexandi , & tempus longè fieri ab amplexibus.*

• •

6. *Tempus acquirendi , & tempus perdendi : tempus custodiendi , & tempus abiciendi.*

7. *Tempus scindendi , & tempus consuendi. Tempus tacendi , & tempus loquendi.*

8. *Tempus dilectionis , & tempus odij. Tempus belli , & tempus pacis.*

9. *Quid habet amplius homo de labore suo ?*

10. *Vidi afflictionem , quam dedit Deus filiis hominum , ut distendantur in eâ.*

11. *Cuncta fecit bona in tempore suo , & mundum tradidit disputationi eorum , ut non inueniat homo opus , quod operatus est Deus ab initio usque ad finem.*

Shiruuod. *Omne fecit pulchrum pro tempore suo , & quidem saculum dedit in corde eorum : propter quod non induet homo opus.*

Moxque serenati vultus, & amica reductis
Gratia deliciis planctu fugiente resurgit.

5. Marmoreæ disiecta domus iâ culmina princeps
Ima sede ruit, fundamentumque reuellit;

Iamque superbificam, damnatâ clade, ruinam
Ruderibus decorat lectis, atque arcibus arcēs,
Marmora marmoribus superex truit, ædibus edes:
Cogere iam tempus lapides, iam spargere tēpus.

Tempus in amplexum ruere accedentis amici;
Tempus ab amplexu procul esse abeuntis amici:

6. Quærere tempus opes, quæsitâs perdere tempus.
Seruare est tempus, partas effundere tempus.

7. Texere iam tempus, iam texta retexere tempus:
Audire est tempus, tempusque audita referre.

8. Dulcis amor, crudele odium sua tēpora norunt,
Et sua habet Maors, & habet sua tēpora Pallas.

9. Quando ergo æterno voluuntur cuncta rotati,
Quæ merces sudoris erit? 10. mortalibus ægris

Quippe molam Deus æterno dedit orbe mouendâ.
Quisque suas patimur pœnas, ut iniqua tulit fors.

11. Nec nulla interea est gestarum gloria rerum:
Nil operante Deo factum malè; quæque suo res

Tempore gesta fuit; cœli conuexa supernè
Machina, subter humus statione resedit in imâ,

Tempore quæque suo; tenebris lux clara fugatis
Emicuit, tellusque, salo cedente, reiecta est,

Ordine quippe suo noctes partita diēsque
Astra gradu certo currunt; elementa diremptis

Litibus inter se, præscripto ex fœdere viuunt:
Sed quo gesta modo, vel quâ ratione gerentur,

Quæ faciendâ manent, mentem hæc caligo futuri
Occupat, & dubio pendent examine lances.

Hoc homines studium ductuque & luce carentes

12. Et cognoui, quòd non esset melius nisi latari, & facere bene in vita sua.

13. Omnis enim homo, qui comedit, & bibit, & videt bonum de labore suo, hoc donum est Dei.

14. Didici quòd omnia opera, quæ fecit Deus, perseverent in perpetuum: non possumus eis quicquam addere, nec auferre, quæ fecit Deus ut timeatur.

15. Quod factum est, ipsum permanet: quæ futura sunt, iam fuerunt: & Deus instaurat, quod abiit.

16. Vidi sub sole in loco iudicij impietatem, & in loco iustitie iniquitatem.

Præcipitat, cùmque à veri vel tramite paulùm
 Deflexere, diu longis ambagibus errant.
 Est homini nescire pudor, causâsque latentes
 Rimatur, stimulatque animos sitis vna sciendi.
 Vnum hoc humanas vocat in certamina mentes
 Dissidium, curis acuens mortalia corda.
 Desinat humanæ quisquam considerare sorti,
 12. Nil didici melius, quàm gaudia mente potiri,
 Atque aliis potienda dare, & certare priorem
 Officiis; 13. Grâde hoc cōcessũ à numine donũ est,
 Si quis edat, laurũsque bibat, vitâque beatus,
 Quantũ aduersa sinunt, tranquilla per oria ducat
 Terrore haud vllò, haud vllò intercepta dolore.
 14. Ast didici, quæcumque facit diuina potestas,
 Supra stare vices, sortem & mutabilis æui,
 Humanum vt supra captũq; modũq; geritur,
 Nullâque diuinis speranda obliuia factis;
 Grande nefas his quicquam auferre, his addere
 quicquam :
 Ordinât ista Deus, quò maiestate verendus
 Deprimat audaces animos, acieque retusâ
 Attonitum incutiat tremefacta in corda pauorem;
 15. Quæ sunt gesta prius, rursus facienda redibunt
 Singula; fit, quod iam factum est; & calle remens
 Omnia sol spectans spectabilis omnibus idein
 Nil videt, in primis quod non conspexerit annis :
 Ille peragrato sua per vestigia cœlo
 Sæcla redorditur, spatióque recurrit eodem.
 Nulla noua est, fuit antè dies, quæcũq; futura est.
 16. Grande malum; viget impietas pietate iacente,
 Et violata dolus Themidis prætoria scandit :
 Exulat ille animus solers lustrare recessus
 Implicitæ litis, momentâque pendere rerum.

17. Et dixi in corde meo iustum, & impium indicabit Deus, & tempus omnis rei tunc erit.

18. Dixi in corde meo de filiis hominum, ut probaret eos Deus, & ostenderet similes esse bestiis.

19. Idcirco vnus interitus est hominis & iumentorum, & aqua vtriusque conditio: sicut moritur homo, sic & illa moriuntur: similiter spirant omnia, & nihil habet homo iumento amplius: cuncta subiacent vanitati.

20. Et omnia pergunt ad vnum locum; de terra facta sunt, & in terram pariter reuertentur.

Nequicquam læsi, malefani iudicis vnam
 Implorant inopes; potior qui munere, iure
 Is potior vincit, causas & dona perorant;
 Gratia ius omne est, iustos in iniqua retrudit
 Vincula, dum merito fontes è carcere soluit.

17. Protinus hæc mecum: idem oculus spectator
 ab astris,

Idem aderit vindex: iustosque reosque tribunal
 Ante suum sistet, trutinâ bonus exiget æquâ
 Seu bene, siue secus facias: si tempora novit
 Quodcumque est, sua dicundû ius tēpora poscit:
 At veniet funesta dies, cū Phœbus opacâ
 Nube caput condet, concussio & cardine mundi
 Mugiet horrendum latè fragor; ira supremi
 Iudicis expendet iusto libramine crimen.

18. Addebam quoque: dissimulat delicta nocentū
 Quæsitior rigidus, sed fraus & aperta patebunt
 Facta: manus vindex mox improbitate resectâ,
 Non dominos orbis regnatoresque superbos,
 Non capita imperiosa, feris distare probabit.

19. Sub leges Libitina suas iumenta virosque
 Vna vocat; prudens si iusto examine penles,
 Nulla virum inuenies discrimina, nulla ferarum;
 Est homini pecorique eadem lex dicta sepulchri:
 Usque adeò simili cernuntur quæque ruinâ
 Ferri, & eò, fuerant prius vnde auulsa, reuerti;
 Nam semper cadit atque suâ stat morte propago.
 20. Vndiq; volue oculos circūq; infrâque, supràq;
 Quidquid luna suo mutabilis orbe coërcet,
 Corruit in sese, & per mutua vulnera semper
 Dat vel habet casus, alióque renascitur ortu.

Sic perit atque vices variat, dubioque tumultu
 Fluctuat incertum, nec habet sors vlla quietem.

21. *Quis nouit si spiritus filiorum Adam ascendat sursum : & si spiritus iumentorum descendat deorsum ?*

Chald. Cost. *Quis quæso tantum sapientia excellit , ut ei exploratum esse possit , num animi hominum in cœlum peruolent , spiritus verò brutorum animantium defixus humi iaceat ?*

Chald. Complet. *Quis sciat si spiritus omnis filiorum hominis ascendit supra firmamentum , & spiritus omnis iumenti descendat sub terram ?*

21. At quota pars quæq; ex illis, qui turgida fastu
 Corda gerunt, collóque iugū obluſtante recuſant
 Parere indociles, & iter commune relinquunt
 Doctrinâ elati, quota pars agnouit in aſtra
 Humanas animas, ſolóque authore creatas
 Numine, deſiſſo tardanti corpore, ſurſum
 Tendere inextinctas, quas mox compage ſolutas
 Excipiunt loca pura, & formoſiſſimus æther:
 At pecudum contrà, euaneſcere in ima, caducas
 Extenuatæ animæ partes? hi mentis egentes
 Et pecorum ritu, nil maſſam præter, humóque
 Concretam molem, quæ morte occūbit, & annis
 Cæripitur, humanum ducunt: bruto æqua, viróq;
 Fata manere; eadẽ lucis data iura fruendæ:
 Sunt curuæ in terris animæ, & ſublimium inanes,
 Quæis, hominum, forma vna poteſt defendere
 nomen.

Proh cæcas cordis tenebras! furor impius egit
 Mortales, animis compage carentibus omni,
 Ortis patre Deo, brutorum affingere tardam
 Pigritiem: pars ſi hæc ingens, quã viuimus vnâ,
 Corporea cum mole perit, iacet ilicet omnis
 Victa fides, cœlóque olim promiſſa voluptas:
 Intuitor, victrix vt molis, obambulat aſtra
 Terram extra corpúſque, ſuiſque enititur alis;
 Illa notos ſuperat, longéque in ſæcula vibrat
 Ardentes tranſuecta oculos, venturæque luſtrat;
 Illa ſolo & membris terrenâ mole grauatis
 Altior, infernæ fugiens contagia labis
 Extra ſe rapitur, mirúmque volubilis orbem
 Affiduè rotat, & gyrum metatur eundem:
 Vna hæc corporcas peſtes, turbâſque cientem
 Immanem ratione animum, ditione coërcet:

21. *Et deprehendi nihil esse melius, quàm latari hominem in opere suo, & hanc esse partem illius. Quis enim eum adducet, ut post se futura cognoscat?*

Et tamen hanc (ne falsa adeò consueſce doceri)
Dixeris exſcindi! flammâ licèt & licèt ictu
Incoctum chalybem duraueris, illa ſecūrim
Tundentiſque manum violari neſcia rider:
Scilicet obſcena hæc tellus, & mobilis aër,
Et flammæ leuitas, & aquarum debilis humor
Materiam vt lethi moribūda in corpora verſant,
Sic quoque cognatam, necis in conſortia, mentem
Coniciant? quaſi multiplici mens parte cohærens
Deficiat ſenſim, timeátque caduca ruinam?
Maxima pars noſtri æterna eſt, neq; cernitur vlli!
22. Haud cœli exiguum donum eſt, deſeſſa paratiſ
Membra leuare bonis, & amicâ pſcere mentem
Lætiâ, neque te quidquam præſtare beatum
Poſſe putem, niſi lætus edaſ partiſque fruariſ,
Præſentiſque ſtudent venturum tempus omittas.
Hæc mentem vna iuuat merces in corpore cluſam,
Ignauoſque habitantem artus, & membra tra-
hentem:
Ex rigido neque enim tellus adaperſa reſeſſu
Excitoſ reuomet ſupera ad conuexa ſilenteſ,
Vt videant, quæ ſuncta ſemel poſt fata gerantur.



CAPVT QVARTVM.

Argumentum.

Pergit in demonstranda rerum humanarum vanitate, & afflictione spiritus: ostendens multa esse præsertim in illa honorum cupiditate, & primatus occupandi ambitione, quæ tranquillitatem impediunt, & vitam perturbent; videlicet calumnias egenorum, tyrannidem potentiorum, aliorum inuidiam, infidam amicitiam, maiorum insolentiam; & id genus alia; quibus medetur diuinæ prouidentiae timor & cultus, fufis interim piis, & supplicibus ad Deum precibus.

1. *Verti me ad alia, & vidi calumnias; quæ sub sole geruntur: & lacrymas innocentium, & neminem consolatorem: nec posse resistere eorum violentia cunctorum auxilio destitutos.*

Chald. Complet. Conuersus sum ego, & vidi omnes violentias, quæ factæ sunt iustis, qui angustati sunt in hoc saculo sub sole de manu tribulantium eos: & non est qui loquatur eis consolationes, neque qui redimat eos de manu illorum, qui vim eis faciunt in fortitudine manus.

2. *Et laudaui magis mortuos quàm viuentes.*

3. *Et feliciorem utroque iudicaui, qui necdum natus est, nec vidit mala quæ sub sole sunt.*

4. *Rursum contēplatus sum omnes labores hominum, & industrias animaduerti patere inuidia proximi: & in hoc ergo vanitas, & cura superflua est.*

CAPVT QVARTVM.

1. **H**INC mentē auersus, quantū vexetur iniquo
Sub capite, iniusto quātū sub prae fide iust⁹,
Aspexi, & gemui; & sortem nil tale merentis
Indolui: vnus enim gemitus solamen egenis.
Iamque adeo fractis, & rerum mole grauatis
Nil prae ter cœli conspectum & vota relictum est.
Quippe gemit virtus, iustūque licentia contra
Insurgit, durāque deest in sorte leuamen:
Ast animi pendet, qua se ratione, quibūse
Protegat auxiliis, qua sistat & arte ruentis
Fortunæ casum, propiorāque fata moretur.
2. Sors potior visā illorum, qui fine dolores
Præuertunt subito; quibus & properata ruit mors,
Nec libare finit, nisi primos luminis vsus;
Quā quibus opportuna quies, & mortis adēpta est
Conditio, longorum & meta negata laborum.
3. Tantum illos terris ostendunt fata, neque vltra
Esse sinunt, properātque citā accelerata quietem,
Surgentein & primo vitam cum lumine claudunt;
Ast hi seruitio dirāque tyrannide rerum,
Fatalem ducunt aduersa per omnia vitam,
Et moribundi animam soluendā mole coërcent.
Quid iuuat in tantos vitam exoptare labores?
Vel qua spe illectus procedere longius optes
Vitæ huius spatium nullo impellente ruentis?
4. Liuorem & rixas disseminat æmulus ardor
Æquales inter, simili quos arte labores
Perpetui exercent; comitem comes inuidus odit.
Vt socius rebus socij pinguescit adesis,

5. Stultus complicat manus suas, & comedit carnes suas dicens.

Chald. Cost. Stultus estate manibus blanditur suis, & velati eas oculis complectitur, nequa se labori vult addicere, ex quo efficitur, ut hyeme sua omnia concoquat.

6. Melior est pugillus cum requie, quam plena utraque manus cum labore, & afflictione animi.

7. Considerans reperi & aliam vanitatem sub sole.

8. Vnus est, & secundum non habet, non filium, non fratrem, & tamen laborare non cessat, nec satiantur oculi eius diuitiis, nec recogitat dicens: cui laboro, & fraudo animam meam bonis? in hoc quoque vanitas est, & afflictio pessima.

Chald. Compl. Est vir solus & non est ei secundus: filium quoque & fratrem non habet, ut sit haeres substantia sua, & non est finis vniuerso labori suo, oculus quoque eius non potest satiari diuitiis: & non dicit in corde suo, cui ego laboro, & fraudo animam meam bonis?

Sic lucro socij, socius macrescit, adaucto.

At quid inane magis quàm rebus flere secundis,
Exultare malis, vitâ & proscribere risum,
Oppressi nisi quem comitis fecere dolores?

5. Inde fit, vt studiis piger in contraria versis
Degeneret, parcusque operæ fugiensque laboris
Pectore languenti, & contractis segniter vlnis,
Enerues torpere manus, residensque lacertos
Deficere, & sese permittere malit inertii
Desidiæ, donec rerum penuria pigrum

Abrumpat somnum, atque oculis furiosus apertis
Carne sua ventrem pascit conuiuia cibusque,
Et consanguineo tumulet sua membra sepulchro.
Nec sua desidiæ velamina pulchra tegendæ

Defuerint: 6. sæpe est audire, vel vna quiete
Plena manus præstat; quàm bina referta labore
Quæ geminet curas, & amatæ incommoda vitæ:
Hunc solet errorem turpi prætexere culpæ.

7. Nec minùs id vanum: 8. Vir cui natura negauit
Et prolem & fratrem, nullis hæredibus auctus
Aurum auro cumulat, duròque labore labore;
Mœstus, opes si fortè leui decerpserit vsu,
Sed crustas rodit, cæpas atque allia frustis
Allinit, & sola fauces attemperat vnda:

Non illū sopor ullus habet, noctemque diemque
Continuat studia, & curâ desudat inani,
Expleri que nequit mentem, ardescitque fruendo:

Nil oculo dextræque satis; nec corde volutat;
Quid iuuat in tantos vitam exercere labores?
Quid ve sequor curis? medio quid egenus in auro
Fraudo bonis genium, latices & Tantalus inter
Fallo sitim, dotem decies ceu quinque pararem
Danaidum sponis, generis quæ stēma propagant.

9. *Melius est ergo duos esse simul quàm unum : habent enim emolumentum societatis suæ.*

Syriac. *Meliores sunt duo uno, quibus est merces bona in labore suo.*

10. *Si unus ceciderit, ab altero fulcietur: ut soli, quia cùm ceciderit, non habet sublevantem se.*

11. *Et si dormierint duo, fouebuntur mutuo: unus quomodo calefiet?*

12. *Et si quispiam prauaverit contra vinum, duo resistunt ei, funiculus triplex difficile rumpitur.*

13. *Melior est puer pauper, & sapiens*

Non mihi mater anus superat, non restat alendus
Longævus pater, & mutis tacet ædibus hæres,
Nulla super fibra est stirpis, quæcunque laboro
Improbis, hæc vitæ non proficiencia perdo:

Tam malè quid de te vesane mereris, vt ultro
Exitium iuuet extremamque accersere pestem?

9. Vis vni duplex præstat, maiórque resurgit
Cuique artis merces, duo cùm iungere laborem
Concordes: paribûsque operas si viribus ambo
In commune ferant, melioribus orsa capeffunt
Plerumque auspiciis, meliori & fine coronant,
Res vbi consensu, & curis communibus acta est:

Vnius irriguo sudor non pinguis ab ore
Diffluit, at comitem si se coniunxerit alter
Succollétque iugo, gemini sociale laboris
Munus in immensum triplicato fœnore crescit:

10. Væ tibi, si titubante pedum molimine solus
Ingredieris, vel crura solo labentia ponas,
Sistere nutantem nemo, aut releuare iacentem
Præsto aderit, qui pròpta habilis vestigiâ firmet.

11. Est comes auxilio comiti: si fessa sub vno
Componant duo mēbra thoro, calet igne vicissim
Alter ab alterius, geminóque ardore fouetur:
Alteruter celebs deserti incommoda lecti

Incomitatus habet. 12. Si fortior vnus in vnum
Inualidum steterit, iuncto duo robore robur
Vnanimes hostile prement, vis tanta duorum est!
Exere conatum, nodosâque brachia stringe

Duratósque artus, luctare & corpore toto
Enitens, tanto nusquam molimine funem,
Qui triplici intortus replicatur cannabe, solues.

13. Præstat egēs sapiēsque puer, quàm grádior annis,
Sed virtute minor princeps, & mentis egenus,

rege sene & stulto, qui nescit prouidere in posterum.

Septuag. Bonus est puer pauper, & sapiens super regem seniore, qui nescit prouidere in posterum.

14. Quod de carcere, catenisque interdum quis egrediatur ad regnum: & alius natus in regno, inopia consumatur.

15. Vidi cunctos viuentes qui ambulant sub sole cum adolescente secundo, qui consurget pro eo.

16. Infinitus numerus est populi omnium qui fuerunt ante eum, & qui postea futuri sunt, non latabuntur in eo: sed & hoc vanitas, & afflictio spiritus.

17. Custodi pedem tuum ingrediens domum Dei, & appropinqua, ut audias: multo enim melior est obedientia, quam stultorum victima, qui nesciunt quid faciunt mali.

Chald. Cost. Tu igitur homo cum oraturus in templum pergis, observa pedem tuum, neque eò peccatis scatens & plenus venias, nisi prius ad te rediens patientem aurem accommodaueris susci-

Ignarus venturum olim præuerrere tempus,
 Exemplis conferre exempla nouissimâ primis
 Nescius, aut aliis alios expendere casus
 Casibus, & lapsis currentia sæcula sæclis.

Sæpe fit, vt fœlix altâ puer indole cursum
 Annorum superante, per ardua culmina celsæ
 Præcurrat virtutis, & in sublime citato
 Mentis eat gressu, neque tunc puerilia curet
 Oria, sed lusus noscat tractare viriles,
 Ardua moliri, & puero maiora profari.

14. Namque catenatum durâ de compede seruum
 Excepit solij non expectata potestas;
 Aurato contrâ iacuit qui molliter ostro,
 Turpiter è folio sceptrisq̃ exclusus auitis,
 Huc illuc panem per compita quæritat erro,
 Regalésq̃ manus ad sceptrâ domestica natas
 Demittens, quæ olim dederat, stipis æra reposit,
 Largitor prius, & versa nunc sorte rogator:
 Vsq̃ adeo variata leui fortuna rotatu
 Voluitur incertum, mutatq̃e aduersa secundis,
 Vel secus, infidósq̃e obuertit nubila vultus.

15. Vidi ego turmatim procures coluisse futurum
 Imperij hæredem, spretóque parente frequentes
 Nato blanditos, surgenti assurgere soli:

16. Sed desertores non longum ambita manebunt
 Gaudia, succedent fallaci tædia menti,
 Pœnâque perfidiæ vindex: Sed & illud inane est.

17. Dum templum ingrederis, templi hospite nu-
 mine dignas

Funde preces, memor ante sacros cōsistere vultus;
 Nec tam multiplicis perfuso sanguine tauri,
 Flexibili quàm mente lita; vouet ille bidentes,
 Qui nequit indomiti cordis mactare furores

pienda à sacrificiis, & sapientibus doctrina legis : Neque imitare stolidos homines , qui dolo cautè mala proparatis offerunt, neque tamen à nefandis operibus, quæ manibus quasi concluderunt suis, auocant.

CAPVT QVINTVM.

Argumentum.

Quatuor alia veræ religionis capita docet, nimirum sanctè, & prudenter orandum; statim soluenda vota; colendam submissè Dei prouidentiam; carnis rebelles impetus aduersus Dei legem comprimendos, insertâ interim de Angelis, & de vanitate insomniorum vtili doctrina. confirmat beatitudinem non in avaritia, sed potius vitæ iucunditatem in honesto diuitiarum vsu esse positâ.

1. *Ne temere quid loquaris, neque cor tuum sit velox ad proferendum sermonem coram Deo. Deus enim in cælo, & tu super terram: idcirco sint pauci sermones tui.*

2. *Multas curas sequuntur somnia: & in multis sermonibus inuenietur stultitia.*

3. *Si quid vouisti Deo, ne moreris reddere: displicet enim ei infidelis, & stulta promissio: sed quodcumque voueris, redde.*

4. *Multòque melius est non uouere, quàm post votum promissa non reddere.*

5. *Ne dederis os tuum, ut peccare facias carnem tuam, neque dicas coram Angelo, non est prouiden-*

Peio-

Peiorémque ferâ rabiem; quid sanguine multo
 Manantem taurum festas iugulare sub aras
 Profuerit, quanquam ille recens in cornua surgat
 Iam primùm, crescâtque animis; si mite tonantis
 Ferre iugum collo contrâ oblucente recuses,
 Nec prior æternæ succumbas hostia voci?
 An dubitas accepta cadat quæ victima cœlo?
 Mens diuûm reuerens, & legi subdita ceruix.

CAPVT QVINTVM.

1. **Q**UID ruit effusis lingua inconsulta loquelis?
 Namque Deus suprâ est, terras vnde ar-
 duus imas,
 Et pelagus, subtérque meantia flumina cernit;
 Conde caput cœli penetralibus, ipse rotator
 Astrorum patriâ vindex de sede vibrabit
 Fulmina; telluris gremio stygiisq; cauernis
 Abdere, repperies furias armatâque telis
 Agmina, & vltrices in conscia pectora dextras;
 2. Quæ passim sensu veniunt voluenda diurno,
 Hæc simili nocturna quies in imagine reddit.
 Quos sibi secessu mens interiore tumultus
 Aut figmenta creat, vesania garrula prodit.
 3. Si reus est voti, persolvere rite memento
 Vota, sacramenti nam relligione teneris:
 Inconsulta Deo, stulto temerarius ausu
 Qui vouet, irrisor cœli est; citò solvere vota
 Proderit, aridet festina solutio: 4. Præstat
 Haud vouisse Deo, quàm non soluenda vouere,
 Victima nulla moras patitur, nulla hostia fraudes,
 5. Ne temere effundas, quæ te dixisse pigebit;

ria; ne fortè iratus Deus contra sermones tuos, dissipet cuncta opera manuum tuarum.

Chald. Cost. Ne sermones tuos peruertas, unde corpus tuum in iudicium gehenna deponatur. Neque enim potes pratexere, imprudens feci, tunc enim Dominus verbis, quæ per contumeliam dixeris, offensior factus, opera manuum tuarum labefactabit.

6. Vbi multa sunt somnia, plurimæ sunt vanitates, & sermones innumeri: tu verò Deum time.

Syriac. Quoniam in multitudine somniorum & vanitatum, & sermonum multi errores.

7. Si videris calumnias egenorum, & violenta iudicia, & subueriti iustitiam in provincia, non mireris super hoc negotio: quia excelsio excelsior est alius; & super hos quoque eminentiores sunt alij.

8. Et insuper uniuersa terra Rex imperat seruienti.

9. Auarus non implebitur pecunia: & qui amat diuitias, fructum non capiet ex eis: & hoc ergo vanitas.

10. Vbi multa sunt opes, multi & qui comedunt eas: & quid prodest possessori, nisi quòd cernit diuitias oculis suis?

Lingua vel vna trahit vitiorum in lubrica totum
 Communi exitio corpus, cœlûmque laceffit
 Vocibus his; dubiis mortalia casibus errant,
 Haud sœcus ac superos si numen obambulet orbes
 Securum quam nostra viam vestigia signent;
 Fortunam frustra increpitas, sortique ruenti
 Inconcussum animum mactas, pectûsque resolvis;
 Hæc contra mentem obfirma, tantique doloris
 Define, ne tacito, quæ corde reuolvis agenda,
 Quæve facis, præuertat incluctabile numen.

6. Nam veluti mentem turbata insomnia noctis
 Discruciant, dum contuimur volitare figuras,
 Nunc fratris stare effigiem, nunc ora parentis;
 Sic sua garrulitas patiens deliria, vanas
 Effingit species, mentitur mille figuras,
 Nomina mille, modis & ludificantia miris
 Ingenij figmenta loquax dementia garrit.
 At merus ante oculos diuinus oberret vbique,
 Qui mentē dextramque regat. 7. Si fraude nocētū
 Deiectos videas inopes, violentaque ferri
 Iudicia, & totum turbari legibus orbem,
 Haud temerè id factum tamen est, haud numine
 nullo :

Namque potente potentior eminet alter, & iste
 Obsequitur, seruûsque alij famulatur vterque :
 8. Sic magno maior, maiori maximus, vnus
 Ter summus latè imperitat regnator in omnes,
 Phœbus vbi lucet veniens, mediûsque, cadénsque.
 9. Nullus stat finis cupiendi, nullus habendi :
 Hæc vesana fames crebris accessibus aucta
 Sæuit inexplerum, solitòque potentior ardet,
 Copia nec potis est rabiem sedare fruendo.
 10. Congeries vbi vasta tumet pondûsque metalli,

11. *Dulcis est somnus operanti, siue parum, siue multum comedat. Saturitas autem diuitis non finit eum dormire.*

Shiruuod. *Dulcis est somnus negotianti: Satisfactio diuitis, illa non est sibi requies ut dormiat.*

12. *Est & alia infirmitas pessima, quam vidi sub sole: diuitia conseruata in malum domini sui.*

13. *Pereunt enim in afflictione pessima: generauit filium, qui in summa egestate erit.*

14. *Sicut egressus est nudus de utero matris suae, sic reuertetur, & nihil auferet secum de labore suo.*

15. *Miserabilis prorsus infirmitas, quomodo venit, sic reuertetur. quid ergo prodest ei, quod laborauit in ventum?*

16. *Cunctis diebus vitae suae comedit in tenebris, & iniuriis multis, & in arumna, atque tristitia.*

Arab. Interpr. *Propterea omnes dies eius in tenebris, & lamentationem, & in iram multam, & in infirmitatem, & amaritudinem vergunt.*

Ingluies ibi multa viget, numerusque vorantū :
 Quid domino prodest graue pondus diuitis auri,
 Prædæque Pactoli? Quid multa lætus opum vi
 Incumbit gazæ virtute, aut fraude parandæ,
 Quæ vel cana situ multo, latebrisque reposita
 Clam colitur tecto interiore, ferisque reclusa;
 Aspectu nisi forte oculos ut pascat inani?

Namque manu atrectare nefas, aut prodere luci.
 11. Aspice ut incōptus, multoque ex sole perustus,
 Callosusque manus, & longo lassâ labore
 Membra fatigatus pastor, multumve, parumve
 Ederit, aduerso resupinus ventre recumbit,
 Sopitoque graues perstat de pectore somnos;
 At locuples lautâ ventrem dape fartus obesum,
 Iliâque extensus, quascumque liguriit, escas
 Aggerit, indulgens genio, pinguique polentæ,
 Dum cibus oppletâ fugiens ex fauce redundet:

Irrequieta ferens hic longæ tædiæ noctis
 Æstuat, alternamque vigil se versat in aurem,
 Quamquam illum stratis recubantem mollibus, altâ
 Suffultum pluma, solitâ dulcedine somnus
 Prouocet, insomnes non secius exigit horas.

12. Nec minus id durum, quod possessoribus ægris
 Deliciosus opum, fit & exitiosus aceruus:

13. Diuitiasque patris, luctu lachrimisque requireret

14. Natus inops rerum, nudusque redibit in aluum

15. Funeræ matris, vitali nudus ab aluo

Qui venit; vitæque idem, qui prodit, abibit
 Usque miser, nec enim merces super vlla laborum est.

16. Insipidas, dum spirat homo, mala vescitur escas
 In tenebris, veluti nigris tellure sub ima
 Talpa suis infossa cauis, imperuia luci
 Tecta amat, & patrios sibi condere docta penates

17. *Hoc itaque visum est mihi bonum, ut comedat quis, & bibat, & fruatur letitia ex labore suo, quo laboravit ipse sub sole, numero dierum vite sue, quos dedit ei Deus, & hac pars est illius.*

18. *Et omni homini, cui dedit Deus divitias, atque substantiã, potestatemque ei tribuit, ut comedat ex iis, & fruatur parte sua. & latetur de labore suo; hoc est donum Dei.*

19. *Non enim satis recordabitur dierum vite sue, eo quod Deus occupet deliciis cor eius.*

CAPVT SEXTVM

Argumentum.

Perstat in infectanda, & exponenda auari diuitis calamitosa, & arumnosa conditio, tum inculcatis prioribus, tum nouis productis vanitatis, & infelicitatis argumentis.

1. *Est & aliud malum, quod vidi sub sole, & quidem frequens apud homines.*

2. *Vir, cui dedit Deus diuitias, & substantiam, & honorem, & nihil deest anime sue ex omnibus, qua desiderat; nec tribuit ei potestatem Deus, ut comedat ex eo: sed homo extraneus vorabit illud: hoc vanitas, & miseria magna est.*

3. *Si genuerit quispiam centum liberos, &*

Longos subter init tractus ; sic carcere clusus
 Infossusque animus vix carpit in abdita rerum
 Certus iter , cæcòsque nequit superare recessus ;
 Parte sui meliore perit , certantibus intus
 Dimissus studiis , grauior penetralibus ira
 Incubat , ardet amor , metus in diuersa renitens
 Abstrahit , aut sæuit dolor , aut mala gaudia pulsât
 Ægram animam , vel cura vorax in viscera serpit ,
 Nil nisi nomen habet vitæ , sunt cetera mortis.
 17. Hoc cœli magnū est , paucisq; parabile munus ,
 Si quis lætus edat , lautus bibat , atque paratis ,
 Vt fors æqua dabit , tranquillâ in pace fruatur.
 18. Grande Dei donū est homini , non viribus vllis
 Audendum , humanæ vix & sperabile sorti ,
 19. Si quis opes , & opum , quas iure parauerit , vsum
 Coniungat simul , & pacem superaddat vtrisque ;
 Ter felix , (nam nil potiùs licèt improba captet
 Votorum ambitio , sed nec Deus offerat vltro ,)
 Si facilis iam vota polus postrema secundet.

CAPVT SEXTVM.

1. **S**ED quid parua queror studiis grauioribus
 æger ?
 Vidi aliud , non rarò oculis quod cuique recurrit ,
 2. Vir , cui diuitiæ , & fului numerosa metalli
 Congeries , rutilòque micat laus clarior auro ,
 Cui Deus indulgēs , quæcūque poposcerit , implet ,
 Harum vsu rerum caret interdictus , & alter
 Indelibatas vorat ore famelicus escas.
 3. Quem Lucina patrem centeno pignore felix
 Auxerit , & longa mensam cingente coronâ ;

C. iiij

vixerit multos annos; & plures dies ætatis habuerit: & animus illius non utatur bonis substantiæ suæ; sepulturæque careat: de hoc ego pronuncio, quod melior illo sit abortivus.

4. Frustra enim venit, & pergit ad tenebras, & obliuione delebitur nomen eius.

5. Non vidit solem, neque cognovit distantiam boni, & mali.

6. Etiam si duobus millibus annis vixerit: & non fuerit perfruitus bonis, nonne ad unum locum properant omnia?

7. Omnis labor hominis in ore eius: sed anima eius implebitur.

Chald. Cost. Omnis defatigatio pro cibo abhominæ suscipitur, & neque hominis animus esculentis, & poculentis satiari potest.

8. Quid habet amplius sapiens à stulto, & quid pauper, nisi ut pergat illuc, ubi est vita?

Natorum numerum si centum æquauerit annis
 Longæuus, neque concessi, quàm longa manebit
 Vita, boni partem minino decerpserit vsu,
 Si tandem inferias tumulique inhumatus honores
 Expectet, membrisque sinum neget vrna tegedis,
 Huic ego vel crudum, qui præcipitatus abortu est,
 Prætulerim fœtum: 4. Nam fama vtriusque sub
 vmbas

Cum vitâ cedit, similis lex dicta futuri est:

5. Nescius hic rerum, vitæque quid exigit ordo,
 Sed prius aduersis nouies quàm luna quadrigis
 Lucinam accierit completo tempore partus,
 Tantùm immunda lues, primique coagula fœtus,
 Et massa informis, taboque obscœna cruento
 Iusta puerperij præit interualla, reclusisque
 Egeritur claustris, & olenti matris ab aluo:

Et tenebris ruit ad tenebras; de ventre parentis
 Cognatam alterius properat genitricis in aluum,
 Securóque subit vitæ in limine portus;

Instar abortiui, qui præcoce prodiit aluo,

6. Diues erit, bis mille licet compleuerit annos:
 Intempestiuam mortis præuertitur horam,
 Huic nisi concessum est fructus libare laborum.

7. Totus homo insudat cogendis, nec sibi parcat
 Explerive potest opibus; sed præsciis æui

Præteritique memor, sibi prouidus omnia curat,
 Accumulatque, oculis, quàm vêtre capacios, escas:

Ille animus stirpis diuinæ fructus, & auræ
 Particula ætheræ, memor haud cœlique sui que
 Procumbit solos oculorum & ventris in vsus:

Oris at esuries, & opum vesana libido

Non saturanda ci'is, nullóque explebilis auro est.

8. Quid stulto differt sapiens, & diues egeno?

Bryling. *Quanam abundantia sapienti super
stultum? quia pauper nonit ire contra vitam.*

9. *Melius est videre quod cupias, quàm
desiderare quod nescias: sed & hoc vani-
tas est, & presumptio spiritus.*

10. *Qui futurus est, iam vocatum est no-
men eius: & scitur quod homo sit, & non
possit contra fortiorem se in iudicio conten-
dere.*

Syriac. *Cognitus est quod sit filius hominis, &
non potest iudicare cum illo qui est firmior se.*

11. *Verba sunt plurima, multamque in
disputando habentia vanitatem.*

Syriac. *Sunt responsiones multa, qui multipli-
cant vanitatem.*

Huic satis est, quæ parua domi fortuna remansit;
 Tollit humo caput excelsum, & stellantibus infert
 Syderibus pauper, proprioque ab lumine fulget;
 Quæris quo tumuli, virtutem, limine condas?
 Immenſi ſpatio cœli, petit illa ſépulchrum
 Inſcriptum ſtellis, vaſtôque æquabile mundo.
 9. Optatâ ardentes ab imagine pſcere vultus
 Præſtiterit, ſtudiôque ſequi maiore iuuabit,
 Quod ferit alpectum, & fructu præſente laceſſit,
 Denique ſorte frui oblatâ; quàm corde vagari
 Semper inexpletum, & maiora requirere partis.
 10. Quæ ſpirant, & ſtant habili quæ viuida ſenſû,
 Expectant lethum; non vis, non igneus intus
 Æternum ardor alit, lapſurâque ſponte, retentat:
 Quiſquis erit (quantus quantuſque ſit ille futurus);
 Nomine prænotus vitam communibus haurit
 Principiis, nullôque velut leuis aura ſequente
 Diffugiens, primas vel ſponte recurret ad umbras;
 Et lucem, lethi ſub conditione, paciſcens.
 Deficiet, nemo cunis melioribus ortus,
 Aut fietus potiore luto eſt: lex omnibus vna;
 Nam perit alternôque redux ſtat. funere vita.
 Auctori parebit opus, quis tendere dictis
 Audebit contra? quis contra robore ferri?
 Non par quiſquam illi, nedum exuperabile num̃
 Viribus humanis, vt eò pertingere Adami
 Auſit humo naſcens, & humum ſubitura propago:
 Nullus non domino collatis viribus impar.
 11. Sint ſatis hæc, quâquâ quota portio dicendorû!
 Omnia nec memorare decet, nec nulla neceſſe eſt.
 Plurima verba, nihil niſi plurima pabula venti.



CAPVT SEPTIMVM.

Argumentum.

Ex breuitate vitæ ostendit quæ bona sectanda, ac præ aliis eligenda in vita sint : præparat deinde hominem ad bonam, & felicem mortem : monet cauendum tum ab aliis minùs noxiis vanitatibus, tum potissimum à lethali fœminæ veneno.

1. *Quid necesse est homini maiora se querere, cùm ignoret quid conducat sibi in vita sua, numero dierum, peregrinationis suæ, & tempore quod velut umbra præterit? aut quis ei poterit indicare, quid post eum futurum sub sole sit?*

Chald. Cost. *Quis quoque homini renunciabit quod post eum euenturum est in hac vita?*

2. *Melius est nomen bonum, quàm vnguenta preciosa; & dies mortis die natiuitatis.*

Chald. Cost. *Præstantior est optima existimatio, quam sibi quarunt in hac vita iusti oleo excellentis & melior dies, quo iacuerit homo, & in tumultu bono nomine, & meritis clarus fuerit, quàm ille ipse dies, quo improbus in lucem venit.*

CAPVT SEPTIMVM.

1. **F**ATA quid humanam super assurgentia sortē
 Affectare decet, maiorāque viribus orsa?
 Rusticus indecoris ductus exosus aratri
 Cogitat æquoreos tractus, & carbasa ventis
 Explicat, & gazis spoliat nouus institor orbem;
 Mox falso saturamne, tubas, & tympana Martis
 Affectat, laurisque caput victricibus auctus
 Falces, & trabeas, & spe crescente, secures
 Somniat, & tacitis ambit diademata votis.
 Quid sit opus facto, rerūque quid exigat vsus,
 Nescit homo: velut vmbra fugit, quò nemo pene-
 trat

Nuncius, hic obitā referens quæ morte gerantur:
 Demens! qui nescis spirantibus æthere in alto
 Interclusum iter ad manes tellure repositos.

2. Quid fumo pretium ponis, stultāque vaporī
 Arte laborato? quid nitro corpus inungis
 Imbellēsque comas? incassum vnguenta parabis,
 Vita nisi gratæ redolet virtutis odorem:
 Suauior vnguento, dulcisque aspergine succi,
 Post mortem qui restat honos, & funeris hora
 Natali est potior: Stat meta reperta laborum
 Funere, quique obeunt, pœnarū ex gurgite vasto,
 Mille inter Syrtes saxisque hærentia laxa,
 Littoribus proram obuertunt, sedēsque quietas
 Naufragio ex medio subeunt patriāque vocantē;
 Post sale quassatam dubio, sæuisque carinam
 Fluctibus, emensi ponto quodcumque pericli est,
 Vota coronati, rerum tibi maxime rector,

3. *Melior est ire ad domum luctus, quàm ad domum conuiuij: in illa enim finis cunctorum admonetur hominum, & viuens cogitat quid futurum sit.*

Chald. Cost. *Melius est hominem molestiâ affectum, &c. adire, quàm ad domum conuiuij, & poculorum, in qua susurrone adfunt, contendere, &c. in arumnosam domum se recipiens vir iustus, ad pœnitentiam adducitur, & mortis sermones in animum inducit suum, & si aliquo in errore versetur, illum deferens, ad Deum faciet conuersionem.*

4. *Melior est ira risu: quòd per tristitiam vilius corrigitur animus delinquentis.*

Perfoluunt ritè, optata statione potiti.

At vitæ in foribus stabulant luctûsque dolorque
Nudâque debilitas membrorum, & mētis egestas,

Mille necis facies, pœnarum nomina mille;

Vis nulla est animi, nec pars est corporis vlla

Commoda vel curis, vel fortibus vtilis ausis:

Vidit vbi puer hoc cœli spirabile lumen,

Nascentémque parens maturâ fudit ab aluo

Enitens, vitam impatiens lacrymante salutat

Carmine, & ingratas vagitu personat auras,

Accusat matrem, testatur & astra querelis

Inuitus nasci, & detrectat corporis artus,

Vt male conueniens menti atque ignobile pōdus.

Heu miser ingratos quoties consurgere soles

Cernes, ingratas quoties succedere lunas!

3. Præstat adire domos, vbi deflet fata parentis

Filius, aut coniux dilecti coniugis urnas

Complet lamentis, & fœmineo vlulatu;

Quàm, quæ festiuus resonant concentibus, ædes.

Sit domus in luctu, faciunt aliena peritum

Funera, defuncti casu tremefactus amici

Ad vitam respectat homo, cautûsque futurum

Prospicit, haud monitoris egēs, vocisq; magistræ.

Quis ruat in crimen, tristem cùm proxima vultû

Mors aperit, ruptâque etiamnum flebile venâ

Vulnus hians, lacrymas lamētâque tristia poscit?

Sandapilâ corpus recubans oracula fundit

Flexanima, & mutis clamosa silentia labris.

4. Ira in fronte minax, & qui stat vultibus ignis

Præstiterit risu, laxisque in gaudia labris.

Namque grauis facies scelus indignantis amici

Peccantem meliora docet, tacitisque nocentem

Vocibus increpitans, medio sub crimine sistit.

5. *Cor sapientum ubi tristitia est, & cor stultorum ubi latitia.*

6. *Melius est à sapiente corripì, quàm stultorum adulatione decipi.*

7. *Quia sicut sonitus spinarum ardentium sub olla, sic risus stulti: sed & hoc vanitas.*

Caten. Græcor. Patr. Nam stultorum hominum risus expressam præ se fert imaginem spinarum multarum, quæ dum flammam corripunt, crepare stridunt sonitu, hiscuntque tota.

8. *Calumnia conturbat sapientem, & perdet robur cordis illius.*

9. *Melior est finis orationis, quàm principium; melior est patiens arrogante.*

10. *Ne sis velox ad irascendum: quia ira in sinu stulti requiescit.*

5. Vitur ut freno sapiens mœrore, sed excors
Laxatis præceptis in gaudia fertur habenis,
Nullaque lex stulto. 6. Magis at prudentis amicam
Censuram perferre decet, quam blanda loquentis
Suavi voce capi: 7. Spinæ ut flamma loquaces
Depopulans, strepitum præter cassumque fragorem
Nil ciēt, at vanos cineres cum murmure magno
Probrosum molitur opus; sic lingua loquaci
Garrulitate sonos præter cassumque fragorem
Nil mouet; in cineres omnis labor irritus exit.
Quid tibi blanditiæ vocum? ut supposita lebeti
Tinnula flamma sonat crebris stridoribus, excors
Sic crepitat risu, tinnitumque asperat aures:
Materies velut illa silet, modicoque calori
Stat similis primum, subitoque incendia latè
Miscet, & exuperat magis, atque accrescit eundo;
Sic levis est, & dulce sapit iocus, & sua lucet
Gratia, mox vires fumit, crebrisque cachinnis
Auctior, admotas rationis spernit habenas.
8. Censoris ne temne oculos, qui vellicet aurem,
Palantesque gradus virtutis in atria flectat;
Pharmaca desipiunt ægro malè grata palato,
Reddita vita sapit; si culpa reciditur ictu,
Virga placet; nec dura manus quæ vulnera curat.
Utque sano hyblæo præfers, quæ pocula peius
Colchidis odisti plantâ, si pota salutem
Attulerint; monitis primum sic censor acerbis
Aspera proloquitur, tandem meliora perorat:
9. Dignior est, oneri qui fortia colla gerendo
Duratus firmat, nec mole fatiscit ab ullâ
Languidus; excelsâ quàm qui ceruice tumescit
Grandior, exitium parvâ pro laude paciscens.
10. Si sapias, haud faciles iræ inclinatus habenas

11. *Ne dicās quid putas causa est, quod priora tempora meliora fuere quàm nunc sunt; stulta enim est huiusmodi interrogatio.*

Shirruod. *Ne dixeris: quid factum est, quia dies priores erant meliores quàm iste? quia non cum sapientia interrogasti super hoc.*

12. *Vtilior est sapientia cum diuitiis, & magis prodest videntibus solem.*

Permitte, infano sed enim sub corde moratur
 In consanguineum, quæ vertitur ira, furorem:
 Qui claudit primos aditus, nec sede receptat
 Hostem aduentantem, sed longè finibus arcet,
 Sceptra sui victor furiis diròque furori
 Eripuit, quique instabat, cadit impetus vltro:
 At rapido contrà, qui cæcæ turbine mentis
 Abreptus semel excelsâ se rupe deorsum
 Præcipitem dedit, incassum resilire laborat;
 II. Nec labem excusas, vbi dixeris; ecquid aberrant
 Nati de generes, & auitâ stirpe recedunt?
 Excidet haud talis sapientis ab ore querela.
 Quid Phœbo scelus austruimus? quid cudim' auro
 Secula patrum, prauî artifices, præsentia ferro?
 Fons nunquam illimis fluxit, nunquam æthere
 Phœbus

Claruit innubi: non crimina nata profundo
 Ex crebo his primum posuere cubilia seclis;
 Est æquæua solo, nec iam primum inficit auras
 Progenies orci: vis aurea secla renasci?
 Seclorum ipse opifex pretiosos induc mores,
 Aurea cude opera, atque in deteriora ruentem
 Te pudor atque metus sistat: laus prima nocentū
 Et pudor & metus est, iniectaque fræna furori;
 Ferrea sic ætas aberit, sic aurea surget.
 12. Iuncta opibus prodest sapientia, inagnus ab ære
 Fulget honos; claris at si virtutibus obstet
 Res angusta domi, spatio breuiore coërcet
 Et tenebris damnat, quæ lumine digna, tuentum
 Ora oculosque petunt: contrà micat aurea virtus
 Clarior, & socio geminatur lumen ab auro.
 Virtus rebus inops sine vëto, & remige cymba est,
 Ex fidibus testudo carens, arcusque sagittis.

13. *Sicut enim protegit sapientia, sic protegit pecunia: hoc autem plus habet eruditio, & sapientia, quod vitam tribuunt possessori suo.*

14. *Considera opera Dei, quod nemo possit corrigere, quem ille despoxerit.*

15. *In die bona fructus bonis, & malam diem precave: sicut enim hanc, sic & illam fecit Deus, ut non inueniat homo contra eum iustas querimonias.*

16. *Hac quoque vidi in diebus vanitatis meae: iustus perit in iustitia sua, & impius multo vivit tempore in malitia sua.*

ECCLESIASTES.

Si forſan locuples indocta reſoluerit ora,
Filius eſt Suadæ; multâ ſed pauper in arte
Palladis inſtructus, cedro ſi digna loquatur,
Audiet ignarus, nec labra ciere peritus.

13. Præſtiterit tamen æternis, animique parandis
Inſudare opibus, quas fur non tollat avarus,
Non roguſ abſumat, non nauifragi maris vnda,
Sed poſſeſſori ſua ſint in pace voluptas.

14. Parte aliâ æternæ ſolers miracula dextræ
Contemplator, ei quiſnam par robore? vel quæ
Si Deus eruerit, valeat reparare poteſtas,
Inque ſuos iterum collapſa reſingere vultus?
Flatibus ille ſolo, quæ nemo reſecerit, æquat.

15. Luce bonâ lætare bonis, & luce ſiniſtrâ
Firma animum, luctûmque dies vicina leuabit;
Fecit vtramque Deus, ne ſit tibi cauſa querelæ.
Non riſu effuſus, non ſpectu nubilus ora

Commacula, lancémque tene moderatus vtrâque:
Namque vices varias decet altâ mentis ab arce
Conſpicere, & ſi ſors blanditur læta, potiri
Lætitiâ, ſi ſæua nocet, ſperare medelam.

16. Vir iuſtus pretioſæ animæ momenta coërcet
In breuius, ſpatiisſque incluſum haud grandibus
æuum

Mille trahit lethi in ſpecies, properâtque feretro
Exanguēs artus, & cō remeantia membra,
Vnde ortum iam nunc duxere; aſt impius annos
Ducit in immenſum, mercatus crimine vitam.
Vidi, alacri vultu, & rectâ ceruice nocentes
(Namque iugum collo nullum eſt) decurrere vitâ
Tramite inoffenſo, & pulſis caneſcere morbis:
Interea rectique tenax, & cultor honeſti
Pæne aras inter cadit hoſtia, nec ſua virtus

17. *Noli esse iustus multum: neque plus sapias, quàm necesse est, ne obstupescas.*

Var. Interpr. *Ne sis sapiens abundanter, ultra modum, neque maiorem sapientiam tibi arripes.*

18. *Ne impiè agas multum: & noli esse stultus, ne moriaris in tempore non tuo.*

Chald. Compl. *Ne ambules post cogitationes cordis tui, & impiè agas, neque longè facias viam tuam à domo doctrinae legis, ne sis stultus fortè causa mortis animæ tuæ, ut succidantur dies vitæ tuæ, ut moriaris, antequam perveniat tempus tuum, ut moriaris.*

19. *Bonum est te sustentare iustum, sed & ab illo ne subtrahas manum tuam: quia qui timet Deum, nihil negligit.*

Effusæque preces properantia tela retundunt.

O scopulum! quid enim superis pia turba litamus,
Infantem si pœna premit decreta nocenti?

Nec tamen in cœlum blasphema resolveris ora.

17. Virtus, quæ nimia est, vitij confinia tangens
Cultorem excessu maculat, prauósque per vñs
Degenerat tandem: summa est sapientia, cœtis
Desipuisse locis; sua stat mensura modúsque
Virtuti, nec in immensum sine crimine crescit.

Ne sape plus iusto, iurísque tenacior æqui
Exactórque modum supra, implacabilis esto,
Aut prudens nimium; ne maiestate verendus
Omnia qui terret, trepidantia corda pauore
Compleat, audacésque oculos maiore retundens
Lumine (nam contra non est impune superbis
Surgere) te circumfusa caligine mergat
Humanæ super audentem fastigia sortis.

Quid fragili incauti petimus confinia cœli
Remigio alarum, cursúsque insistimus olim
Dædalidæ nocuos, sacrúmque attingimus ignem?

18. Sed neque mütatos flecte in contraria mores,
Ne vitij lux prima, tibi sit & vltima vitæ.

O multum doliture, tibi mors ferrea si te
Ignotum abripiat, quæ deinde piacula restant?
Namque diem sæpe, ante diem, clausere nocentes.

Ergo iustitiain, sôphiámque peritus vtrínque
Binâ stringe manu: medio tutissimus ibis,

Si scopulos hinc inde timens incurrere, plantas
Artifici moderere gradu, quem sedulus omnem
In partem flectes, iusto inoderamine librans

Quid decet, & quando, & rerû quid postulat vñs.

19. O faucas miseris, durísque laboribus adsis,
Sufficiens lapsó vires, placidúsque iacenti

20. *Sapientia confortauit sapientem super decem principes ciuitatis.*

21. *Non est enim homo iustus in terra, qui faciat bonum, & non peccet.*

22. *Sed & cunctis sermonibus qui dicuntur, ne accommodes cor tuum, ne fortè audias seruum tuum maledicentem tibi.*

23. *Scit enim conscientia tua, quia & tu crebrò maledixisti aliis.*

24. *Cuncta tentavi in sapientia: dixi, sapiens efficiar: & ipsa longius recessit à me.*
Por-

Porrigere non villo retrahendam tempore dextram.

Qui numen metuit, bene prouidus omnia curat,
Nec ruit hostilem nimis inconsultus in ictum :
Hoc duce cuncta audet, clypeo nil tectus ab isto
Formidat, licet haud alio custode tegatur :

20. Non portæ affusus miles, non peruia nulli
Limina, non armis acies, non mœnibus vrbes
Prudentem tanto firmant munimine, quanto
Vnica vel nullis sapientia cincta cateruis,
Quæ crudos tacito distendit robore nervos :
Arma inimica cadunt, virtus si pectoris arcem
Occupet : iratis repetitum fulmen ab astris
Emitcet, irato splendet fulmine virtus.
Clarior, astringeri moles operosa labascit
Orbis, labentem nouus Atlas fulciet orbem :
Stat pugnax sonipes, frustra latrante molosso,
Immotus constansque viæ; tumidique leones
Non vultum obliquât, rabiem geminante catello.

21. Rarior est iustus, vix tot de millibus vnum
Forſan repperies, quem mens scelus omne perosa,
Nec minimæ tenui tentata aspergine noxæ
Securum reddat, nec culpa redarguat vlla:
Seu grauior, seu culpa minor (nec enim omni-
bus æqua)

Est nonnulla, nec in solidum vitabilis vlli.

22. Ne faciles de te sparsis sermonibus aures
Præstiteris, ne fortè tui conuitia serui
Aure bibas : 23. iusto si verba examine penſes,
Mens rea testis erit, te sæpe errasse susurris
Clam tacitis, altisque palam nocuisse loquelis.
24. Nil mihi inaccessum superest, nil restat inausum,
Et mecum hæc, diuina sagax arcana recludam,
Et sophiam, quo tecta procul se cunque locorum

25. Multo magis quàm erat: & alta profunditas, quis inueniet eam?

26. Lustravi vniuersa animo meo, vt scirem, & considerarem, & quarerem sapientiam, & rationem: & vt cognoscerem impietatem stulti, & errorem imprudentium.

27. Et inueni amariorem morte mulierem, quæ laqueus venatorum est, & sagena cor eius, vincula sunt manus illius: qui placet Deo, effugiet illam: qui autem peccator est, capietur ab illa.

28. Ecce hoc inueni, dixit Ecclesiastes, vnum, & alterum vt inuenirem rationem.

Abdiderit, sequar, & si quâ possum, assequar arte;
 Hic vbi mens animi paulatim excedere rebus
 Infuecit, sensûsque excelsa auertitur omnes
 Orbe relegato procul, & tellure relicta,
 Séque supra assurgit, penitûsque in se ipsa recedit;
 Sed longè à terris euectam, séque fruentem
 Nil inturbat mortale, vrgetque deorsum:

25. At frustra: & sophiâ propius quò tãgere nitor,
 Longiûs elusis se perfida proripit vlnis,
 Et labyrinthæo latet indeprensa baratro,
 Ecquis eam inueniet? 26. Nihil inquirente reliqui
 Intentatum animo, quò certa pateret origo
 Stultitiæ, & sceleris; cur stultus hic, impius ille:
 Quò magis obscuros tentas penetrare recessus,
 Vel libare leui fastigia pollice rerum,
 Plura vides superesse, manent maria alta relicto
 Soluentem portu, & super impendente procella
 Respicere auersum, cursumque reflectere cogunt.

27. Singula lustranti mihi fœmina durior ipso
 Funere visa fuit, namque vt formidine mortis
 Venator campos cingit, laqueosque tenaces
 Mendacésque parat foueas, vt compede nectat,
 Vel mactet ferro prædam, atque in tecta reportet,
 Et veluti incautos pisces in retia mittit
 Vel sua credulitas, vel iniquo semita casu;
 Nexilibus sic corda plagis, laqueis que dolosæ
 Fœminæ, & hamatis hærent delusa loquelis:
 Fœmineos nescis, adamantina vincla, lacertos,
 Ora focos, & verba faces? quis in igne pyrausta
 Illæsus volitet, tractétque impunè fauillas?
 Detestanda mora est, hosti dare terga triumphus.

28. Quod mihi quæsitû toties, nusquãque repertû,
 Quærendû hoc iterum superest, an fortè decorum

29. *Quam adhuc quarit anima mea, & non inueni; virum de mille unum reperi, mulierem ex omnibus non inueni.*

30. *Solummodo hoc inueni, quòd fecerit Deus hominem rectum, & ipse infinitis miscuerit quæstionibus. Quis talis ut sapiens est? & quis cognouit solutionem verbi?*

CAPVT OCTAVVM.

Argumentum.

Sapientis, ac sapientiæ laudes, & proprias notas enumerat; & quædam vanitatum genera, quibus sapientia medetur, intermixtis nonnullis bene viuendi præceptis.

1. *Sapientia hominis lucet in vultu eius, & potentissimus faciem illius commutabit.*

2. *Ego os regis obseruo, & præcepta iuramenti Dei.*

Fœmineis aliquid deprendere moribus esset;
 29. Verùm post tritas studiis tot inertibus horas,
 Nulla reperta bona est mulier, quæ non rea facti
 Vilius, vel non dicti sine lege profusi;
 Vir bonus utcunque est multis de millibus vnus.
 30. Mota poli facit vna reum, quem crimine parû
 Os vultûsque ferunt. Procul omni labe creatus
 Humanæ stirps gentis Adam, at labentibus annis
 Lapsa quoq; est pietas, tandêmq; in praua ruêtes
 Defecere suo paulatim à fonte nepotes,
 Et pessum mores iuère, infractâque luxu
 Sæcula, proh quantum distant ab origine riui!
 Quis diuina sagax arcana recludere verbis
 Certet, prudentique ausit contendere factis?
 Aut quis in his tantum speret præuerrere regem?
 Qui sisus virtute, parem se attollere contra
 Maiestate velit, similique in sede locare,
 Quisquis is est, casum frustra cluctatus, ab alto
 Audax præcipiti descendet in vltima lapsu,
 Ex summis meritis spatia ad postrema reuolui,

CAPVT OCTAVVM.

1. **G**ERMANIS impressa notis prudentia vultu
 Pingitur, & sapiens molli sinuamine sensus;
 Regis ad arbitrium flectit, vultumque colorémq;
 Alternat momenta, modis per singula miris;
 Riseris, arridet; contorseris ora, retorquet:
 2. Regales obserua oculos in iussa paratus;
 Effigiem maculare Dei exitialibus ausus
 Flagitiis, dat sacrilego cum sanguine pœnas,
 Quas Deus offensæ deposcit imaginis vltor:

3. *Ne festines recedere à facie eius, neque perman eas in opere malo, quia omne quod voluerit, faciet.*

4. *Et sermo illius potestate plenus est, nec dicere ei quisquam potest: quare ita facis?*

5. *Qui custodit praeceptum, non experietur quidquam mali. tempus, & responsionem cor sapientis intelligit.*

6. *Omni negotio tempus est, & opportunitas, & multa hominis afflictio.*

7. *Quia ignorat prae terita, & futura nullo scire potest nuntio.*

8. *Non est in hominis potestate prohibere spiritum, nec habet potestatem in die mortis, nec finitur quiescere ingruente bello, neque saluabit impietas impium.*

Interpr. Venet. Neque est ulla potentia in die mortis aut manumissio in pralio: neque liberabit impietas habentem eam.

Shirruod. Non saluabit impietas possessorem suum.

3. Si parere neques, celeri ne crede salutem
 Afferuisse fugâ, & tutò vitasse furorem,
 Rex lateri præsens, quocumque recesseris, instat.
 Perfer onus, fortè & fiet magis æqua ferendo
 Sarcina, tangeturque aliquo fors læua pudore :
4. Nitere nec contrà: placet hoc, placuisse potenti
 Sufficiet; si quid iubeat, mox acta sequentur;
 Factorum quis enim causas à principe poscat,
 Sicque argutetur? quianam te iudice solo,
 Te solo hæc auctore facis? 5. Qui pronus ad omne
 Imperium suprema ultro decreta capeffit,
 Corpore nil, animo nihil experietur acerbum.
6. Quæ responsa sibi, quo sint & tempore danda,
 Obseruat sapiens; & dicta expensâ reponit:
 Consultandi horas, tempusque aduertit agendi:
 Sunt sua consiliis, sunt & sua tempora rebus.
7. Sors ita nos damnis superincumbētibus vrget,
 Ut vix acta scias, nemo prænoscat agenda,
8. Quin etiam irati fluctus componere ponti,
 Luctantēque euros falcēque retundere mortis
 Non opis est nostræ; lex illa adamante notatur,
 Nec scelus auctorem merito tutabitur ictu,
 Aut dominū impietas sua plurima proteget olim:
 Fatalis nomen simul vrna citauerit, horam
 Est differre nefas, seu ceras ordine longo
 Fumosas patrum ostentes, & stemmata multo
 Nigra situ, seu stirpem obscuram inglorius imâ
 Fæce trahas, cum ferro aurum, cum vomere sce-
 ptrum
- Tartarei fert cymba senis, discrimine nullo:
 Sic quo fonte salus hauriri creditur, inde
 Deriuata lues, & spem laruata fefellit
 Prosperitas, lusitque alio fortuna rotatu.

9. *Omnia hæc consideravi, & dedi cor meum in cunctis operibus quæ fiunt sub sole.*

10. *Interdum dominatur homo homini in malum suum.*

11. *Etenim quia non profertur citò contra malos sententia, absque timore ullo filij hominum perpetrant mala.*

12. *Attamen peccator ex eo quòd centies facit malum, & per patientiam sustentatur, ego cognovi quòd erit bonum timentibus Deum, qui verentur faciem eius.*

9. Vidi ego, prohi pudor! ut dirâ feritate tyrannus
Nocte satus, germénque erebi, haud indigna parentum

Progenies, tamen optatâ cum pace superstes,
Lance triumphatâ iuris, post fata quiescat,
Venturis faciens famam increbrescere seclis:

Inque sinu dëcoris positum Dea læta per ora
Circumfert populi, serisque nepotibus olim
Posteritas canet, & mortis secura vetustas;
Non secus, ac si iura super communia crimen
Sublimem extulerit, nihil & nisi corpus adëptum
Perdiderit, sed restet honos, & posthuma fama:

10. Interea iusti, scelerum genus omne perosi,
Et bene de cunctis, linguâque, manûque merentes
Putrescunt mutæ sub iniquo pondere terræ,
Atq; vno cödunt noménque, & mēbra sepulchro:
Nil adeo ex cunctis, (quanti quantive fuerunt)
Post superest, pereunt spe cassi, & laudis inanes:

11. Et quia non subito vindex sententia fontem
Castigat, summâque scelus radice reuellit,
Vel modicâ attingit pœnâ graviora merentem,
Impunita lues serpit, sensimque per orbem
Grassatur, noua semper homo superaddit inultus
Crimina criminibus; nullâ quia vindice pœnâ
Incastigatos nimis exorabile numen
Permisit toties vitiorum in lubrica lapsus.

12. Sed quâquâ crimē geminet sceleratus in horas,
Et velut aggeribus gurgēs se effundat apertis,
Seruatur pœnis, iræque in certa futuræ
Tempora differtur, prauorū quidquid vbique est;
At merces æterna manet, quem numinis vrget
Vsque timor, nusquam sacris excessus honesti
Finibus: idcirco non languidus ardua cepta

13. *Non sit bonum impio, nec prolongentur dies eius, sed quasi umbra transeant qui non timent faciem Domini.*

14. *Est & alia vanitas, quæ fit super terram; sunt iusti, quibus mala proveniunt, quasi opera egerint impiorum; & sunt impij, qui ita securi sunt, quasi iustorum facta habeant: sed & hoc vanissimum iudico.*

Chald. Cost. *Est vanitas quæ pridem constituta est, iusti scilicet, quibus perinde atque sese (sicut impiis usu venire solet) omnibus sceleribus polluisent, pessimè euenit. Sunt verò & impij, quibus non agitur, atque si iustorum more bene egerint.*

Ingentēſque animos pone, & ſublimia vota :
 Stat meritis æternus honos, & didita cœlo
 Gloria, & in ſeros decus immortale nepotes.
 13. Diſſimilis cūm vita fuit, diſpârque nocentis
 Exitus, interualla brevis mox finiet æui,
 Cūm leuia intendat, leuis euaneſcet vt vmbra;
 Captatôrque auræ, ſibi debita præmia ſumet;
 Sed Deus immunē ſcleris, mentēque manūque
 Aſpiciet fœlix, ſeniūque in dona rependet.
 Hinc animi ſurgunt, & condimenta malorum
 Dulcia, & oppreſſos blando ſpes vberē lactat.
 14. Nec minūſ id durum eſt, alieni pœna reatus
 Iuſtis ſæpe venit; iuſtorum & præmia prauis:
 Contemplator, vt mala, quæ debentur iniquis,
 Nullo iure luunt, alienaque crimina iuſti,
 Caſibus exhausti immeritis, atque omnium egeni,
 Sint licet his caſti mores, & candida corda;
 At votum ſuper omne, bonis & honoribus aucti
 Ceruicem tollunt, & inani ſorte triumphant
 Tot ſclerum artifices, & digni turpibus auſis
 Mille necis facies conſumere, nomina mille:
 Munera non meritū, nō culpam pœna ſequuntur,
 Nec ſua ſors vlli eſt: quis id inficietur acerbum?
 Cur ſtirps vna virūm, vaſti non vltima mundi
 Portio, non opere in tanto laus vltima ſummi
 Artificis, curatum aliquā non parte paternam
 Auctoris mentem inſedit? ſed læua ſuperbo
 Impietas vultu, & populi delata ſecundis
 Flatibus exultat, trabeas & ſanguinis oſtro
 Purpurat: & primi plauſus impunē patrati
 Plagitiſ, ſunt cauſa noui; ſupremaque tandem
 Intrepidum his gradibus ſcelus ad ſaſtigia fertur:
 Sub leges ſtellata vocas qui caſtra polorum,

15. Laudavi igitur letitiam, quòd non esset homini bonum sub sole, nisi quòd comederet, & biberet, atque gauderet, & hoc solum secum auferret de labore suo, in diebus vitæ suæ, quos dedit ei Deus sub sole.

16. Et apposui cor meum, ut scirem sapientiam, & intelligerem distentionem, quæ versatur in terra: est homo, qui diebus, & noctibus somnum non capit oculis.

17. Et intellexi quòd omnium operum Dei nullam possit homo inuenire rationem, eorum quæ fiunt sub sole; & quanto plus laboraueris ad querendam, tanto minùs inueniat: etiamsi dixerit sapiens se nosse, non poterit reperire.

Aspicis hæc ? quos emeritum decus asserit astris,
Heroas cecidisse, atque inter pocula carmen
Bacchantum fieri, & stultæ ludibria plebis :
Hoc nostri securus agis ? si martius horror
Ingruat, & totum fors lubrica verterit orbem ;
Clades prima ferit iustos, primoque nouerca
Turbine percellit ; iustus prima hostia lethi est.
15. Mentis inoffensæ tum tempestiua probaui
Gaudia lætitiæque dies, explere diurno
Pane famem vinoque sitim, licitisque leuare
Deliciis curas, merces hæc sola laborum est.
16. Moxque voluptates, & vana facessere iussi
Gaudia, sed totus sophiam conuersus in vnam,
Solerti studio, vigilique indagine nosse
Et volui & cœpi, tantos quæ causa labores
Accendat, quid avarus homo noctesque diesque
Multa gemat, curis excarnificatus acerbis :
Nec modò, aut requies, quasi sol immobilis hæres
Assiduâ vigiles inflammet lampade curas,
Insomnes versat turbato pectore motus.
Ingemit, & gaudet, speratque timetque vicissim,
Et miserum non vnus agit furor ; at noua semper
Intus tempestas surgit, quæ turbine cæco
Attollit modò sublimem, modò in ima retorquet.
17. Tum sensi non posse capi secreta tonantis
Facta, sed illudi plura indagare parantem
Et sua diuinas dimensum ad brachia vires,
Nâque vltra penetrare hominî ratione negatû est,
Quantò anceps plures operosâ indagine curas
Collocat, ille minùs tantò quæsitâ reportat.
Auribus hæc, oculisque nefas vulgare profanis,
Dixerit & sophiæ qui conscendisse cacumen
Repet humi vecors, & sede iacebit in ima.

CAPVT NONVM.

Argumentum.

Pergit recensere Salomon varios rerum humanarum euentus, in quorum consideratione recurrere oportet ad Dei manum, & potentiã, quã cuncta gubernantur, & ad scientiam, quã commoda, & nobis vtilia prouidentur: Nostrum autem esse, de diuina bonitate spe conceptã, honestæ iucunditati, bonis operibus, vt sanctæ sapientiæ, sedulo incumbere.

1. Omnia hac tractaui in corde meo, vt curiosè intelligerem: sunt iusti, & sapientes, & opera eorum in manu Dei, & tamen nescit homo, utrum amore, an odio dignus sit.

2. Sed omnia in futurum seruantur incerta, eo quod vniuersa a quẽ eueniant iusto & impio, bono & malo, mundo & immundo, immolanti victimas, & sacrificia contemnenti: sicut bonus, sic & peccator: vt periurus, ita & ille qui verum deierat.

3. Hoc est pessimum inter omnia, qua sub sole fiunt, quia eadem cunctis eueniunt: vnde & corda filiorum hominum implentur malitia, & contemptu in vita sua. & post hac ad inferos deducuntur.

4. Nemo est, qui semper viuat, & qui huius rei habeat fiduciam.

CAPVT NONVM.

I. **A**LTERNANTEM animum nunc has nunc
sedulus illas

Diuisi in partes, didiciſque quòd acta proborum,
Prudentum quòd dicta, Deo moderante, regantur.

Stultus homo interea (quanta eſt caligo futuri !)

Odit amat; pretiumque ſui non nouit amoris,

Aut odij : 2. Incerto nutant discrimine ſortes,

Quò lex quemque vocet fatorum immota, ſeueri

Vrñaque quæſitoris : an irremeabilis orci

In baratrum ſidat ſclerum graue pondus : in altũ

An ſuperũ fauor attollat virtute redemptus

Lustratas animas : nullo discrimine prauus

Confuſus ſine lege bono, iuſtũſque maligno eſt :

Uſque adeo humanis inſedit mentibus error !

Quiſque perit, ſeu thuriferis altaria ſpargit

Muneribus, ſeu ſacrilego pia numina faſtu

Deſpicit, eſt eadem cunctis ſors dicta ſepulchri.

3. Grande malum eſt, ſimili quod ineluctabile fatũ

Lege premat cunctos, prauĩque bonĩq; ſequaces :

Inde lues, fons inde mali, nam firma tenaci

Durities in corde riget, mentẽmque malignũs

Ad ſclera obfirmat, mox deſcenſurus ad vmbras

Ignotũſque ſuis, ignorandũſque futuris,

Hactenus vnde pedẽ reuocare haud contigit vlli.

4. Cuique ſuæ data meta viæ: ſperare ſenectam

Quiſque poteſt, nemo æternæ rata tempora vitæ;

Naſcenti calcanda ſemel via publica lethi,

Fata Dei nam ſtant immota, & ferreus ordo.

Lumina tot periire virũ, tótq; agmina gentiũ,

5. *Melior est canis viuus leone mortuo. viuentes enim sciunt se esse morituros: mortui verò nihil nouerunt amplius, nec habent ultra mercedem, quia obliuioni tradita est memoria eorum.*

Arab. Interpr. Bryling. *Quia viuentes cognoscunt quòd morientur: & mortui non sunt cognoscetes quicquam, & non est eis ultra merces, quia obliuioni tradita est memoria eorum.*

Bryling. *Quoniam canis viuens ipse bonus super leonem mortuum.*

Syriac. *Quia canis, qui est viuus, melior est leone, qui est cadens.*

Et capita alta ducum, regnatorésque superbi;
 Diísque ípsis inter genitos, quos fabula finxit,
 Heroum generosæ animæ, vix peruia sorti
 Pectora, cœlicolũm non decedentia factis:
 Necnon & iuuenes, primætuæ robora pubis,
 Concessere neci, quo tempore & ordine fixa
 Exciuit series quemque, atque immobile fatum:
 Cuique dies numerata, nec vltra tendere fas est.
 5. Vita neci præstat, potiórque leone perempto
 Qui viuit latrátque canis: commune tributum
 Debitor exfoluet, qui spirat: nam sua quemque
 Fata vocant, & mors nusquam vitabilis vlli.
 Victrices lauros funesta cupressus inumbrat:
 Contemplator auos; hic sponte immiscuit astris
 Exultantem animam; hunc lógis maioribus ortũ,
 Quem clara de stirpe tulit mirata vetustas,
 Lethiferis suprema dies tamen addidit vmbri.
 Cerne quot ediderunt heroas sæcula prisca,
 Aspice, quot doctas animas Heliconis alumnas;
 Omnia complexas animo monimenta sub vno,
 Inuidère solo superi, cœlóque locarunt.
 Ille perit, quem nulla vnquam discedere iusto
 Gratia, nulla precum vis importuna subegit.
 Vrbes intuior, periere, orbíque ruinam,
 Et sparsam vacua ostentant per compita mortem;
 Et nunquam reditura, vale vale omnia dicunt:
 Credo equidem aspiciens, duces suspiria ab alto,
 Optabísque sequi, iam solus ab agmine magno
 Diuulsus, dulci & comitum frustratus amore.
 At contrà fugitiua dies obliuia factis
 Inducit; rerum, nobis quæcumque geruntur,
 Vix leuis ad seros descendet fama nepotes;
 Tu nil crede tuum, vitámq; & fata quod vltra est.

6. Amor quoque, & odium, & inuidia simul perierunt; nec habent partem in hoc seculo, & in opere, quod sub sole geritur.

7. Vade ergo, & comede in letitia panem tuum, & bibe cum gaudio vinum tuum: quia Deo placent opera tua.

8. Omni tempore sint vestimenta tua candida, & oleum de capite tuo non deficiat.

9. Perfrüere vita cum uxore, quam diligis, cunctis diebus vita instabilitatis tue, qui dati sunt tibi sub sole, omni tempore vanitatis tue: hæc est enim pars in vita, & in labore tuo, quo laborat sub sole.

10. Quodcumque facere potest manus tua, instanter operare, quia nec opus, nec ratio, nec sapientia, nec scientia erunt apud inferos quò tu properas.

11. Verti me ad aliud, & vidi sub sole, nec velocium esse cursum, nec fortium bellum, nec sapientium panem, nec doctorum diuitias, nec artificum gratiam, sed tempus, casumque in omnibus.

12. Nescit homo finem suum: sed sicut pisces capiuntur hama, & sicut aues laqueo comprehenduntur: sic capiuntur homines in tempore malo, cum eis extemplò superuenit.

6. Cessat amor, cessatque odium, liuorque recedit,
Cœpit ubi iam iamque obito frigescere corpus
Funere, fors nec enim vitæ super vlla peractæ est.
7. Ergo age, mœstitiâ positâ, vultuque sereno
Lætus pane famem depelle, sitinque falerno,
Et foelix pulsus agita noua gaudia curis:
Namque tibi cœli ex nutu suspensa voluntas
Omnis, eò totis contendere viribus ambit,
Vt placeant tua facta Deo: 8. Te splendida vestis
Induat, & suauimadeant tua tempora nardo:
9. Lætos carpe dies lætâ cum compare foelix,
Quippe thori Deus est auspex, tædâmq; iugalem
Accendit, tecum vt, quod sit super, exigat æuum,
Funditus ex imo dolor & sepectore migret:
10. Nec tere tēpus iners; manus impendēda labori
Fortis & assidua: indoctas nam parta sub vmbra
Non ratio, aut opus, aut doctrina sequentur euntē,
Omnia mobilibus fati cessere triumphis,
Et super elapsæ sunt alta obliuia vitæ.
11. Parte alia pedibus celeres, validosque lacertis,
Viribus & crudos, fusos certamine vidi.
Tristis in angusto sapiens ieiunia tecto
Longa leuat lacrymis, doctor stipis æra reposcit,
Cuncta putes ferri dubio mortalia casu,
Haud secus ac humana nihil si rector olympi
Dirigat, ipse auctor rerum & suprema potestas.
12. Incautos pisces vt fallit arundine longâ
Piscator, dum littoreas demittit in vndas
Fila sedēs scopulo, atque hamos tenet esca latētes,
Olli concurrunt auidi, rapiuntque voraci
Ore cibos, sed mox captiui fila sequuntur;
Aut veluti alitibus si retia quando tetendit
Pastor agens, volucris correpta sequacibus hæret

13. Hanc quoque sub sole vidi sapientiam, & probavi maximam.

14. Ciuitas parua, & pauci in ea viri: venit contra eam rex magnus, & vallauit eam, extruxitque munitiones per gyrum, & perfecta est obsidio.

15. Inuentusque est in ea vir pauper, & sapiens, & liberauit urbem per sapientiam suam, & nullus deinceps recordatus hominis illius pauperis.

16. Et dicebam ego, meliorem esse sapientiam fortitudine: quomodo ergo sapientia pauperis contempta est, & verba eius non sunt audita?

17. Verba sapientium audiuntur in silentio, plusquam clamor principis inter stultos.

18. Meliore est sapientia, quam arma bellica: & qui in vno peccauerit, multa bona perdet.

Nexibus, & pastor toto instans corpore suprà est;
Sic mortis pellace cadit deceptus ab hamo,
Linea quem vitæ fallit, quem blandus inescat
Et cibus, & suavi aucupio cooperta voluptas,
Nemo non moritur, premiturque à funere funus.
13. Haud equidem inuenies, si sublunaria penses
Aut humana, quod huic possis cōponere quidquā;
14. Vrbs angusta fuit, nō muro aut turre frequēti
Ardua, fossarūve morā, aut munimine valli,
Aggere nō multo, haud validis populosa colonis;
Rex mira virtute valens, & viribus audax,
Obsessos cingit numerofo milite muros,
Et circumfusas alta in tentoria moles
Tollit, vt arma armis, & mœnia mœnibus obster;
15. Fortè hīc inuentus sub egeno pauper amictu,
Ingenium cœleste tegens, qui corde sagaci
Obsidione leuat, relisque prementibus urbem;
Verū assertori, libertatisque datori
Nō honor, aut merces, sed prima remāsit egestas.
16. Protinus hæc mecū; quid sordet puluere virtus,
Tabescitque inter proprios industria ciues?
17. Non pretiū in voce est, & docta silētia præstant
Murinure, pascūt illa animos, hoc verberat aures.
Rex diu inauditus clamat, qui Stentora vincit
Gutturē; sed tacito dum conticet ore, profatur
Vir sapiens, altūque tonat; 18. prudentia præstat
Quā bis quinque duces opibūsq; mansq; potētes:
Nāmq; animis maturus homo, seseque suōsque
Proteget, hostiles eludet callidus artes
Artibus, & fraudem maiori fraude repellet;
At propriā ruet arte, suoque peribit ab ipse
Demens consilio, & stulto temerarius ausu
In tumulos vertet, mactatis ciuibz, vrbes.

CAPVT DECIMVM.

Argumentum.

Perstat in sapientiæ laude, & stultitiæ detestatione, atque vario vtriusque discrimine impugnat vanitatem ambitionum hominum, quæ non rarò in ipsis publicis honoribus, & potestatibus inuenitur; docetque interim non detrahendum magistratibus, neque repugnandum.

1. *Musca morientes perdunt suauitatem unguenti: pretiosior est sapientia, & gloria, parua & ad tempus stultitiâ.*

2. *Cor sapientis in dextera eius, & cor stulti in sinistra illius.*

3. *Sed & in via stultus ambulans, cum ipse insipiens sit, omnes stultos æstimat.*

4. *Si spiritus potestatem habentis ascenderit super te, locum tuum ne dimiseris, quia curatio faciet cessare peccata maxima.*

5. *Est malum, quod vidi sub sole, quasi per errorem egrediens, à facie principis.*

6. *Positum stultum in dignitate sublimi, & diuites sedere deorsum.*

7. *Vidi seruos in equis, & principes ambulantes super terram quasi seruos.*

CAPVT DECIMVM.

1. **D**Vm captiua croci retinetur in vngvine musca,

Atque in odorifero tumulto, testâque superbâ
Nectaris occumbit, pretiosâque funera ducit,
Tum sua laus perit vngueto speciesque, nec vllis
Vfibus aut recreat nares aut vulnera curat.

Sic nota flagitij, næuûsque, ac criminis vmbra,
Et muscâ, licet exiles formetur in artus,
Culpa minor, totum fœdat virtutis odorem,
Et facit æternis nomen putrescere sæclis;
Antiquos titulos & nomina prima requires:

2. Ac veluti incumbit subeundo dextra labori
Aptior, haud aliter sapiens operosa ministrat
Tempore quæque suo, & dextro facit alite cûcta:
Ad læuam cor stultus habet, laterique sinistro
Mens residet læua, & nullis accommoda rebus.

3. Corporis infano nosces libramine stultum;
Nam gradus internæ damnat deliria mentis:

4. Si formidandæ grauè spiritus infremat iræ,
Et princeps tibi bile tumens crudele minetur
Exitium, statione datâ sta firmus, & ira

Concidet, & mortem mors expectata repellet;
Obsequio absistit rigor, obsequioque resurgit

Lapsus amor; 5. sed grâde malû est, & deuius error
Principis; 6. insultat victrix insania, fortis

Ad celsam prouecta rotam, tenet infima virtus.

7. Sublimes in equis vidi per compita seruos
Currere, sed contrâ seruilia fata ferentes

Moliri insuetis proceres vestigia plantis:

8. Qui fodit foveam , incidet in eam :
& qui dissipat sepem , mordebit eum coluber.

9. Qui transfert lapides , affligetur in eis ,
qui scindit ligna , vulnerabitur ab eis ?

10. Si retusum fuerit ferrum , & hoc non
ut prius , sed hebetatum fuerit , multo labore exacuetur , & post industriam sequitur sapientia.

Quis

Quis furor, indignis manibus mandare secures?
 Cæsaque terga flagris, trabeis decorare superbis?
 Sustinet hoc fortuna nefas secunda pudoris!

Signa potestatis tantæ, & vestigia regni
 Protinus his impressa, oculis mirantibus hausi,
 Atque animo indignante: pudet contra vrbe vagari
 Semineces, lentosque pigrum per cõpita gressum
 Ferre magistratus: tumulis reptare reclusis
 Corpora, pallentisque putes volitare figuras.

8. In foueam nutante pedum molimine fossor
 Incidet, auctorem prius ipse vorabit hiatus:
 Atque vbi latrones hortorum septa reuellunt,
 Vindicat ingressu coluber; 9. qui moribus vrbis
 Subducit lapides, hunc machina sæpe dehiscens
 Sternit: in artificem sceleris, sua poena recurrit.

Dura lacertofo qui ligna tenacia findit
 Robore, delusis crebro secat ictibus auras
 Irritus, inque caput reditura securis aberrat;
 Aut quod iam scissum est, scindentis in ora resultat;
 Sic quisquis leges, & propugnacula iuris
 Septa æqui, Themidisque domum, & prætoria sacri
 Iudicii temerè euertit, tabulasque refigit,
 Communi exitio patriam, latæque ruinâ
 Obruit ipse suâ perimendus clade penates.

10. Attere, si sit hebes ferrum; per longa securis
 Otia supplicium ipsa sibi, rubigine tandem
 Carpitur, hanc multâ nigram si sorde, sui que
 Dissimilem tentes antiquæ reddere formæ,
 Restituet labor impensus, primâque nitentem
 Luce redonabit; sic & rubigine pulsâ
 Improbis exacue ingenium, sudoris & imbre
 Ignauam irrorata cotem, tum luce renatâ
 Restituet labor obtusum repetitus acumen;

II. *Si mordeat serpens in silentio, nihil eo minus habet, qui occultè detrahit.*

Septuag. *Si momorderit serpens in susurro, non in murmure.*

Chald. Complut. *Sicut immittuntur serpentes igniti, ut vexent & noceant saculo, & sic non erit amplius verè, qui accusator est & susurro.*

12. *Verba oris sapientis grata, & labia insipientis precipitabunt eum.*

13. *Initium verborum eius stultitia, & novissimum oris illius error pessimus.*

Præuia ni dubiam sapientia dirigit artem,
 Ars opus incipiet non impositura coronam :
 At nihil ambarum iunctis nisi viribus exit
 In lucem hanc, operumque fides communia poscit
 Fœdera, concordī torquenturque omnia ducta.
 11. Si quem fortē vagus per devia rura viator
 Pressit humi colubrū, bifidæ mœx cuspide linguæ
 Insinuat totos virus lethale per artus,
 Tum verò fuscari ora, & caligine mergi
 Lumina, & vrgenti torqueri viscera peste;
 Humanæ sua sunt fatalia toxica linguæ :
 Vipereos dentes, sociorum in sanguine passim
 Figere amat, fratrisque fibras cognatæque pasci
 Viscera, & arrosū verbis deglubere nomen :
 In manibus linguæ, diuorum æterna potestas
 Fatidicam posuere colum, nunc stamina scindit,
 Nunc fila agglomerat; nunc laxa sequacia vocæ,
 Auritæque trahit quercus, inflectere cantu
 Docta tigres; at si vesana resoluerit ora,
 Halitus exitio est, & pestibus inficit auras,
 Multiplicat cades, atque vno funerat ictu
 Immensos latè populos; tellure repositos,
 Quos tenet alta quies, manes furiata laceffit,
 Intentatque nouum functis post funera fatum :
 Quæ reptante prius conuicia nata susurro
 Vix steterant, prono assensu & popularibus auris
 Per mensas excepta volant, cætum ora resolvunt,
 Heroum generosæ animæ, tot fortia bello
 Pectora, quos virtus supra contagia plebis
 Erigit, occumbunt funestæ victima linguæ.
 12. Cū sapiens loquitur, proprio velut ore profatur
 Gratia, sed stultos effræna libido loquendi
 Præcipitat : 13. primasque loquax vesania voces
 E ij

14. *Stultus verba multiplicat. ignorat homo, quid ante se fuerit: & quid post se futurum sit, quis ei poterit indicare?*

15. *Labor stultorum affliget eos qui nesciunt in urbem pergere.*

16. *Vae tibi terra, cuius Rex puer est, & cuius Principes mane comedunt.*

17. *Beata terra, cuius Rex nobilis est, & cuius Principes vescuntur in tempore suo, ad reficiendum, & non ad luxuriam.*

18. *In pigritiis, humiliabitur contignatio, & in infirmitate manuum perstillabit domus.*

Venet. Interpr. Propter pigritiam hominis laxatur contignatio, & propter remissionem manuum domus stillationi exponitur.

Inchoat, extremas conclûdit pessimus error :
 Culpâque proloquitur dictis, & culpa perorat,
 14. Dum tales geminat dementia garrula voces;
 Quæ proauitulerint, venturi quæve nepotes
 Fata ferent, ignorat homo; num fortè sepulto
 Nuntius accedet, quâ palleſcente recessu
 Claudit inaccessas, viuſ domus inuia; inanes?
 15. Si te quæſitam non cognita ducit ad urbem
 Semita, diuerſos nequicquam erraticus agros
 Deluſâ relegis plantâ, metâmque fugacem
 Dum ſequeris, metâq; magis properando recedis;
 Haud aliter demens à recto tramite cœli
 Deuius, huc illuc fruſtra feſtinus anhelat,
 Anfractus ſuperat varios, atque orbibus orbes
 Impedit, incerto torquens veſtigia calle :
 16. Ah miſeranda nimis tellus, rationis egente
 Quæ puero regeris! proceres ad munia lenti,
 Credita iura fori, media inter pocula reddunt
 Officij immemores, pueros queis mane recludens
 Sol radios, lançes, pateras, cyathosque deaurat
 Miſſilibus primis : 17. nimis ô prouincia fœlix,
 Cui genere inſignis, plenſ rex imperat annis,
 In quâ fixa ſuo conuiuia tempore patres
 Inſtituunt, menſiſque ad debita penſa relictis
 Excedunt, 18. gnari corrupta putredine tigna
 Sidere, & imbricibus ruptis tabulatâ labare.
 Aſpiciſ vt quondam inuidioſa cacumina cœlo;
 Pendula iam, riinis hinc inde patentibus, imbri
 Dant triſtes aditus, ventisque cubilia præbent?
 Deſertos vrtica lares, & carduus hoſpes
 Incolit; hiſ cornix, hiſ noctua, miluus, & omnes
 Cum ſocia legione ſtriges ſtabulantur in aulis,
 Rex vbi magnifico nuper dormiuit in auro :

19. *In risu faciunt panem, & vinum, ut epulentur viuentes: & pecunia obediunt omnia.*

20. *In cogitatione tua Regi ne detrahas, & in secreto cubiculi tui ne maledixeris divitiis: quia & aves cœli portabunt vocem tuam, & qui habet pennas, annuntiabit sententiam.*

CAPVT VNDECIMVM.

Argumentum.

Salomon suadet beneficentiam, atque beneficentiz, & bonorum operum assiduitatem, ex fiducia in Dei providentiam, ex mortis memoria, ex vitæ florentis vanitate, ex præmio, aut supplicio futuro.

1. *Mitte panem tuum super transeuntes aquas, quia post tempora multa invenes illum.*

2. *Da partem septem, necnon & octo: quia ignoras quid futurum sit mali super terram.*

Vnde mali tanti labes? luxúſne vorator
 Largus opum, ſociique comes ſocordia luxus?
 Sic eſt, pigra quies atque otia languida tandem
 Funereas clades, & víx à Marte timendas
 Important; & Atlas, regni qui ſuſtinet orbem,
 Deſidiæ ſi carpit amor, ſine cuſpidis iſtu
 Corruet, inuoluétque ſuà regnum omne ruinâ.
 19. Scurra iocis Regem reficit, corpúſque ſaginâ,
 Et vendit caros, menſæ pinguedine, riſus.
 Auri proh nimium valet infinita poteſtas!
 20. Nec tu propterea furtiuo corde ſuſurrans
 Regibus, aut inter tecti penetralia muſſans
 Et timidè ad comites verba intermiſſa retentans
 Detrahe diuitibus, nam ſepta domeſtica purgans
 Excipit has voces aurito flamine ventus:
 Has pipit paſſer, gallina gracillat, hirundo
 Trinſat, cucurrit gallus, queritúrque columba,
 Garrula ad offenſas auis omnis nuntiat aures.

CAPVT VNDECIMVM.

1. **T**V veræ piétatis amans, vt in æquor, egenis
 Funde, redúdâti mage largus flumine, panẽ;
 Nulli clauſa manus fluuios excedat Iberos
 Aurea dona vomens; populíſque vndare penates
 Cernere ſit, miſeros intrare, redire beatos,
 Vt nemo ingreditur ſiccis maria humida plantis:
 Non tamen exhaustis rareſces ſiccus ab vndis,
 Sed pleno in fonté reſſuet liquor omnis ab alueo,
 Et Phœbo redeunte, tibi collata redibunt,
 Atque daris maiora, neque indigus ære carebis,
 Quod dederis: 2. ſed opum partem largire tuarum

3. Si repleta fuerunt nubes, imbrem super terram effundent: si ceciderit lignum ad austrum, aut ad aquilonem, in quocumque loco ceciderit, ibi erit.

4. Qui observat ventum, non seminat, & qui considerat nubes, nunquam metet.

5. Quomodo ignoras, quæ sit via spiritus, & quæ ratione compingantur ossa in ventre pregnantis; sic nescis opera Dei, qui fabricator est omnium.

6. Mane semina semen tuum, & vespere ne cesset manus tua; quia nescis quod magis oriatur, hoc aut illud; & si utrumque simul melius est.

7. Dulce lumen, & delectabile oculis videre solem.

Syriac. Interpr. Lux est dulcis, & bona oculis, ut consideret solem cum ipsa.

Septimam & octauâ: nam quâ tibi nube nigrescat
Proxima lux, nescis: 3. sic nubem imitare tumentē,
Quæ bibulo stillans interluit arua liquore.

Seu, planta ad Boream, siue inclinata sub austrū
Conciderit, firmis veluti radicibus hæret,
Cladēq; fixa suâ est; homines sic morte sua stant.

4. Flamina ventorū dū quis speculatur, & imbres
Credulus explorat, cultæ non debita mandat

Semina telluri, vel qui vaga nubila visu
Consequitur, nunquam farris cumulabit æceruōs.

5. Vt rudis ignoras, cur perpluat imbrifer auras.

Africus, & rigido marmor glaciale metallo

Induret Boreas, cur roscida vernet, in ortu
Pleiadum, tellus, cælum & prius omne serenum

In nebulas latè denset nimbosus Orion:

Prægnanti veluti nescis coalescat vt aluo

Membrorum series, carni cutis, ossibus artus;

Digerat vt partes, induret vt ossa, liquetque

Sanguinem, & infirmos neruis corroboret artus:

Nexilibus, vitæ & tandem spiracula fundat

Conditor ille potens hominum, rerūque rector;

Sic miranda tibi, nullique imitanda Tonantis

Consilia, humanos super assurgentia captus.

6. Dum iubar exoritur, cum sole ordire laborem

Impiger, & dubiâ dum luce crepuscula prima

Emicuere, manus operi præcinge diurno:

Lumina dum claudet vesper, ne claude laborem,

Urge opus interea, noctemque adiunge dici,

Post matutinos vespertinosque labores,

Quod tempus meliore micet sub sydere, nescis,

Seu nox siue dies, tenebrisque operitur vtrumque.

7. Gratum oculis lumen, phœbeos cernere vultus:

Dulce sapit: ceruos medicaminis edocet artem.

8. Si annis multis vixerit homo, & in his omnibus letatus fuerit, meminisse debet tenebrosi temporis, & dierum multorum, qui cum venerint, vanitatis arguentur præterita.

9. Latere ergo iuuenis in adolescentia tua, & in bono sit cor tuum in diebus iuventutis tue, & ambula in viis cordis tui, & in intuitu oculorum tuorum: & scito, quod pro omnibus his adducet te Deus in iudicium.

10. Aufert iram à corde tuo, & amoue malitiam à carne tua: adolescentia enim, & voluptas vana sunt.

Syriac. Interpr. Transire fac furorem à corde tuo, distare facias malum à carne tua.

Lucis amor, fugitiuo hærent dum spicula dorso;
 Erudit & vitale caput seruare colubros
 Corporis obiectu, & viso vim duplicat hoste:
 Ipse homo cœlicolis suppar, si fata minentur,
 Igne finit, ferroque artus in frustra secari.

Quin etiam, pueri pro cunis, sedula nutrix
 Sollicitat diuos, Pyliique & Nestoris annos
 Postulat, & supplex votiua libat acerrâ,
 Vita tamé fugitiua volat, brevis ambitus æui est,

8. I, metire dies, & crudæ fila senectæ,
 Quâ loquor hora fluit, vix syllaba nata solutis
 Carpitur è labris: multos longæuus in annos
 Delicias longo qui felix hauserit vsu,
 Exiguæ mala longa moræ, vitamque fugacem
 Cogitet, vt rapidis fuerint data pabula ventis
 Gaudia, temporibus nunquam reuocanda futuris:
 Fatorumque memor, quot cassus luce per annos
 Ipse iacebit humi data vermibus esca, reuoluat;
 Ante pererratis quàm cursibus vltima Phœbus
 Explerit spatia, & cœlum reuolubile sistat.

9. Perge ergo, & felix innoxia gaudia carpe,
 Dum licet, & turgent vernanti sanguine venæ:
 Præstiterit cupidis, quidquid spectabile passim est,
 Vsurpare oculis, atque, vt sit plena voluptas
 Delicias expletum animum duxisse per omnes:

Tu memor vsque tamen, posthac librandâ seuerò
 Iudicio, quæcumque facis; cum luce supremâ
 Cœperit altisonans dare signa nouissima clangor.

10. Disce iram regere, & frænare libidinis æstus
 Præcipientes; non quòd placeat fecisse iuuentæ,
 Sed quid opus factò, rerumque quid exigit vsus,
 Sedutus explora: nam nomina mille nocendi
 Vnâ iuuenta trahit, quæ ni compescat honesti

Arab. Interpr. *Spolia malitiâ humanitatem tuam. Abducito malignitatem.* Complet. *Irreprehensibilis in aspectu oculorum tuorum.* Ambr.

CAPVT VLTIMVM.

Argumentum.

Domesticorum antè actæ vitæ malorum, præmaturi senij, & aliarum ex ingluvie, & intemperante libidine ægritudinum experienciâ edoctus Salomon, præcipit adolescenti, assiduam Dei creatoris memoriam; nihilque, quod facto opus est, differri oportere ad extremum vel senectutis, vel mortis tempus: tandem, quæ dixit, vnico Dei timore comprehendit.

1. *Memento creatoris tui in diebus iuuentutis tuæ, antequam veniat tempus afflictionis, & appropinquent anni de quibus dicas: non mihi placent.*

2. *Antequam tenebrescat sol, & lumen, & luna, & stelle, ut reuertantur nubes post pluuiam.*

Purus amor, nisi duratum patientia corpus
 Roboret, ut rigidus possit tolerare labores;
 Ni pectus firmet patientia, ut ardua cœpta
 Ingentésque sequare ausus, & grandia vota;
 Ni doceat menti ingenitos excindere motus
 Vna gubernandæ rectrix sapientia vitæ;
 Discrimen generis perit, & rationis egentem
 In pecudem mutatus abit, quicumque furoris
 Fluctibus abreptus, nil non pro lege tuetur,
 Quod placitum est animis, genioque indulget &
 annis,
 Haúdque sibi imperium, & fasces transcribit ho-
 nestos;
 Sed faciem oblimat versæ ad sublimia mentis,
 Altáque spirantem lentanti pondere tardat.
 Incipe, si qua fides, mores ante omnia, vitámque
 In melius reuocare, aditusque repente malorum
 Obstruere, implorare Deum, & sperare fauentem:
 Nam cum deliciis fugit haúd reditura iuuentus.

CAPUT VLTIMUM.

1. **I**N primis venerare Deum, florente iuventâ
 Dum potes, ante tuam quàm mille incom-
 moda vitam
 Obsideant, quàm decrepito tibi tarda senectus
 Adrepat, morbusque sequax, & turba malorum
 Cætera, queis miseræ languet pars ultima vitæ:
 2. Antè senex oculo quàm caligante tueri,
 Quàm lux deficere astrorum, pallefcere Phœbus
 Incipiat, vel Luna hebeti nigrescere vultu,
 Et rerum obducatur species prænubilus aër.

3. Quando commovebuntur custodes domus, & nutabunt viri fortissimi, & otiose erunt molentes in minuto numero, & tenebrescent videntes per foramina.

4. Et claudent ostia in platea in humilitate vocis molentes, & consurgent ad vocem volucris, & obsurdescent omnes filia carminis.

5. Excelsa quoque timebunt, formidabunt in via, florebit amygdalus, impinguabitur locusta, & dissipabitur capparitis: quoniam ibit homo in domum eternitatis sue, & circuibunt in platea plangentes.

Arab. Interpr. Quia iam homo profectus est ad habitationem saculi sui.

Quæ tibi tum vives, oculis cum densior humor
 Confluet in nubes, vel restagnabit in imbrem
 Assiduum, & claro pro sole crepuscula cernes?

3. Costarum quando series tutata penates
 Pectoris internos, laxâ compage dehiscet:
 Cum posito imperio, cor princeps, aulicus hepar
 Purpureus, cordisque duo, splen, pulmo, ministri
 Deficient, pigrisque ruet custodibus aula;

Aut ubi rarefcent vacuo præsepia dente;
 Nudâque deformi maxilla educet hiatu
 Caluæ instar rictum: & captiua foramine nullo
 Pupula, vix tenues in sole videbit aperto

Scintillas. 4. dentisque sono gingiua negato,
 Sanguifico sensim defecta calore fatiscet:

Alitis ad cantum quando iam nocte peractâ,
 Nixibus inuitis lecto constricta tenaci

Membra gemens tolles: citharæ cû flebile carmên
 Auris inaccessæ disrupta audire negabunt

Tympana; cum voces mussabis ab ore, nec aure
 Accipies: 5. quando refugis ad culmina plantis

Æger anhelabis: primo cum calle viator
 Languidus hærebis: tenuem si fortè senili

Repseris in cliuum baculo, tum vertice summo
 Aut Pindi aut Tauri planta titubâte propinquum

Horrebis lapsum: velut albet amygdalus horto
 Candida, sic albâ canescent fronte capilli.

An flectes ad templa pedes, ad sydera palmas,
 Cum fugiet pondus minimæ gestare locustæ

Ægra manus? cum qui leuior saliente locustâ
 Prata pererrabas, vix internodia læsi

Inflectes femoris? vix capparitis vlla palato,
 Vix gelidis sapiet prurigo extincta medullis;

Tum de mus æternos habitanda locatur in annos

6. *Antequam rumpatur funiculus argenteus, & recurrat vitta aurea, & coneratur hydria super fontem, & confringatur rota super cisternam.*

7. *Et reuertatur pulvis in terram suam, unde erat, & spiritus redeat ad Deum, qui fecit illum.*

8. *Vanitas vanitatum, dixit Ecclesiastes, & omnia vanitas.*

Vltima, & alternas inuertere nescia sortes :
 Omnibus illa patet venientibus obuia, cuius
 Clausa regressuro, foribusque tenacibus arcet
 A reditu populos, immortalique serarum
 Mole catenatur, duroque in vecte laborat,
 Nec frangi meruens æterno adamante rigescit.
 Inde redux superas nequicquã euadere ad auras,
 Desertisque focos, notumque reuifere limen
 Credideris, nulla est lucis post fata fruendæ,
 Siue relictorum spes posthuma nulla bonorum ;
 Præfica tum tristem lacrymosis vocibus urbem
 Flebilis implebit, ferali & compita lessa.
 Sic tibi deliciis prior hæc sit cura, colendi
 Numinis integritas, & non violabile mentis
 Obsequiũ, 6. prius exhaustis quàm spina medullis,
 Quæ limbo dorsum mediisque interfecat artus,
 Haud aliter longo quàm chorda argentea ductu,
 Flectat humo grauidũ prono curuamine corpus,
 Vel quæ diuinum tanquam aurea theca, cerebrum
 Inuoluit, vinclis pereat membrana solutis :
 Vel fragilis lapsu, lapidoso fontis in ore
 Hydria fracta ruat, raptasque sororibus vndis
 Reddat aquas, versoque situ mutabilis axis
 Lympharũ solitos rota perfida deneget haustus.
 7. Ante etiam, terræ sibi quàm cognata reuifcat
 Viscera, vitali matris condendus in aluo
 Pulvis : & acceptæ repetens cunabula vitæ
 Spiritus, vno auctore Deo cœlestibus ortus
 Seminibus, sæpe exilium indignatus, Olympo
 Reddatur patrio, quem spe conscendit inani
 Fixus humi, cæcæque inter caligine merfus.
 8. Hoc quodcunque vides, species mēta decoris,
 Exclamat sapiens, rebisque absentibus ymbra :

9. *Cumque esset sapientissimus Ecclesiastes docuit, & enarravit, quæ fecerat, & inue-
stigans composuit parabolas multas.*

10. *Quæsiuit verba utilia, & conscripsit sermones rectissimos, & veritate plenissi-
mos.*

Quæ, niteat quamuis & suavi perlita fūco
 Deceptos ad vana trahat spectacula sensus,
 Vmbra tamen tantum est, & inanis ludit imago:
 Vanum, diua Themis, nomen, si dulcius omni
 Eloquio suadæ, præsentia dona perorant:
 In superos vana est pietas, quam falsa decorum
 Agmina dedecorant, sacrisque altaribus arcent;
 Spes vana est, dubiis si casibus omnia verti
 Credideris, Deus ac si celsa perambulet astra
 Securus, quæcumque humili sub sole geruntur:
 Vana fides, quæ fracta dolis: sapientia vana est,
 Quam vigili studio musis dilecta parit nox,
 Et redolet comites, quib' est prognata, tenebras.
 9. Sic Salomon, cœli interpretes, dulcisque furore
 Suetus hominū fugere, & mortales linquere terras,
 Se super assurgens, magni hæc vestigia præbet
 Ingenij; quodque ingenio præfertur & arti,
 Virtutis monimenta, & non delebile sacræ
 Indicium mentis: nam pectora & ora resoluens
 Plena Deo, crebris homines hortatibus instans
 Sollicitat, mentesque vrget, doctisque lacessit
 Alloquiis, sensum vt sacræ reuerentia legis
 Glisecat, & optatos formet virtutis in usus.
 10. Plura dedit præcepta, memor quæ tota sequatur
 Posteritas, scripsitque accommodata symbola rebus
 Ad populi captus, vt tandem aut luce renatâ
 Fundirus excutiant noctem, aut sublustris obortæ
 Scintillæ radius mediis intermicet umbris.
 Consulit in commune, & formatura nepotes,
 Quæ sibi longæuis usu collegit ab annis,
 Sacris ex adytis oracula plurima pandit,
 Vnde indocta cohors hominum, respōsa reportet
 Indubiis, stætque auctoris fundamine magno.

11. *Verba sapientum sicut Stimuli, & quasi clavi in altum defixi, quæ per magistrorum consilium data sunt à pastore vno.*

12. *His amplius fili mi ne requiras: faciendi plures libros nullus est finis, frequensque meditatio carnis afflictio est.*

13. *Finem loquendi pariter omnes audiamus; Deum time, & mandata eius observa: hoc est enim omnis homo.*

Iamque opus exegi, nulla quod nocte vetustas
Condiderit: quod dextra dedit, quod lingua profudit


Divinum est; alias docui quodcumq; vel Hybla,
Vel vario fecundus Eryx medicamine nutrit,
Excelsas Libani cedros, humilesque myricas,
Et salices cecini: hæc cedent in pabula ventis
Scripta, vel in tenues ibunt resoluta fauillas,
Sed nunc maiori mens enthea numine, sacrum
Condit opus, nullis posthac violabile seclis.

11. Sicut anhelantes rigido sub vomere tauros
Accelerare gradum cogunt admota coloni
Spicula; sic animos operoso in calle morantes
Acrius exstimulant sapientis acumina, & vrgent
Ad virtutis iter: clavisque profundius, hærent
Mentibus, in paruum si forte redacta volumen,
Prudentum ex monitis, pastore legantur ab vno.
Hæc tibi sufficiant, fili, nec plura require,
Ante oculos quæ cuique, meâ neq; voce monēda:
Librorum modus est nullus, multisque superbus
Scribendi pruritus inest, librisque libellus
Attrahit, his hominum mens altè infixâ terendis
Denique languescit, tantisque laboribus impar
Corpus hebet: 13. verbis aures aduerte, monebo
Quæ sit summa libri, & vitæ quæ norma regendæ:
Disce timere Deum, supremæque iussa Tonantis
Vsq; sequi: stat in hoc generis discrimen, & omnis
Humanæ rationis apex: sit cura proinde
Hæc tibi prima, Deū colere, attonitisque pauere
Sensibus; hunc, casus sicunde superuenit atrox,
Implorare vnum, molli cum membra grabato
Serò dabis, lecto cum maturinus abibis:
Hæc adeo dum vita manet, seu pulchra iuuentus

14. *Et cuncta, quæ sunt, adducet Deus
in iudicium, pro omni errato, siue bonum,
siue malum illud sit.*



Corpus agit crudum, seu dudum efforta senectus
 Languenti exercet defectas pectore vires,
 Pro scelere æternasque preces ad sidera ferre
 Edico; & totum gemitu conuoluere cælum.
 14. Seu bene, seu contra facias, Deus ante tribunal
 Sistet opus, meritis facient sibi præmia cuncti,
 Virtutem merces, & culpam pœna sequetur.



Quo ætatis tempore sit editus à Salomone
 Ecclesiastes siue KOHELETH.


SCRIBUNT Hebraei, Salomonem a-
 dolescentem edidisse Canticum Cantico-
 rum; Proverbia iam grandem natu, ac ata-
 te virili; Koheleth verò consenescentem.
 Coniecturam faciunt ex variis istorum ope-
 rum inscriptionibus; nam in Canticò nomi-
 nis sui duntaxat meminit; proverbiis regem
 Israël adscribit; in Ecclesiaste regem se in
 Ierusalem appellat.

Contendit Bellarminus variis rationibus
 probare Ecclesiasten scriptum à Salomone
 adhuc puro, & incorrupto ante vitæ deprava-
 tionem: sed verisimilius putat Pineda cum
 D. Hieronymo, & viginti quatuor aliis gra-
 uissimis Interpretibus, hunc librum scriptum
 ab eo post uniuersam gloriam & felicitatem

14. *Et cuncta, quæ sunt, adducet Deus
in iudicium, pro omni errato, siue bonum,
siue malum illud sit.*



Corpus agit crudum, seu dudum efforta senectus
 Languenti exercet defectas pectore vires,
 Pro scelere æternasque preces ad sidera ferre
 Edico, & totum gemitu conuoluere cælum.
 14. Seu bene, seu contra facias, Deus ante tribunal
 Sistet opus, meritis facient sibi præmia cuncti,
 Virtutem merces, & culpam pœna sequetur.



Quo ætatis tempore sit editus à Salomone
 Ecclesiastes siue KOHELETH.

SCRIBUNT Hebraei, Salomonem adolescentem edidisse Canticum Canticorum; Proverbia iam grandem natu, ac ætate virili; Koheleth verò consenescentem. Coniecturam faciunt ex variis istorum operum inscriptionibus; nam in Cantico nominis sui duntaxat meminit; proverbiis regem Israël adscribit; in Ecclesiaste regem se in Ierusalem appellat.

Contendit Bellarminus variis rationibus probare Ecclesiasten scriptum à Salomone adhuc puro, & incorrupto ante vitæ depravationem: sed verisimilius putat Pineda cum D. Hieronymo, & viginti quatuor aliis gravissimis Interpretibus, hunc librum scriptum ab eo post univèrsam gloriam & felicitatem

non solum delibatam; sed affatim perceptam & exploratam, imò & post peccatorum pœnitudinem, quippe in eo tanquam res sibi experimento compertissimas describit, sapientiam, opulentiam, ædificia, familiæ splendorem, operum magnificentiam: at viginti anni à regni initio usque ad domus absolutionem elapsierant, id est septem templi, tredecim domus suæ ædificandæ.

Neque solum post gloriam Salomonis, sed post pœnitentiam scriptus est hic liber, quia ut dixi pœnitentiam agentis, ut vult Hieronym. post Hebræos, Græcos, atque Latinos; videtur sanè is primus fuisse pœnitentiæ fructus; atque statim ut resipuit, hanc concionem habuisse, scriptoque suam pœnitentiam testatam voluisse apud suos populares iuxta illud Prouerb. 24. iuxta & Septuag. & ego nouissimus pœnitentiam egi.

ENVMERATIO ARITHMETICA
vanitatum quæ continentur in Ecclesiaste siue KOHELETH.

VOCATVS est Salomon KOHELETH id est congregator, quòd rerum omnium veluti summam colligat,

gat, easque vanitate, id est cifris illis, quæ nihil per se sonant, (vocamus zero) quasi iusto valore & æstimatione notet.

Cap. 1. Sunt terræ & elementorum omnium mutationes; inferiorum generationes & irrequietæ circuitiones, inter quas nihil internæ tranquillitatis ex scientia, aut vſu rerum iſtarum humanus percipit animus, cogiturque inclamare: *O vanitas!*

Sensus nullis experimentis contenti fatiantur, oculus & auris noua semper appetunt. *O vanitas!*

Rerum cognoscendarum ingens est difficultas, & sapientiæ comes ingens corporis labor assiduæque animi defatigatio. *O vanitas!*

Cap. 2. Deliciæ, risus, cumulus auri & argenti, regum & prouinciarum affluentia, familia, horti, pecora, cantores, cantatrices non explent animum. *O vanitas!*

Cap. 3. Temporum & studiorum inconstantia atque varietas, sententiarum philosophorumque de mundi constitutione dissensio nullum fructum habet. *O vanitas!*

Impietas effert caput & iudicum scandit tribunalia , perturbata & confusa omnia miscentur ignoratione finis. *O vanitas!*

Cap. 4. Industria & labor honestus subiacet inuidiæ vicinorum. *O vanitas!*

Populus solem adoratur orientem & regni hæredem , spreto parente senē. *O vanitas!*

Cap. 5. Loquendi temeritas , somniorum observatio , providentiæ obliuio. *O vanitas!*

Egenorum calumniæ , avaritiæ sitis inexplebilis , diuitum assentatores , sordida vitæ parsimoniæ cogunt inclamare: *O vanitas!*

Cap. 6. Qui non audent & à se non impetrat , ut comedat , & bonis quibus circumfluit , utatur , stultitiam suam probat. *O vanitas!*

Est , qui sibi in vita sepulchrum non præparat , neque curat funeris honorem , in futurum prouidus , sed præsentis totus tempori inuigilat. *O vanitas!*

Est quoque , qui desiderat quod nescit , & vota sua longius cognitione extendit. *O vanitas!*

Cap. 7. Qui suis viribus & meritis maiora ambit, & ultra vitam quasi sibi profuturas diuitias accumulatur. *O vanitas!*

Contemptus boni nominis, confectio adulationis, correptionis impatientia, studium vitæ diuturnioris dementem arguunt. *O vanitas!*

Fœmina ipsa fœminarumque blanditiæ decipiunt. *O vanitas!*

Cap. 8. Principum obsequia & irritatio nil tibi, nisi laborem pariunt. *O vanitas!*

Iustorum ærumnæ, mœror ex alienâ sorte, & rerum, quæ supra nos sunt stultitia perscrutatio. *O vanitas!*

Cap. 9. Eiusdem sortis omnibus indiscriminatim casus, nullâ habitâ ratione personarum. *O vanitas!*

Incertum & dubium apud homines in vita, virtutis præmium. *O vanitas!*

Cap. 10. Stultorum præpostera de rebus opinio. *O vanitas!*

Temerarius sepius dissipator vulnus sæpe ab angue latente accipit, & pœna in auctorem redit. *O vanitas!*

Multiloquium, & iudicium pigritia, dum rex puer rerum potitur. *O vanitas!*

Pecuniæ virtus, cui obediunt omnia, cum vile sit metallum. *O vanitas!*


Cap. II. Nimia rerum omnium præcautio, & stulta timiditas. *O vanitas!*

Adolescentiæ deliciæ, quam aut mors, aut senectus proxima vrget. *O vanitas!*

Si omnium cifrorum (zeros vocant) summam colligas, iustum rerum omnium pretium elicies, id est nihil. Iure itaque *vanitas vanitatum*, dixit Ecclesiastes, *vanitas vanitatum, & omnia vanitas.*



D A V I D
P O E N I T E N S .
S I V E
S E P T E M P S A L M I ,
Q V I V O C A N T V R
P O E N I T E N T I A L E S .



SEPTEM PSALMI, QVI VOCANTVR POENITENTIALES.

PSALMVS SEXTVS PSALTERII,
DAVIDIS POENITENTIS PRIMVS.

*Domine ne in furore tuo arguas me, neque
in ira tua corripas me.*

Miserere mei Domine, quoniã infirmus sum.

ARGVMENTVM.

Dauid graui morbo correptus ardentissimè sanitatem postulat, ne inimici de eius interitu lætentur: deinde de exaudita oratione sibi gratulatus hostibus mortem suam expectantibus piè insultat.

MYSTICVS SENSVS.

Oratio est hominis anxij & animi ob peccatorum recordationem perturbati, qui tandem diuinã consolatione recreatus sanctè gloriatur.



AT pœnis, iustoque datum est, Deus
alme, furori;
Si tamen vlla satis plectendo in crimine
pœna,
Si furor aut vllus satis est: nil ferre recusò,

Quod iubeas, modò sit iussis vis æqua ferendis;
Virtutem, aut veniam posco: nam pœna nocenti
Est sua, suppliciumque scelus: vix ossibus ignis,
Vix linguae sonitus superest, vix halitus ori:
Tu labris abeuntem animam, primòque fugacem
Hospitio reuoca, & moribundum subtrahc letho.
Si subitis delicta forent plectenda sagittis,
Iam tua consumptis langueret dextera telis,
In tantas angusta forent iam tartara pœnas.
Anne ego te post fata canam pallentibus umbris
Clausus, & insueto turbabo carmine manes?
Vox nulla est functis virâ, locus ille silentium est.
Heu fateor maculasse thoros nil tale merentis
Et vitam rapuisse manu hac: sed flumina fundam
Flumina larga, quibus mēs egra ensémq;, thorūq;
Eluat, assiduisque pluat nox humida guttis,
Iamque oculus nimio madidus caligat ab imbre,
Et refugus nictat diræ ad spectacula labis:
Este procul fraudum auctores, & turpibus ausis
Omnia pœnarum consumere nomina digni:
Audiit Omnipotens; primus vigor atq; redux mēs
Surgit, & ardentes tepuere per ossa medullæ;
Vos scelerum artifices, & læti rebus acerbis,
Si frons, si pudor est, mutata fronte pudorem
Induite actutum; turpi nam tincta rubore
Nostra prius, iam lætitiis Deus ora serenat.



PSALMVS TRIGESIMVS PRIMVS,
SEPTEM PSALMORVM SECVNDVS.

Beati quorum remissa sunt iniquitates.

ARGVMENTVM.

Psalmum hunc scripsit Propheta, cùm post adulterium, & homicidium in corporis infirmitatem, aliàsque calamitates incidisset, quas immisit Deus, ut ad peccatorum confessionem, & expiationem induceret.

FELICES animæ, facilis quibus ira pepercit
Numinis offensi, & pœnas cum labe remisit;
Nec, velut inducto cineri supponitur ignis
Tectus in insidias, vis est rediuiua nocendi,
Cùm semel æterno crimen velamine textit;
Nil labis superest, penitusque obducta cicatrix
Reddidit antiquum, forma redeunte, colorem:

Felix ille magis, cœlo qui natus amico
Semina virtutum, diuini aspergine roris
Excoluit, quem nulla doli fraudisque cupido
Flexit in obliquas animi non simplicis artes.

Heu mihi quo constant damnosa silentia plâctu!
Qui tacet, & fugiens in apertum educere solem
Noctis opus, tacitum clauso scelus ore coërcet,
Is crimen, pœnâsque nouis accessibus auget:
Hinc mihi nulla quies: noctûque, diûque fatigo
Et lacrymis, & voce Deum: vix ossibus ossa,
Vix carni cutis hæret, & omnis inaruit humor.
Tu tamen, ô numen non exorabile, multo
Verbere, & vsque nouis terga indurata flagellis

Desuper vrgebas , & me non facta verentem
 Sat mea, non timidum vibratæ ad fulmina vocis,
 Cuncta retexentem subigis delicta fateri.
 Et mecū hoc; veniam supplex, mora nulla, requirā,
 Non erit & pœnas vsquam geminare negando.
 Vix ego sic , actis aduersa prioribus acta
 Et vitam in melius meditans ; tu protinus audis
 Immemor actorū, gremiūque amplexibus offers.
 O statio secura mihi, cum pontus ab imo
 Totus inundabit , clangorque nouissimus altum
 Ingeminans, latè tumultis hinc inde reclusis
 Excierit populos , nostræ ô tutissima cymbæ
 Spēsque salūsque , tot iratis iactata procellis
 Das maria exuperare , sacros & inire receptus,
 Das & opem sperare, & non diffidere cœptis!
 Dūmque viam pandis solers ad singula ductor,
 Iuuerit actutum premere, & vestigia ponē,
 Non abrupta sequi , errorēque subire viarum.
 Qualis equus, mulūsque videns armenta vagari,
 Flectit iter gyris : donec calcaria fessor
 Ingeminans & fræna quatit , virgæque priorem
 Dirigit in cursum ; ille moræ dispendia pensans
 Agglomerat iussos ingrato in tramite gressus,
 Sic camo stimuloque doma, quem deuius error
 Abripit in præceps ; firmisq; astringe lupatis,
 Qui fræno rationis egens sine lege vagatur
 Liberitis , certasque æqui non audit habenas.

Est sibi pœna nocēs, criménq; domesticus hostis:
 At sequitur spem certā salus : vos gaudia vultu
 Vocēque testati, patri o confidite cœlo,

PSALMVS TRIGESIMVS SEPTIMVS,
SEPTEM PSALMORVM TERTIVS.

*Domine ne in furore tuo arguas me, neque
in ira tua corripas me.*

Quoniam sagittæ tuæ infixæ sunt mihi.

ARGVMENTVM.

*Scriptus est hic Psalmus in rememorationem
SABBATI, id est quietis in statu innocentia a-
missa, & voluptatis, quæ ex bona conscientia
percipitur.*

PARCE tuos, meritū in caput, exercere furores,
O scelerū vindex, rigidusq; ad singula cēsor,
Nam domini loris adigunt, sudibúsque superba
Mancipia exercent, & duros compede vernas:
Dilectam at sobolem blandâ monuisse querelâ
Sat patriæ est iræ, & molli strinxisse flagello
Infirnum genus, & pœnis grauioribus impar.
Crimina dum recolo, præcordia contrahit horror
Ignauus, vix ossa calor, vix halitus ora
Occupat, at tenuis, nunc & morientis oberrat
Spiritus, & fauces hæc ægrè in verba resoluo;
Vt malè compactâ dum quis rate naufragus altos
Decidit in fluctus, proprio se pondere mergit,
Exuperat caput vnda vorax, & fluctibus ora
Multa opplens spirare vetat, dum redditus auræ
Humida ab vndoso protendit brachia fluctu,
Littorâque aspiciens socios clamore requirit;

E vj

Sic mea me rapidis pridem mersere procellis
 Crimina, sic nautas, portusque requiro secundos
 Naufragus, & fauces opplet lethalis amaror:
 Gravior at vacuo remeat dum spiritus ori,
 Dátque salum epotum vomere, atque optata tueri
 Astra, memor vitam refero; si vita vocanda est,
 Vulneribus cum corpus hiat, nec clausa cicatrix
 Obducit sese: sed nec mihi cura medendi:
 Quin potius sæuæ impatiens pruriginis, vlcus
 Scalpenti refrico dextrâ, sicque omnis ab imo
 Putrescit iam plâga, atque vnguibus aucta cruētis
 Vicinos latè populans depascitur artus.
 Si tamen (in totis sunt vnum vulnera vulnus
 Artubus) accessisse queat noua plaga priori.
 Nil humeri, nil dextra valent; clumbia terga
 Declinant onus, effœtaque ad pondera vires.
 Deiectum me cerne solo, gemitusque supremos,
 Quos expiranti, tandèmq; extrema frementi
 Eripuit de corde dolor, tractabilis audi.
 Sed quid opus verbis, linguam suspiria suppleant
 Verborumque vices; nam pectore fessus anhelos
 Lâqueo, deseruitque omnes vigor, & decôr artus.
 Quid querar elusamque fidem, violatâque sacri
 Iura sodalitij, technasque rebellis amici,
 Et coniuratas iniusta in bella cohortes,
 Quas magè sperabam fidas mihi rebus in arctis?
 Surdus ego interea repetita adiurgia semper
 Elinguisque, minas nullas, nec amare vicissim
 Dicta procax, contra conuicia falsa, repono
 Certus opis, fidensque tuæ: nec me mea fallit
 Magna fides: nusquam fugientia terga videbit
 Hostis ouans, sint terga licet dignissima pœnis:
 Ille iterum pugnae impatiens, dira agmina dira

Denfat & innumeris vnum caput impetit armis :
 Te duce certa salus , te defensore , salutis
 Palma comes , celerique aderit victoria curru.

PSALMVS QVINQVAGESIMVS,

SEPTEM PSALMORVM QVARTVS.

*Miserere mei Deus secundum magnam
 misericordiam tuam.*

Cum Nathan venit ad Danidem , Pro-
 pheta ad Prophetam.


PARCE, Deus , magnūque tui miseratus
 amoris ,

Pande sinum, nam grande nefas breuioribus vlnis
 Est impar, & parua graui clementia noxæ :
 Namque intentatum nihil est, nil restat inausum,
 Pérque gradus omnes, corpúsq; animūque libido
 Quo tulit, ad suprema scelus fastigia duxi,
 Audax heu nimium ! tu criminis alta tenentem
 Deprime felici casu, ter & ablue viuo
 Flumine, & exundet totis miseratio riuis.
 Non mea me delicta latent, sempérque recurrunt
 Obuia, & horrendis referunt simulacra figurs.
 Nullum ego te crimen non inspectante peregi,
 Certus eris, si causa subit prætoria, testis,
 Et sperare vetor, nam quā me labis inanem
 Parte canam, impuro mihi si de semine surgit
 Principiū, nec nulla hominū vitiosa propago est?

Cur tibi certa negem, iussus tibi vera fateri ?
Tu mihi das sophiæ clausos aperire recessus,
Et certâ ventura procul prænoscere mente:
Tu me humilis lustras hyssopi aspergine, & omnis
Abscedit labes, ac primæ reddita formæ
Mens candore niues, purgatis sordibus, anteit.
Vocibus his quicumque auidas impleuerit aures,
Ille recedentem vitam reuocauerit, ille
Infractos erebris solidarit ab ictibus artus.
Si te fœda oculis pigeat delicta tueri,
Auertisse sat est, & cæca immergere nube
Noctis opus germénq; erebi; modò lucis obortæ
Vel radius tenuis diuo scintillet ab igni.
Si nullum accessu, sacrisque amplexibus arces,
Cur reducem prohibes? resonet vox læta salutis
Nuntia, quæ tergat lacrymas, quæ surgere fœdâ
Mandet humo, ac referens mentémque animûm-
que priorem.
Me mihi restituat, demissâque sceptrâ reponat.
Primus ego hortabor, monitisq; vrgebo rebelles,
Vt versis studiis, meliorâque signa secuti
Ire iter instituunt tua sub vexilla, reuersi
Vnde sibi veniam, cœlôque trophæa reportent.
Heu noua continuo timidum spectacula pectus
Exercent, modicam vix indultura quietem,
Pallida dum cæsi occurrat ductoris imago?
At, mea magna salus, has si deponere curas
Possê dabis, memor vsque tuæ præconia dicam
Iustitiæ, quam tota olim mirabitur ætas,
Génisque omnis, sexûsq; omnis: quæ postera surget.
Religio, alterno repetet mea carmina cantu.
Tu modò labra ciens, & fila loquacia doctæ
Contendens citharæ, quæ suggeris, excipe vota.

Hæc ego sacra feram, cadet hæc tibi victima; nã te
Non delubra iuuant squallenti pinguia tabo ;
Sed mens falsa nefas , & amans sua facta piare.
Vno Israël totum hostis sorbuit haustu ;
Quæque iter ad celsæ durebat templa Sionis
Ante hominũ pedibus tritum, cum sacra quotãnis
Iudæi patrio facerent de more frequentes ,
Sentibus obductam passim syluestribus horret :
At tua, quæ nullis ingens clementia metis
Clauditur , & nullo miseratio tempore desit,
Spem facit , & primos aditus ad templa recludit.
Tu , qui castigas modicè grauiora merentes ,
Instaura Solymas ; superest vix vrbis imago ,
Portæ hædere solo effractæ , vectesque reuulsi ;
At si deiectas miserans erexeris arces ,
Illic te innumerus ciuis, gènsque aduena passim ,
Sacrificiũque colent dextræ , votiuaque figent
Dona tholis & thura focis , tibi lecta cremabunt.
Barbati gregis, & balantum pinguia cædent.
In primis taurus generosa in cornua surgens
Iã primũ, crescensque animis, tibi victima sæpe
Multa cadet , rubróque fluent altaria riuo.





PSALMVSCENTESIMVSPRIMVS,
SEPTEM PSALMORVM QVINTVS.

Domine exaudi orationem meam, & clamor meus ad te veniat.

Non auertas faciem tuam à me.

Oratio pauperis, cùm anxius fuerit, & in conspectu effuderit animi sensus.

Id est,

Formula orandi, qua debet uti pauper in angustiis positus.

QVÆ frustra toties cœli conuexa perrerat
Irrita vox, fractis subeat penetralia portis,
Tūq;, De⁹, lacrymas, quas suggeris, annue, & vdo
Pectore manantes gemitus placabilis audi,
Vlterius nec verte meis tua vultibus ora;
Sed quocūque loco, quocūque & tempore posthac
Surgentes cum voce manus ad sidera tollam,
Desuper inclinans lapsis succurrere rebus
Appropera, promptaque manu fulcire ruentem.
Nam veluti torris cùm se fert fumus in altum,
Si flauere noti, collectæ nubis ad instar
Cedit continuò, rarisque repente sub auras
Vanescit; sic vita fugax dilabitur, ossaque
Arescunt sensim vacuis exsucca medullis.
Sicut & in pratis, rigidâ quæ gramina messor
Falce secatur, mox deficiunt; ut solis ab æstu

Flos languens lasso ceruicem in caule reponit;
Sic ego deficio, panis, vitreique liquoris
Immemor, exhaustæ gemitu, assiduisque querelis
Stant fauces, mutoque hæret vox cassâ palato.
Qualis & vmbroso filuæ velata recessu
Noctua, desertique volans per rudera tecti
Exercet vacuis carmen feralè sub antris;
Aut veluti, nidis vigilando loquacibus, abdit
Passer inaccessis, implumia pignora, tectis;
Talis ego humanæ fugiens consortia gentis
Ingemo, dum clamorosa fremunt conuicia gentes.
Cernis vt immundo coopertus puluere canos
Abiectusque solo, fletus in pocula vertam,
In panem cineres: dum summa sede locatum
Subruis in præceps, & adhuc in verbera pendes!
Ast, æternè parens, nullo qui deficis æuo,
Si qua manet te cura mei, miseresce Sionis,
Dum ciuis rogat, & spatium non abnegat hostis:
Si facias, quot erunt lapides, tot signa salutis
Marmoreis impressa notis, in sera micabunt
Sæcula, & arx nullas stabit veritura ruinas.
Hæc ergo æternis memores intexite fastis
Nunc vobis, vestrisque legenda nepotibus olim.
Namque Deus terras oculis dignatus & aure,
Audiit ex alto gemitus, & mœsta querentum
Carmina. Si rursus versas erexeris arces,
Nostra tibi grates referent post funera nati,
Nam me vita fugit. Breue cur mihi cōtrahis æuū,
Et properas mediæ abreptum diuellere luci,
Cum tua non vllis declinet vita sub annis?
Per te præcipiti gyrat vertigine cœlum,
Firma manet tellus, & pondere fixa suo stat,
Interitura tamen, senioque data tributum:

Ast idem es, nusquam absimilis; non labile carpit
 Tempus, & aduersi vertunt decora inclyta casus :
 Sed diues, plenisque tui es; non copia dando
 Deficiet; sed trita poli vestigia pressans
 Posteritas bibet hoc refluos de fonte liquores,
 Nec lacus exhaustis siccus rarefcet ab vndis.
 Felix mens nimium, tam rerum oblita suarum
 Quàm confisa tibi, quæ diuite ab vbere pendet!
 Defectum tua sola penus non nouit alendo.

✠✠✠✠ ✠✠✠✠✠✠ ✠✠✠✠ ✠✠✠✠✠✠ ✠✠✠✠✠✠ ✠✠✠✠✠✠

PSALMVS CX XIX.

SEPTEM PSALMORVM SEXTVS.

De profundis clamanti.

CANTICVM GRADVVM.

Id est,

Psalmus vnus ex gradualibus, quo deploratur
 exilij calamitas. Recitatur pro defunctis. Omnia
 enim, quæ continet, conueniunt animæ in purga-
 torio detentæ, quæ inducitur loquens.

Carmen elegiacum, quia lugubre.

CLAMOREM è latebris, imò que è pectore misi,
 Audi humiles celsa desuper arce preces :
 Nec satis est votis utcumque aduertere mentem,
 Acrius intentam sollicitamque peto.
 Sæpè renascentes leuet auris amica querelas,
 Votæque luctificis ingeminata sonis.

Si castigato pendas examine lancis

Crimina, quis pœnas, quas meruere, feret?

Pacis habet templum, fumâtque tibi ara salutis,

Spem mihi, quæ damnat lex scelus, ipsa facit.

Sustinui, promissa licet suspensa inorentur,

Tantâque non potuit spem minuisse mora.

Fide Deo, Isacide, primo dum mœnia mane


Lustrat, & excubias vespere miles obit.

Qui dominus, pater ille idē, cui pectus amicū est,

Cui bonitas leuibus non superanda malis.

Vindex Isacidas exosâ forte leuabit,

Soluet & admissi probra relicta mali.



PSALMVS CXXXII.

SEPTEM PSALMORVM VLTIMVS.

*Domine exaudi orationem meam, auribus
percipe obsecrationem.*

Quando Dauidem prosequabatur Ab-
salon, patrem filius.

DA precor, ærumnisque manus, & vocibus
aures,

Alme sator, stet certa fides, nec vana locutum

Arguerit quisquam: scio crimina, & agnita dāno

Insectorque odiis: quid me ad subsellia rursum

Abripis, atque iterum vis factum nota fateri?

Si scelus æquato pendas examine libræ

Æquiparans pœnas, rigido te iudice nullus,

Propitio sed patre , nocens absoluitur omnis.
 Aspicias vt nudum latus vrgeat impiger hostis
 Vndique, libatæque petat spolia vltima vitæ ?
 Scilicet obscuris , vt funus inane , sepulchris
 Conditus , in tenui lateo discrimine mortis ,
 Vestigiorque neci : Spes ô certumque mearum
 Præsidium rerum , tot inexpectata salutis
 Gaudia dum recolo , memor , vt me mille meosque
 Antè modis , meriti abstuleris de faucibus orci ,
 Tunc ego telluri similis , quæ pendula aquarum
 Stagna fitit , crebroque imbres suspirat hiatu ,
 Libatum repeto noto de fonte liquorem.
 Tu mihi sydereos , cæli arbiter , implue rores ,
 Nam perco , vlticæque stygis præsentio flammæ :
 Accelera ; tu namq ; Deus , dominusque , patérq ; es.
 Tu mihi ductor eris , rectâ & regione viarum
 Certus iter carpam , spernâque innoxius hostes.
 Te duce , prostratasque acies , infractaque colla
 Aspiciam , victorque hostilia tela repellam,
 Seruus ego domini vestigia ponè secutus.



HEXAEMERON,
SIVE
MOYSES
DE OPERE
SEX DIERVM.



PRIMO DIE.

CREAVIT Deus cœlum empyreum, terram, & aquas ex nihilo, quibus accessit lux.

SECUNDO DIE.

HVIS secundi diei opus est firmamentum, & cœlum stellatum inter duas aquas, accedunt duo elementa ignis & aer.

TERTIO DIE.

FACTVM est, vt appareret arida, & mare locum suum teneret separatum, & germinaret terra.

QUARTO DIE.


FACTA sunt luminaria in firmamento, quod nunc syderibus insignitur: hoc etiam die solem esse productum verisimilius est.

QVINTO DIE.

PRODUCTA sunt aquatilia, pisces, & volatilia,

SEXTO DIE.

FORMATA sunt iumenta, reptilia,
feræ, & tandem qui omnibus imperet,
homo, & eodem die Eva.



DIES PRIMVS.

IN principio creauit Deus cælum &
terram.

Terra autem erat inanis & vacua, &
tenebræ erant super faciem abyssi: & spi-
ritus Domini ferebatur super aquas.

Et vidit Deus lucem quòd esset bona:
& diuisit lucem & tenebras, appellauit-
que lucem diem, & tenebras noctem: fa-
ctumque est vespere & mane dies primus.
Genes. I.

DIES




DIES PRIMVS.

TEMPVS adhuc nondū signabat tēpora, nondū
 Annus secla, annum inensis, & hora diem:
 Sed Deus æternā regnator pace vigeat
 Æquæuus nato, spirituique pater.
 Ipse sibi Deus hospes erat, sibi regia solus;
 Idem diues erat diuitiæque, Deus.
 Totum erat in toto, sed totum parte carebat:
 Idem finis erat principiūque simul:
 Tum Deus artifici mundum producit ab ore,
 Sermo potens faber est, materiæque nihil.
 Illud ab æterno Triadis sibi præscius æuo
 Spiritus, vnanimi mente mouebat opus.
 Congeries rerum passim indigesta iacebat,
 Et turpi moles infabricata situ.
 Terra polūque fuit, nec terra polūque fuerunt,
 Dicere nec licitum est, en polus, ecce solum.
 Cuncta superfuso horrebant reuoluta batratro,
 Omnia, inexplicitum, semina, semen erant:
 Proteus orbis erat, quem densior vmbra tegebat,
 Et vaga centenis versa figura modis.
 Sic Deus implicuit confuso fœdere mundum,
 Volueret vt superis inferiora locis.
 Frigida pugnabant calidis, & acuta rotundis,
 Certabant duris mollia, & alba nigris.
 Non color informi residet, non vultus in orbe,
 Nulla figura soli, nulla figura poli;
 Quæque erat & tellus, illic & pontus & aër:
 Vnda, aër, tellus, vnus aceruus erant.

Imperfecta situ macies, sine nomine corpus,
 Et sine perfecto corpore, nomen erat;
 Haud secus informes catulos, lambendo figurat,
 Vrsaque se matrem perpoliando probat,
 Inuidiosa quibus partes natura negauit,
 Ingeniosa suam lingua rependit opem.
 Materno plusquam studio indefessa laborat,
 Quæque nouerca fuit, fit modò vera parens:
 Tum diuina duæ steterunt ad iussa sorores,
 Umbrarum vna comes; luminis vna parens,
 Protinus ecce ambæ variâ se fronte tulerunt,
 Emicat hæc oculis, altera lucis eget:
 Vna nitens radiis dat mille & mille lepores:
 Hæc horret tenebris vndique cincta suis;
 Vna coloratas radiis fulgentibus alas
 Explicat, & rutilo tegmine clara micat,
 Altera nigranti squallet deformis amictu,
 Clauda pedes, oculos horrida, manca manus:
 Non videt orba oculis; verùm fugit ipsa videri,
 Quærit & obscuris cæca latere plagis.
 Tum Deus; alternâ mundum ditione premetis,
 Lux pellat noctem, nox reditura diem,
 Tūque, dies, tot clara oculis, tot splendida geminis
 Mox lucem radio præueniente feres:
 Pone tuos gressus nox regnatura sequetur,
 Terrigenum curis impositura modum.
 Dixerat, Imperium lux prima faceßere cœpit;
 Nox subit alternas obsequiosa vices.





DIES SECVNDVS.

DIXIT quoque Deus, fiat firmamentum in medio aquarum: & diuidat aquas ab aquis.

*Et fecit Deus firmamentum, diuisitque
aquas, quæ erant sub firmamento, ab his
quæ erant super firmamentum. Et factum
est ita.*

*Vocavitque Deus firmamentum, cœ-
lum: & factum est vespere & mane dies
secundus. Genes. i.*

Q V I D iuuat aduersâ lucis discriminē ab vmbra,
Si deforme tamen restet vbique chaos?
Corpora si quatuor coalescunt corpore in vno,
Vnum si quatuor corpora corpus habet.
Imperet ergo Deus dignam se surgere sedem,
Et surgit sedes digna satore, polus.
Conficiet solitum sine fine volubilis orbem
Annorum cursu non peritura domus.
Tum Deus ætherei sinuosa volumina cœli,
Et totum largâ luce serenat opus.
Machina constanti sub cardine fixa rotatur;
Circinat & gyris tempora certa suis.
Fulgebat nondum Arctoo temone Bootes,
Nec violenta trucidis flamma Leonis erat.
Obliquis nondum radiabat flexibus Anguis,
Pendula nec iustas Libra tenebat aquas.
Trux Aries nondum aurato velatus amictu

Tempora nocturnis æqua diurna dabat.
Nondum inclinatam fundebat Aquarius urnam,
Ast æqualis erat lucis vbique tenor.
Mobilitate aër, flammis polus, astræque cursu,
Neptunus lapsu, mole carebat humus.
Tum mandante Deo, cœli per aperta liquefcit
In raros aër extenuatus agros.
In sedem sursum excelsam leuis euolat ignis,
Vicini lambat quò propiora poli.
Terra pilæ similis, mediam sortita cauernam
Aëris, in densum stat glomerata globum.
Néve ignis noceat, duplex hunc diuidit orbis:
Arbiter est aër, arbiter humor aquæ.
Soluerat omne chaos pater altus; & vnica moles
Confusa æquoreo terra tepore madet.
Vndæque mox suprà curuum sinuatur in orbem,
Et mare perpetuo flumina fonte petunt,
Nunquam mobilibus saturū fuit amnibus æquor,
Salsæque perpetuam prouocat vnda sitim.
Tum miranda fuit commercia cernere primū
Stantis telluris, desilientis aquæ.
Altera pars superos meliori sorte sub axes
Fertur, & aëriâ pendula sede manet.
Æquora quis referat stabili pendentia fluctu?
Quis pretium superis carmine ponat aquis?
Denique densatur vitreâ polus omnis ab vndâ,
Stilla prius fluxit, quæ modò stella micat;
Tum primū aggressis nimbi concrefcere guttis
Et pingui exsuccas rore rigare plagas.
Deciduis inde erumpent torrentibus imbres,
Queis diues fructu luxuriabit ager:
Hinc caput in dirum letalia fulmina surgent:
Horreat armatas impia turba manus.



DIES TERTIVS.

DIXIT verò *Deus*: congregentur aquæ, quæ sub cælo sunt, in locum unum: & appareat arida, & factum est ita.

Et vocavit Deus aridam, terram, congregationesque aquarum appellavit maria. Et vidit Deus quod esset bonum:

Et ait: Germinet terra herbam virentem, & facientem semen, & lignum pomiferum faciens fructum iuxta genus suum, cuius semen in semetipso sit super terram. Et factum est ita.

Et protulit terra herbam virentem, & facientem semen iuxta genus suum, lignumque faciens fructum, & habens unumquodque sementem secundum speciem suam. Et vidit Deus quod esset bonum. Et factum est vespere & mane dies tertius.

CVNCTA suis elementa *Deus* confidere regnis
Imperat, haud vno mixta iacere globo.
Quatuor educti fratres sua regna capessunt,
Currere, diffundi, stare, volare vides;
Altum flamma petit; propius spirabilis ær


Liquitur, ima tenet terra, fretumque supra est,
 Quæ noua diuino surgunt miracula verbo?
 Irrita non nouit fundere iussa fator.
 Antè superfuso lympharum gurgite tellus
 Naufraga, sepositis libera surgit aquis.
 Vnde ingens rupra tellure cauatur hiatus?
 Sparfæ congeries huc, Deus inquit, aquæ.
 Auritæ vndarum moles sentire iubentem,
 Quò diuina vocant iussa, repente fluunt.
 Inque cauernosos tellure extante recessus
 Decliuēs cursu præcipitantur aquæ:
 Flumina signatos quærunt partita recessus,
 Et soluunt Nereo prima tributa patri:
 Oscula tum matri diuerso tramite libant
 Sequana, Lædus, Arar, Mosa, Garumna, Tagus.
 In mare tum dulcis fluuiorum voluitur vnda,
 Quæ falsum vt tetigit marmor, amara redit.
 Conditur exiguæ sub aquis pars maxima terræ:
 Insula quod superest innatat Oceano.
 Pars iacet humano indocilis mansuescere cultu:
 Quantula mortales pars habitanda manet!
 Ast vbi congesto vastum æquauere barathrum
 Vortice, præfago subdidit ore Deus.
 Te mare venturæ dicent de nomine gentes,
 Iræ fræna tuæ littus inerme dabit.
 Fluctibus alternis refluos conuoluere fluctus
 Incipe, & ad notos disce vocare specus.
 Debita natorum quamuis mare pensa recepit;
 Haud tamen à nimis pontus inundat aquis.
 Cynthia cum pleno fraternum corpore lumen
 Hauferit; iratis sæuiet vnda vadis:
 Cúmque renascentem cornuta retraxerit orbem,
 Impete sedato mitior æstus erit:

Volue tuos fluctus, rursusque in te ipsa reside,
Et contenta tuâ currere, curre viâ,
Siste hîc illis replicatas vorticis iras,
Néve inconcessas depopulare plagas.
Vlterius tentare veto, ne iussa rebellis
Despice, sit regno murus, arena, tuo.
Non fractos tardant obiecta repagula fluctus,
Nec tumidas reprimunt inuia saxa minas.
Terminus in planâ iacet inuiolatus arenâ,
Quem tibi signatum præteriisse nefas.
Vndarum implacidos domuit lex ista furores,
Et Thetis ad nutus obsequiosa fluit.
Surgere nam passim montes, tellusque cavernis
Hiscere, & humori pandere prompta sinus.
Aëra sic ignis, sic vndam subiicit aër,
Sic terram leuior comprimit vnda grauem.
Atque orbis speciem grauitas sua fecit utrique,
Humida puluereo dum coit vnda globo.
In modicum passum tellus erecta tumorem
Montibus hinc premitur, vallibus inde iacet.
Nam grauia in massam proprio coiere deorsum
Pondere, puluereum vinxit & vnda globum.
Quattuor esse pari cernes elementa figurâ,
Non simili cernes quattuor ire gradu:
Illa volant sursum, descendunt ista deorsum,
Illa effert leuitas, pondus at ista premit.
Quinquâ vnû est omni corpus sibi parte cohæres,
Corporis haud vnum est partibus ingenium:
Regia nam cœli vultu inuariabilis vno
Perpetuat leges inuiolata suas:
At quæcunque sinu lunæ complectitur orbis,
Incerto currunt irrequieta gradu.
Ad terram sator omnipotens conuersus inanem,

Nunc age, quid nudâ pendula mole iaces ?
Sit tibi multicolor facies, sit lætus amictus ;
Gramen inexhausto prodiga funde sinu.
Dixerat, & variâ tellus se fruge coronat,
Fundit opes iussus, non renouatus ager.
Fœtâque gemmato frondescit vertice planta,
Vt sua, quod peperit, vix ferat arbor, onus.
Mitia odorato sudantur Balsama ligno :
Et lacrymosa suo cortice Myrrha cadit :
Prata colorantur multis variata figuris,
Pabula de nullo semine nata virent.
Inculto se sponte ferunt è caudice flores,
Piçtâque multiplici gramine ridet humus.
Et semen, voluisse, fuit ; namque vberè verbi
Frondescunt sylvæ, luxuriavit ager.
Sic florum vario ludit natura colore,
Hinc odor efflatur, cernitur inde color.
Densantur piçtis rubicunda papauera campis,
Albentes vincunt lilia cana niues.
Solsequium curuo comitatur tramite solem,
Cognatam paruo circinat orbe diem :
Nititur & Phœbi cursus æquare sequendo,
Quo veniente nitet, quo fugiente cadit :
Nomine sunt similes, similes cursu atque recurso,
Ille suis radiis cingitur, iste suis.
Perpetuos retinet vernans Amarantus honores,
Non æstas vret, non violabit hyems.
Nec te transierim pretiosa colore Tulippa,
Vt color est mirus, sic tibi nullus odor.
Pallefcit, rutilat, flauescit, purpurat, albet,
Et folio fulgens versicolore nitet.
Vallatâ natura rosas in sede reponit,
Spinarum sed enim sub statione locat.

Hinc atque hinc densis , armato vt milite , spinis
Obsita, purpureas sanguine vendit opes.
Si qua rapax roseo manus infidietur honori,
Occurrens furem cuspide spina fugat:
Spargit odoratas animas ; grátosque vapores
Murice luteolo delitiosa parit.
Diuersum ostentat variata Anemona colorem,
Cui fulget radiis orbicularis honos.
Purpurat , albescit , flauet , passimque nitescit
Simpliciore modo , multiplicique modo :
Iam glandes querceta ferunt , pomaria fructus ;
Vlmus habet montes , littora pinus amat.
Densantur rigidis dumeta reuincta catenis ,
Mordacésque acuunt sæua rubeta stylos ,
Ingeniosa Isfanta suo dat ab vbere fontem
Cereus vnde fluit, nec datus arte, latex.
Ferueat ille licèt, fundóque exæstuet imo ,
Duratur rigido desuper vnda gelu.
Ammonis fons nocte calet, de luce rigescit
Non tantum gemmis , sed pretiosus aquis.
Ardet inextinctum gelido sub monte Gagates
Ignis in hostili viuit amicus aqua.
Coniunctis aduersè locis elementa feruntur ,
Non nocet vnda rogo , nec nocet ignis aqua.
Quæ dirimit natura , latex commercia iungit ,
Inferóque hostis sanus ab hoste viget.
Quæ riget extremo Thule circumdata ponto ,
Et quæ postremam limite claudit humum ,
Vndique sulphureos ructat mons Hæcla vapores ,
Proximáque ignitis verberat arua globis.
Erumpunt piceæ glomerata volumina flammæ ,
Quæ pauet vnda sibi , quæ sibi terra pauet :
Omnia cum flammæ rapiant , mirabile dictu ,

Illæsum montis nix tegit alta caput :
 Illa nec accenso resoluta liquefcit ab hofte,
 Regnat at in mediis inuiolata focis.



DIES QVARTVS.

DIXIT autem Deus, fiant luminaria in firmamento cœli, & diuidant diem ac noctem : & sint in figna & tempora, & dies & annos.

Ut luceant in firmamento cœli, & illuminent terram : Et factum eft ita.

Fecitque Deus duo luminaria magna, luminare maius, vt præffet diei : & luminare minus, vt præffet nocti : & ftellas.

Et pofuit eas in firmamento cœli, vt lucerent fuper terram : Et præffent diei ac nocti, & diuiderent lucem ac tenebras : & vidit Deus quòd effet bonum. Et factum eft vefpere & mane, dies quartus.

ER G O N E, cærulei finuofa volumina cœli
 Vos Deus ornatu fola carere finet ?
 Inuidiæ procul efte metus, probrique timores ;
 Ornatam cœli gratia vincit humum.
 At vereor ne fydereis mea penna liquefcant
 Luminibus, cœlidum propiora lego.

Penna vola, mea penna vola, non vsta liqueſces:
 Non, viuace Deus quem ferit igne, perit.
 Tum pater omnipotens ſœcundo ſubdidit ore,
 Ite placet geminas inpare luce faces.
 Luminis iſta parens, vmbra: comes illa feretur:
 Hæc noctem alternans diuidet, illa diem.
 Phœbe hominem ad duros animare memento labores,
 Deſeſſum placido, luna, ſopore leua.
 Conſona præſcripto ſic ducite tempora curſu:
 Formam adimes rebus, Delia, Phœbe dabiſi.
 Dixit, & ecce duo largâ prægnantia luce
 Corpora, ſydereis emicuere plagis.
 Sol radio meliore nitet, quia lucis origo,
 Et breuiore minor lampade luna micat.
 Præpete ſol curſu redeuntē diuidit annos:
 Contraçto menſes cardine luna facit.
 Sol modò brumales vergens declinat ad Auſtros;
 Tramite mox verſo torrida regna petit.
 Atque vbi tellurem radiis accendit acutis,
 A ſole ardenti dicta peruſta plaga eſt.
 Æqua dies illi ſemper cum nocte recurrit,
 Cuncta illi ſurgunt ſydera, cuncta cadunt.
 Et lux biſſenis, totidem nox clauditur horis,
 Diuidit æquales nôxque diésque vices.
 Quâ geminos lentus circumfluit ambitus axes:
 Zona duplex pigro à frigore nomen habet:
 Terno conſurgunt his longa crepuſcula menſe.
 Vnica nox annum præſtat & vna dies.
 Frigora quâ flammas hebetant, & frigora flâmæ,
 Nomen temperies huic moderata dedit.
 Sol diuerſa trahit varium in diſcrimina tempus,
 Obliquo oppoſitas, dum petit, axe vias,
 G vj

Hoc regnante, leui zephyrus spiramine flabit,
 Paulatim viuax imbuet arua tepor.
 Viuida tunc tenerum sensim exeret herba cacumē,
 Se putris ruptâ gleba resoluet humo.
 Ponè aderit longis ignita caloribus æstas,
 Siccatósq; grauis Cancer aduret agros,
 Frigora captabit patulâ pecus omne sub vlimo,
 Exustóque gregi gratior arbor erit.
 Ampla repleturus meditabitur horrea messor,
 Maturâque seges falce, resecta cadet.
 Proximus Autumnus sectis succedet aristis,
 Deciduas ponet languida planta comas.
 Ebria calcatis spumabunt præla racemis:
 Vua suos foetus exonerata dabit:
 Post horrescet hyems glacialibus aspera nimbis,
 Nec poterit stantes scindere remus aquas.
 Prona cadet nemorum species, miscebitur æther,
 Conglaciata pigras vnda negabit aquas,
 Tum reuehet Phœbus repetito tempora cursu,
 Et reduces noto calle reflectet equos.
 Interea ducens filatim argentea Phœbe
 Cornua, fraterno è lumine lumen habet.
 Turgida mox pleno splendescit Cynthia vultu,
 Plenus & accepti luminis orbis adest:
 Sortitæque iterum patiens discrimina lucis
 Lumine decrescens debiliore nitet.
 Perpetuam constans tenet inconstantia lunam,
 At solis facies inuariata manet.
 Sol radiis foetus conchâ de matre superbos
 Exeret, & mira luce nitere dabit,
 Nutriet ignito pretiosa metalla recessu,
 Quódque tegit tellus, quod tegit vnda sinu,
 Quod tegit vnda sinu, tellúsq; amplectitur orbe,

Hoc radio Titan parturiente dabit.
Tum Deus accendit tectis cœlestibus ignes,
Et duodena polo signa micare iubet.
Iam duo consurgunt è vertice cornua Tauro,
Attollitque caput Solstitiale, Leo.
Squamiferi findunt cœlestia marmora pinnis
Pisces, hoc vno sydere signa duo.
Non igitur stellas, animæ vis viuida torquet,
Nam constante volant astra citata gradu.
Ast animâ quidquid vegetante & spôte mouetur,
Vt placet, ad nutus stat properatque suos.
Vicinum terris lunæ tenet orbita cœlum,
Et breuiore minor circinat orbe polum.
Proximus huic, modico sed proximus interuallo
Mercurius: sequitur ponè propinqua Venus:
Non longè Mars languineum vomit ore cruorē:
Iuppiter aurato purior igne micat.
Saturnus nigra pallet fuligine cinctus:
Denique mille oculos vltimus orbis habet:
Ne ruat ignotis per opaca viator in vmbis,
Nauita ne cæcis deuius erret aquis:
Ne vigil excubitor noctis non diuidat horas,
Ne famulas lassent pensa molesta manus.
Et quo stella magis septem coniuncta trioni est,
Se magis angusto tardior orbe rotat.
Cardinibus geminis ingens stat machina mundi,
Dicet posteritas ingeniosa polos,
Alter vicino sumet cognomen ab Austro
Alteri ab aduerso tardior Vrsa dabit.
Vna dies sex signa tegit, totidem reteggit nox,
Dimidiūque patet, dimidiūque latet.
Mars geminis brumis, duodenis Iuppiter annis:
Finito tardum conficit orbe polum,

Saturnus triginta annis , ter Luna nouenis
 Lucibus ; hæc propero , tardior illa gradu.
 Mercuriûsque Venûsque anno : Sol flectit eodem
 Auerfos spatio semper anhelus equos.
 Primus in occasum reliquos si concitet orbis ,
 Huic reliqui obsistunt iniiciuntque moram.
 Quin etiam cœlum nullâ non parte rotundum
 Collige, quòd properè se per inane rotet.
 Sed fileo, cœli concentus verberat aures ,
 Dulcius & nostro carmine carmen init.

✽✽✽✽✽ ✽✽✽✽ ✽✽✽✽✽✽ ✽✽✽✽ ✽✽✽✽✽✽

DIES QVINTVS.

*DIXIT etiam Deus : producant aquæ
 reptile anima viuents , & volatile super
 terram sub firmamento cœli.*

*Creauitque Deus cete grandia, & om-
 nem animam viuentem atque motabilem,
 quam produxerant aquæ in species suas, &
 omne volatile secundum genus suum. Et
 vidit Deus quòd esset bonum.*

*Benedixitque eis , dicens : Crescite , &
 multiplicamini , & replete aquas maris ;
 auésque multiplicentur super terram.*

*Et factum vespere & mane , dies quin-
 tus.*

NONDVM culta suis steterât elemēta colonis ,
 Et sterilis nullas Iuno ferebat aues.

Vnum splendenti fulgebat fornice cœlum;
 Pictus erat reliquis horror vbique locis.
 Fallor ego, natos video sub gurgite pisces,
 Indigenasque sinu mater aquosa fouet.
 Vix Deus omniparas fœcundo è pectore voces
 Miserat, æquoreis plebs ruit vda plagis.
 Rex Delphinus ouat : socij comitantur euntem;
 Mille sequi visi, mille præire ducem.
 Mille supra, & totidem iuxtaq; infrâque sodales :
 Regali princeps cum legione natat.
 Nunc bifidæ lentat gressum curuamine caudæ,
 Nunc velut ex arcu missa sagitta ruit,
 Agglomerant sese Paganellus, Purpura, Cancer,
 Salpa, Lepus, Cucumer, Cernua, Perca, Scorus.
 Aurea cui caudam ceruice excurrit ad imam
 Linea, cæruleas tranat Iulis aquas.
 Et tu fluctiuagas inter celebrande cohortes
 Gobio, per patrios exspatiaris agros.
 Cerno reluctantes nequicquam marmore nautas.
 In Remoram, immoto dum tenet ore ratem.
 Huic circumseptam fluitanti carcere Romam
 Sistere cum summo principe ludus erit,
 Aurea purpureis stellatus tergora signis,
 Sulmo flagellanti verbere findit aquas.
 Sulmoni similis, rubeis maculosa figuris
 Mensæ honor, aduerso flumine Trulla natat.
 Multiplici Muræna rotat sinuamine corpus,
 It, redit, implicitas torta, retorta vias.
 Flexibus incuruis Anguilla volubilis errat,
 Et Panther tergo versicolore nitet.
 Lucius obscœnas alga torpente lacunas
 Obsidet, & pigrâ Rana palude salit.
 Natiuis ad saxa tenax stat Coclea testis,

Vellere quam fluctus, quam maris ira nequit,
Nunquam exul, sempérque suis in sedibus hospes,
Per regna humanis inuia quatit iter.
Vnde immane trahit per plana liquentia dorsum
Monstrum ingens æquans iugera mole nouem?
Arduus hic Cetus populosum territat agmen,
Ventosisque, tumens mole, triumphat aquis.
Ore duo ex omni surgentes ordine dentes
Caucasæam vincunt robore duritiem.
Gutturis ingentes quando diducit hiatus,
Marmora tota haurit, marmora tota vomit.
Dum timidus fugio portentum immane profundî,
Traiectis tutum sentio littus aquis:
Iàmque fatigatis purus se faucibus æther
Insinuat, pulso mens recreata metu est.
Expansis proh quale genus secatur aëra pennis,
Alatisque equitat turba canora notis?
Mille volando sinus, millena volumina torquet,
Et resonis tremulum complet inane modis.
Nata Aquila audaces in cœlum tollere nîsus,
Se liquidis agili corpore librat agris.
Illa tumet fastu, & primæ sibi conscia sortis
Erigit ante alias imperiosa caput.
Explorat Phœbum, & non caligante tuetur
Lumine, mentito fulgura sole vibrat.
Incuruîque pedes falcatis vnguibus horrent,
Nam consanguineâ viuere gestit aue.
Improba se bifidi protendunt cornua rostri,
Pars incuruatâ cuspide summa rîget.
Pauo coloratis fulget maculosus ocellis,
Non tot picturas discolor Iris habet.
Æmula floriferis caudæ spectacula pratis
Pandit, & astriferis inuidiosa plagis.

Se rotat & plumas, & se miratur euntem,
Colla tument, fastu crista superba tremit:
Et, modò mireris, stellata volumina gyrat,
Si tacitus spectas, protinus abdit opes.
Nescia magnanimos Perdix tentare volatus,
Demissam celeri remige radit humum.
Turba Gruum factò volitat per inane trigone,
Et vigiles errat pondere onusta pedes.
Subtiles Vespertilio de pellibus alas
Gestat, cognati cætera Muris habet.
Porphyrìo rubet vngue, vires tu Psittace dorso,
Cuius in humanos lingua mouenda sonos.
En graditur Gallus metuenda leonibus ales,
Purpurat huic cristâ verticis altus apex.
Per calamos currit gemmarum argenteus ordo,
Et palea aurato murice tincta micat.
Vox immanè sonat, strepitumque imitata tubarũ
Sopitum vigili suscitât ore diem;
Par superis Phœnix vitale requirit Amomum
Vna olim proles, & pater ipse sibi.
Flumineus drensât per stagna loquacia Cygnus,
Vicinamque canet præsciùs ipse necem.
Nec nostro te prætereo, Philomela, canentem
Carmine, tecum ambit musa ciere modos.
Garrula mentitas hinc lingua mouetur in iras,
Lenior audaces mitigat inde sonos:
Cantum hebetas, acuis, dilatas, contrahis, vrges,
Concidis, breuias, porrigis, articulas.
Sic ludit faciles vox vna industria ludos,
Docta vel innumeros vna referre modos.
It, galeata caput, doctòque per aëra gyro,
Carmine vicinum mulcet Alauda polum:
Glottèrat elingui officiosa Ciconia rostro,

suas , & iumenta , & omne reptile terra in genere suo , & vidit Deus quòd esset bonum.

Et ait : faciamus hominem ad imaginem & similitudinem nostram , & præsit piscibus maris , & volatilibus cœli , & bestiis , vniuersæque terra , omnique reptili , quod mouetur in terra.

Et creauit Deus hominem ad imaginem & similitudinem suam : ad imaginem Dei creauit illum , masculum & fœminam creauit eos.

Benedixitque illis Deus , & ait : Crescite , & multiplicamini , & replete terram , & subiicite eam , & dominamini piscibus maris , & volatilibus cœli , & vniuersis animantibus , quæ mouentur super terram.

Dixitque Deus : ecce dedi vobis omnem herbam afferentem semen super terram , & vniuersa ligna , quæ habent in semet-ipsis sementem generis sui ; ut sint vobis in escam.

Et cunctis animantibus terra , omnique volucris cœli , & vniuersis , quæ mouentur in terra , & in quibus est anima viuens , ut habeant ad vescendum. Et factum est ita.

Viditque Deus cuncta , quæ fecerat : &

erant valde bona. Et factum est vespere & mane dies sextus.

SEXTA dies aderat post nati exordia mundi,
 Bísque recéns natis sol nouus ibat equis :
 Cúm Deus ; ite (inquit) totis animalia terris ,
 Tu quoque foeta graues exere terra sinus.
 Omnigenós fundit tum iussa repentè colonos ,
 Hinc armenta ferax parturit, inde greges.
 It vastâ se mole ferens genus acre Leonum ,
 Et ceruice iubas excutiente fremit.
 Cauda minax dextrúmque latus læuúq; flagellat,
 Oréque de rabido spumea flamma salit.
 Lentanti gressu tardant coí Elephantes ,
 Grandia gibbosus terga Camelus agit.
 Puluerem bellacis equi terit vngula campum ,
 Et, fræno huc illuc non remorante, ruit.
 Tesqua petunt vmbrosa Lupi, ramosâque Ceruus
 Arduus elatâ cornua fronte gerit.
 Ina Lepus quærit sepis penetralia : versat
 Innatum Vulpes ingeniosa dolum.
 Naturæ vigilantis opus Formica laborat,
 Erudiet natos docta magistra viros :
 Materiam ingeniti perquirít vbique laboris ,
 Atque suum mirâ colligit arte penu :
 Priuatos doctâ componit lege penates ,
 Tam bene constructi prouida cura foci est !
 Ipse sua Bombix tumultum sibi fabricat arte ,
 Qui mox in forma Papilionis erit,
 Euomit auratâ vestes spumofus ab aluo ,
 Quas hominum rabies ambitiosa sitit.
 Serpentum cristata cohors atróque veneno
 Colla tumens , Afris súbila tollit agris.

Funereus Libycis reptans Basiliscus in aruis
Se variis spiris in sua membra plicat.
Tortilis inflexos sinuat se Vipera in artus,
Officiosa suis, exitiosa sibi.
Audires (si nata sonos admitteret auris)
Vnà vlulare lupos atque vlulare canes.
Frendet Aper, rugitque Leo, Pantheraque caurit,
Mugit Bos, Elephas barrit, & hinnit Equus:
Hircus olens medio caprarum ex agmine murit,
Blaxterat hinc Aries, indéque balat Ovis.
Fœdus quiritat Veruex, Sus hispida grunnit,
Hinc Vulpes gannit, vagit & inde Lepus.
Sed quid sydereo descendit ab æthere numen,
Et facilem artifici pollice versat humum?
Grande aliquid præstat, dignūq; tonante laborem;
Maius, quàm quod adhuc viuere cœpit, opus.
Fingitur humanum mirâ compagine corpus,
Sunt aptata suis singula membra locis.
Supremâ sedet arce caput, spectare paratum
Sydera, & ad patrios lumina ferre lares:
Dein paribus porrecta humeris se brachia trudūt,
Accedit digitis articulata manus:
Inde patet stomachus, venter turgescit in orbem:
Costarum duplex contegit ordo latus.
Crura columna duplex, hinc inde trahūtur in imū,
Fundamenta pedes inferiora tenent.
At frontis proh quale decus! duo sydera fulgent,
Sydera, quæ solis lux peregrina iuuat.
Desuper hæc modico deflexus acumine nasus.
Leni colle tumens inter vtrumque sedet.
Auris hiat parulis sinuoso fornice conchis,
Acceptura datos ianua bina sonos.
Extremum tegitur molli lanugine mentum,

Et rubeis serpit barba decora genis.
 Deductis video quæ propugnacula labris ?
 Quæ miris sepes surgit eburna modis ?
 Obliquo dentes claudunt præsepia ductu,
 Effrænis clauso carcere lingua manet.
 Quis referat, totam sustentet vt ossæa molem
 Machina, scæque æquo fœdere membra ligent ?
 Cognati passim coeunt in vincula nerui,
 Viuida concepto sanguine vena tumet.
 Dûnque loquor, Deus ecce Deus spiramina vitæ
 Affundit cunctis insinuata locis.
 Vitalis tunc membra rogos calefacta pererrat,
 Flexibilisque artus entheus ardor agit :
 Languida membra licet terrenâ mole grauentur,
 Alis nixa suis mens super astra volat :
 Non illi obsistit terræ impenetrabile corpus,
 Non altæ tenebris obsita regna stygis.
 Corporeis quæcunque oculis natura remouit,
 Hæc meliore sagax lumine cuncta videt.
 Exors principij, spatius non clauditur ullis,
 Sed tota in totâ, par similisque sui est :
 Mobilis en facili versat se cardine ceruix,
 Figitur inque solo, figitur inque polo.
 Eminent arx capitis, nam nobiliora locantur
 Quæque loco, ratio prouida, mensusque sagax.
 Nasus odoratur, manus ingeniosa laborat,
 Venâque subsultu perpetuante micat:
 Flexilis arctatur camerato lingua palato,
 Vóxque percussio fornice pulsa sonat.
 Illa per æternos diducti dentis hiatus
 Omnigenos docto format in ore sonos.
 Splenem risus habet, tumidas fel suscitât iras :
 Sanguificum ignitus possidet hepâr amor.

Palpitat æternum iecur almi sanguinis auctor,
Et veluti flabris aëra pulmo ciet:
Cruribus, ut binis, moles adnixa, columnis
Ita facili, & facili mobilitate redit:
O felix nimium sua si bona seruet Adamus,
Otia si placidâ pace quietus agat.
Coniugis ast errat male suadâ vxorius arte,
Et Deus inclamat voce tremendus, ubi es?
Periuro appetiit malum inuiolabile morsu,
Quod malum extemplo creuit in omne malum:
O oculi loculi merito potiore vocandi!
Est animus vestri facta rapina doli:
Vendidit ille cibus cælum puerilibus Adam,
Stultitiâque istâ venditione probat.
Ex illo vindex morborum turba nocentem
Cingit, venturæ nuncia certa necis.
Ex illo infirmos iustus dolor occupat artus,
Febrili languent membra perusta lue.
Noxius in vitæ spiracula liquitur humor,
Guttur & occlusum tussis anihela premit:
Inde grauedo premit, capitis furiosa tyrannis;
Inde podagra, pedum carnificina, furit.
Auolat æterno lugenda dolore voluptas,
Aduolat & nullo pœna leuanda bono.
Hic cunas nati expectat, vouet ille sepulchrum;
Coniugis hic vitam postulat, ille necem,
Imus, & emenso nos sistit tramite meta,
Dêque via comites Cræsus & Irus eunt.
Vita caduca fugit, sensumque resoluitur ætas,
Ut vapor in faciles extenuatur aquas.
Illa procellosis furit interiecta periclis;
Nil non, quod fugitur, nil quod ametur, habet.
Hic cum morte gerit bellum natura, peremptum

Nato restituens exoiente patrem :
Omnia sic, fragili quamuis è stirpe, perennant ,
Æternâque genus lege propagat amor.
Hoc tibi solamen, quod nil sub sole diurnum est,
Omnia sed filo deproperante ruunt ,
Pennatæ volucres ludunt per sydera lapsu,
Quas fata in laqueis implicuere suis ,
Mille, latus leti, iaculis armatur acutis ,
Errat in intentum nulla sagitta caput.
Quot mare rectores spectat, quot tetra dynastas,
Sorbet tot dominos terra fretumque suos.
Cerno mori Alcidem, cuius sensere leones
Robur, & in partes dilaceratus aper.
Heu iacet hic princeps regum, iacet ille sophorum
Magnus Alexander, maior Aristoteles.
Fidentes animi mouere insana gigantes
Prælia, at inuictæ succubuerunt neci.
Sparta superba ruet, quid erunt, nisi nomē, Athenę?
Rudera lucifugis aut habitanda feris?
Occidet ipse Maro, Cicero, Plutarchus, Homerus,
Hippocraténque teget non medicina suum.
Occidet & Christus, soboles æquæua parenti:
Iam nulli post tot funera parca nocet,
Nec tamen hoc duri clauduntur sine labores,
Altera mors superest, vita secunda manet.
Cladibus illa iacet, partis tumet illa trophæis,
Illa superba bonis, hæc metuenda malis.
O læta & tantis vita exoptanda triumphis!
O grauis, & tantis mors fugienda malis!



IEREMIAS
LVGENS.

D. Hieronymus de Ieremia lamentationibus.

HA B E S & in lamentationibus Ieremiæ quatuor alphabeta, è quibus duo prima quasi Sapphico metro scripta sunt, quia tres versiculos, qui sibi connexi sunt, & ab vna tantum litera incipiunt, heroïci coma concludit. Tertium verò Alphabetum trimetro scriptum est & à ternis literis, sed eisdem terni incipiunt, *Ita D. Hieronymus epist. 155. ad Paulam Vrbicam.*

Gregorius Nazianzenus.

EQ V I D E M, vt de me loquar, quoties hunc libellum in manus sumo, threnósque lectito, (id autem facio quoties secundarum rerum insolentiam coërcere huiusmodi lectione studeo) vocem mihi intercludi sentio, lacrymísque obruor, eámque calamitatem velut ob oculos positam videre videor, ac Ieremiæ collamentor. *Gregor. Nazian. Oratione 12.*



THRENI,

SIVE

LAMENTATIONES IEREMIÆ PROPHETÆ.

*Quomodo sedet sola ciuitas plena populo?
Facta est quasi vidua Domina gentium.*

A L E P H.

VNDE Siō, populosa prius, sedet orba colonis,
Amisso coniux vt viduata viro?
Quod prius exegit, soluit nunc serua tributum;
Hostique, vt domino, pensitat æra suo.

B E T H.

Quæq; vocat sōnos oculis, nox prouocat imbres,
Vdæque perpetuis ora liquantur aquis.
Spreta iacet propriis, quos muro textit, alumniis;
Factus & est hostis, qui modò ciuis erat.

G H I M E L.

Quæ prius obsequio populos Iudæa grauabat,
Cogitur externo figere castra solo.

H ij

Nec dum ibi tãtorum stat meta reperta laborum:
Exul at incerto quærit in orbe fugam.

D A L E T H.

Quod pedibus tritum Solymæa ad sacra fe rebat
Obductum spissis sentibus horret iter.
Sunt sine thuri foci: rapido ruit ense Sacerdos:
Quique minister erat, victima dira cadit:
Virginique chori turpi se puluere fœdant,
Et cineres laxis imposuere comis.
Nulla manent veteris vestigia cognita formæ,
Queis nullus pulchro corpore næuus erat,

H E.

Hostis, iam dominus, captæ grauis incubat vrbi:
Diuinæ euentu non caruere minæ:
Impubes traducta cohors ante ora potentum,
Erubuit miris ludificata iocis.

V A V.

Euersâ blandæ charites fugere Sione,
Ore lepos, vultu gratia, fronte decor.
Hostilem ad nutum proceres sine sedibus errant,
Gramine vt impasti deficiente greges.
Cogunturque senes lassis vestigia plantis
Promptius ante suos accelerare duces.

Z A I N.

Sabbata captiuæ ridentur inertia plebis,
Quidquid & augustâ relligione sacrum est.
Et stata festiuo siluerunt carmina cantu,
Imbuit & siccos victima nulla focos.

Diruta templa patent , & nuda altaria lugent ,
Nulláque stat nostris ara relicta malis.

H E T H.

Prima nouis Solyme cumulauit crimina noxis ,
Spiritus hinc tepidis mergitur æger aquis.
Spreuerunt , qui laude prius super astra ferebant ,
Nec tulit è multis millibus vnus opem.
Sed quos crediderat fidos malè cauta sodales ,
Contemptam turpi deseruere fuga.

T H E T H.

Mæret, ad vsque pedes lugubribus obsita pannis ,
Nescia quo fato , quo peritura die est.
Ergo depositæ similis , Deus aspice , dixit,
Erecto quantus surgat ab hoste timor.

I O D.

Diruta quæque cadunt ; totâ pretiosius vrbe
Quod fuit, hostiles diripuerunt manus.
Templa Moabites violat , temerarius Ammon ,
Sacrilegos infert in loca sancta pedes.

C A P H.

Plebs gemit, & gazas optet pro pane pacisci :
Pro minimo expendat maxima quæque cibo.
Condit & humanas cognata in viscera carnes
Non diuturna minùs , quàm violenta fames.
Tardior auxilium cur longa in tempora differs
Promptam olim votis ferre paratus opem ?

L A M E D.

Aspice, sitne meo similis sors vlla labori ,
Hoc quicumque facis calle , viator , iter.

Me Deus attriuit ; matüram vt vinitor vuam ;
 Quis tormenta meis æquiparanda tulit ?

M E M.

Flamma vorat teneras cœlo demissa medullas ;
 Vitæ emendandæ flamma magistra meæ.
 Subdola composuit fugitiuis reria plantis ;
 Et refugum cincta compulit ire via.
 His ego suppliciis studia ad ineliora vocabar ;
 Nec documenta tamen mens rudis illa capit.

N V N.

Crimina nam rigidus numerauit singula censor ;
 Colla catenarum mole grauata gemunt.
 Vincula luctando nequicquam demere coner ;
 Nam nodos nodis implicuere nouis.
 Subtendit plantis laqueos, retróque supinam
 Mœstitiæ duro turbine strauit humi.

S A M E C H.

Vt sit virginibus vincli spes nulla ingalis,
 Sítque puellarum nulla futura parens.
 Præla velut vino, iuuenum sic sanguine fuso
 Latè spumantes intepuere lacus.
 Vt mare calcatis fœdaturum spumat ab vuis,
 Sic noto exundat sanguine pinguis humus.

A I N.

Proinde fleo, largique fluunt è pectore riuï,
 Vda retro in patrias ora reflecto domos.
 Dúmque gemo, tum sese hostis iactantior effert,
 Et plausum à lacrymis lætitiámque capit ;

Hinc illucque vagi ciues sine viribus errant.

Cœpit vbi hostilis præualuisse furor.

Nostra à clade decus, laudémque à vulnere sumit;

Ingens hoc veluti, gloria, fonte fluat.

P H E.

Poscit opem superos, motis pro voce lacertis,

Irrita plangentis vota Sionis eunt.

Fœda iacet, ceu virgo lues quam menstrua fœdat,

Cui tabo circum palla fluente madet.

Omnibus est miseranda, nec est miserabilis vlli,

Feruida nec stimulos temperat ira suos.

S A D E.

Has meruit dudum scelerata superbia pœnas,

Heu nimis in cultus ingeniosa novos!

Me quibus assimilas ac me quibus arbiter æquas?

Quælibet est longè, quàm mea, plaga minor.

Indiscreta simul delectu ad funera nullo,

Sublati ante diem procubere suum.

Auribus atque oculis nostros haurite dolores,

Seruit vt externo virgo puérque solo.

C O P H.

Quósque magis fidos sperabam rebus in arctis,

Incautam laqueis implicuere suis.

Grandæuósque senes passim, sacrosque ministros

Longior obselsâ messuit vrbe fames :

Quod vix in pueros ferrum intractabile tentat,

Hoc facit, in gremio matris, acerba lues.

Vix vtero surgunt, & tantùm ad funera nati,

De tumulo in tumulum profiliere nouum.

H iij

Et vitæ in foribus, matrum quos vbera lactant,
Matrum ante ora, cibo deficiente, ruunt.

R E S.

Respice quàm pœnis, genitor, malè vexer amaris,
Vix tuta interno viscera ventre tremunt.
Omnia stant inimica, grauique simillima morti,
Dura fames intus me premit, arma foris.

S I N.

Audiuere quidem haud exaudiuere querelas,
Irato gaudent me cecidisse polo:
Quod Deus inflixit, non est curabile vulnus,
Et tale humana plus valet arte malum.
Quæ cruciat nos ira, reos vertatur in hostes,
Luceat innubi purior axe dies.
Siue aduersa premant mentem, seu prospera laxet,
Fit nihil ignaro vel renuente Deo.

T H A V.

Ad tua se rea mox B A B Y L O N prætoria sistat,
Vt ciues pœnas, quas inuere, luant.
Deficio sed enim, mens ægra fatiscit ab ictu,
Viscera ab exangui contremuere metu.



VESPERÆ
MARIANÆ.

H v

2. 10. 1937
2. 10. 1937



V E S P E R Æ
M A R I A N Æ,
S I V E

P S A L M I D A V I D I S

In vespertino Officio B.M. Vir-
ginis recitari soliti.

P S A L M V S C I X.

Totus est de regno, Sacerdotio & pote-
state Christi.


Dixit Dominus Domino meo, &c.

1. **H**Æc Domino Dñs : lateri confide paterno,
Assignat meritū dextra propinqua locū.
2. Donec ouans fusos inimica cæde rebelles
Subiiciam plantis, vt tabulata, tuis.
3. Nobilis è sacrâ tibi virga Sione virescet,
Aduerso hostiles contere marte globos.
4. Te manet illustris supremâ in luce triumphus :
Nondum nata dies, cū mihi natus eras.
5. Iurauit Dominus, nec cum iurasse pigebit,
Sacra quòd Antistes Melchisedecis agas.
6. Dextræ adstat Dñs, latus ambit, brachia firmat:

H vj

Conterit irato regia colla pede:

7. Ius dabit, Angelicas cupidus reparare ruinas,
Et capita alta solo, cæde frequente premet.
8. Mortalisque bibet rubro torrente viator,
Augustumque adeo tollet ad astra caput.




PSALMVS CXII.

Prouocat ad Dei laudes, qui cùm sit
maximus, curat minima.

Laudate pueri Dominum, &c.

1. **D**IVINAS, pueri, tenero de gutture laudes,
Nec satis expertis dimidiate sonis.
2. Nomen adorandum, & sacro venerabile ritu
Tempora nostra canant, secla futura colant.
3. Continuos nomen Domini sibi poscit honores,
Quà sol nocturnas linquit & intrat aquas.
4. Excedit velut auctor opus, quodcumq; creatū
Cuius honor toto latius orbe patet.
5. Quis Domino certet, qui, quamuis incola cœli,
Dignatur curis inferiora suis?
6. Sordida diuitibus mutat inagalìa tectis,
In turpi abiectis stercore præbet opem;
7. Et dat honoratos inter considere ciues,
Et populi proceres demeruisse sui.
8. Solatus steriles, longo beat agmine prolis,
Quos Lúcina rhoros inuidiosa fugit.






P S A L M V S C X X I.

David felicitatem Hierosolymæ prædicat, præsentem gratulatus, æternam apprecatus.

Latatus sum in his, quæ dicta sunt mihi.

1. **I** BIMVS, optatus pepulit mihi nuncius aures,
Atria clausa prius, iam reſerata patent:
2. Spes erat hæc, cū tēpla pedes Solymæa tenerēt
Præ nimia stantes religione loci. [ces,
3. Vrbs Solyma externas princeps supereminet ar-
Hic ubi mens vna est ciuibus, vnus amor.
4. Huc reduces venere tribus, populiq; frequētes,
Multaque lustratis dona tulere focis.
5. Namque perorandis steterunt prætoriacausis,
Iessæa hîc sedes, imperiique locus.
6. Arma procul, Solyma, & pacis depolce quietē:
Belli anno, pacis præualet vna dies.
7. Sit tibi pax per te, mutantur in horrea turres,
Occupet vna arces, Marte silente, Ceres.
8. Longa tibi firmæ voui solatia pacis,
Namque mihi frater, qui tibi ciuis erat.
9. Quod sedē hanc arcâ Dominus tēplôq; sacrarit,
Ciuibus optavi prospera quæque tuis.






PSALMVS CXXVI.

Spem in vno Deo collocandam canit.

Nisi Dominus edificauerit, &c.

1. **N**I stabili diuina manus fundamine firmet,
Nutantem sequitur prompta ruina domū.
2. Ni suprema tuas seruet custodia turres,
Excubias vigiles miles inanis obit.
3. Vos iubar infomnes vanum est præuerrere: fessis
Debetur noctis tempore, iusta quies.
4. Æternum famulis cum iusserit esse soporem,
Mox hærede dabit feruere prole domum.
5. Vt validis tela erumpunt contorta lacertis,
Sic qui fæx orbis, quisquiliæque iacent.
6. Felix! qui pharetras istis compleuerit armis,
Aduersi spernet iurgia rauca fori.



PSALMVS CXLVII.

Ad recolenda diuini numinis beneficia
Hierosolymam inuitat.

Lauda Ierusalem Dominum.

1. **N**VMINIS in laudē Solymææ assurgite turres,
Celsa Deum supra culmina tolle, Sion.
2. Namque seris portas validè obfirmauit ahenis,
Largus inexhaustas ciuibus auxit opes.

3. Qui tua vallantem posuit confinia pacem,
Messe suburbanos diuite complet agros.
 4. Candentes vestit niuibus, ceu vellere, colles,
Et cœlum, vt sparsō puluere, nube tegit.
 5. Imperat; Imperium tellus aurita capeffit,
Quæ grauis, ad nutus obsequiosa volat.
 6. Stagna gelu stringit, stant plaustra, vbi cym-
ba cucurrit :
- Quis iuuet in tanto frigore membra calor ?
7. Si iubeat, glacies resoluta liquefcet in vndas,
Erumpet iussas, si velit, Auster aquas.
 8. Ifacidas docuit missis, mandata, Prophetis,
Quæ dena in tabulis scripta duabus erant.
 9. Haud simili gentes alias dignatus amore est,
Scit quibus legum non manifesta dedit.

✠ ✠

C A N T I C U M

B E A T Æ M A R I Æ V I R G I N I S.

Magnificat anima mea Dominum.

1. **M**AGNIFICAT Dominum, diuósque extol-
lit honores
Quæ vix lætitiâ mens capit ipsa suam.
2. Spiritus exultans effuso in gaudia sensu
Suaue salutifero numine carmen init.
3. Quod bonus ancillâ vultu dignatus amico est,
Secula fœlicem posteriora canent.
4. Scilicet indulst mihi maxima maxim⁹ auctor:
Vnde memor sanctum uomen in astra feram.
5. Quos culpæ nouit timidos, rectique tenaces,
Fœlici prolem sorte patrêmque beat.

6. Firmavit nervos, exertaque brachia strinxit :
Corda procul votis , ambitiosa facit.
7. Quos decus inflavit , deiecit sede , locavit ,
Qui se fortunâ continuere suâ.
8. Diutius inopes cumulans, dimisit inanes
Aggestis visos intumuisse bonis.
9. Induit Isacio ductum de germine corpus ,
Réque probat pacti se meminisse sui.
10. Ut seros habuere patres, promissa per annos ,
Abramiúsque parens , Isacidúmque genus.
Sit decus æternum Patri, Natóque perennis
Gloria, Spiritui non periturus honor.

AVGVSTISSIMÆ COELI
REGINÆ VOTVM.

MUSA, cani solitas tibi laudes vespere, dicit :
Sis vatis vitæ vespere, VIRGO, memor.



**MVSÆ TYRONENSES
IN MORTE**

ILLVST. ET REVERENDISS. D.D.
BERTRANDI D'E'CHAVS
ARCHIEPISCOPI TYRONENSIS,
MOERENTES ET AFFLICTÆ:

IN ADVENTV
ILLVST. ET REVEREND. D.D.
VICTORIS BOVTHILLIER
ARCHIEPISCOPI TYRONENSIS
RECREATÆ.

EPITAPHIUM.
HIC SVNT FODINÆ
NON SEPVLCHRVM.

• • • • • LAT ET • • • • •

Cor charitate aureum, manus Regiis Eleemofynis
argentea, pectus constantiâ adamantinum, cor-
pus fanitate æneum; sed melius difces ex
eo quod non fuit, quid fuerit

BERTRANDVS D'E'CHAVS.

NON fuit natalis foli incola, licet defideratifsimus,
Quia Nauarra cum forori Galliæ commodauit.
Non fuit Cardinalis, nifi per regem designatus,
Quia fi optauit, non anibiuit.

S E D


Fuit apud duos nostros Nauarræ Reges in honore maximo,
Quia eius familia duos primos Reges Nauarræ dedit.
Fuit digniffimus per viginti annos Turonenfium Epifcopus,
Quia per totidẽ annos in Epifcopatu Baionenũ tyrocinium
Obiit alterâ poft Pentecofte die, (poftuit.
Quia Ordinis fancti Spiritus Commendator erat.
Obiit poft fufcepta Ecclefiæ Sacramenta fanctiffimẽ,
Quia vitæ speculo mortis fpecies refpondet.

I M O

Viuir potiùs etiamnum in terris nobiliffimẽ.
Quia in Nepote viuir vigeſimo tertio familiæ Vicecomite.
Viuir potiùs apud cœlites glorioſiffimẽ,
Quia hîc cœleſtem vitam inchoauit. (portatus.
Ad quos virtutum alis, gregis precibus, indigetum votis eſt af-
Vixit, ſi tenipus ſpectes, diu: ſi moriendi neceſſitatem ſatis:
ſi merita, abundẽ.

V A L E.

VT MORIENS VIVAS, VIVE VT MORITVRVS,



MVSÆ MOERENTES.

ERgo sacrilegis gaudes, Libitina, rapinis;
 Et metis auratum, ferrea, falce pedum?
 O fera mors, & adhuc à cæde cruenta Nepotis
 Ecquid inexplētâ cuspide tollis Auum?
 An maiori ausu, clarâ splendescere prædâ
 Appetis, ô nostris ambitiosa malis?
 Debueras vnâ saturari cæde: recenti
 Imbre exhausta, nouo lumina rore carent.
 Aurea quæ rupit pretiosæ vellera vitæ
 Dexterâ? quid dixi, dexterâ? læua fuit.
 Impia nocturno velâsti crimen amictu,
 Horruit ipsa nefas exitiale dies.
 Vespertina dabat solitos campana receptus,
 Ferali cecinit cum Libitina tuba.
 O nox Cimmeriis plusquam damnâda tenebris;
 Quæ suprema tibi, quæ mihi dira fuit!
 Vespere fata subis: sol vespere conditur vndis:
 Deliquium fratri Cynthia sola creat.
 Nocte cadis: pullo tellus se vestit amictu,
 Et præit exequiis pompa paranda tuis.
 Serò oculos claudis, claudit tunc lumina somnus.
 Vltima perfecti meta laboris erat.
 Subsequeris solem, comes indiuisus ad umbras:
 Phosphorus alter eras, vespere alter eris.
 Vere cadis, flores tumulo ne forte deessent:
 Pullulat ac mœstis vna cupressus agris.
 Turo floris amans, florem sibi plorat ademptum:
 Dumus erit, regni quæ prius hortus erat,
 ¶ utinam nostro redimatur funere funus,

Et vindex vitæ sit mea vita tuæ !
 Funereo Phœnix surgit rediuius ab ortu;
 Ipse sibi proles, & pater ipse sibi :
 Sit tibi mors rediuiua, sit & vitale sepulchrum :
 Aut tuus, aut noster, sit tibi vita, cinis.
 Pectora quid fletu, quid rumpimus æthera votis?
 Hæu ! lacerum nunquam Parca retexit opus.
 Flere vetas, dum flere iubes: sibi iussa repugnant;
 Namque peris oculus, quo mihi flendus eras.
 Ipse tibi pugnam prohibes & poscis amorem :
 Cor mihi namque cadis, quo fuit omnis amor.
 Exigis & renuis mandato dispare cultum :
 Nam caput occumbis, quo reuerendus eras.
 Sed quid ego vndosis lacrymosa trophæa fluentis
 Erigo ? quod nixum est flumine, stare nequit.
 Vos ergo Aoniæ fratrem plorate sorores,
 Si lacrymæ legem versibus esse sinunt.
 Vestrum est è gelidis manes reuocare sepulchris,
 Ferre triumphatâ, viua trophæa, nece.
 Pergite ferales vlcisci carmine parcas :
 Sit vestro, mortis fida reclusa, stylo.
 Surgat & educto composta cacumine moles,
 Quæ ferat æternis Præsulis acta notis.
 Tūque, Erato, cæmenta feres ex diuite gazâ,
 Quam Ganges alueo versicolore rotat.
 Affer Erythræis, Clio, conchylia saxi :
 Materies raro rata paranda viro.
 Marmoreos postes atque ære loquentia signa
 Dædaleâ prudens Pallas in arte dabit.
 Desuper æthereos Christus petat arduus axes,
 Aliger accensam gestet vtrinque facem.
 Vir diuine peris, tecum & diuinus Apollo :
 Hinc poni in tumulum debuit ara tibi.

Signeturque loquax victuro carmine marmor:
 Disce haud diuinos posse perire viros.
 Interiit, si sancta fides, si gentis auitæ
 Gloria, si pietas interiisse potest.
 Vixisti, Bertrande, Polo, sacræque Mineræ;
 Téque Polus prohibet, téque Minerua mori.
 Viuet honos, nullo & virtus interlita fūco,
 Læsaque non ullâ suspitione fides.
 Nil genus attingo: Laudem superauit auitam
 A gestis virtus nobilitata suis.
 Sceptrigeros signat Proauos tibi fama, tuosque
 Nauarræa refert sceptrâ tulisse patres.
 Ter septem binosque Nepos recto ordine cōplēs
 Procomites, tantos colligit vnus auos.
 Quin etiam Patribus maior superaddit honorem;
 Quæque aliis fuerant singula, solus habet.
 Nec te consiliis regnum iuuisse silebo,
 Et studiis Proceres demeruisse tuis.
 His meritis ex parte dedit fors præmia: quanquā
 Sæpe malis exstet prodiga, parca bonis.
 Prima Diocesis Baiona, Turóque secunda,
 Tertia perpetuus debuit esse Polus.
 Turoni Baiona, Turo prælusit Olympo,
 Mercedi, vt metitis, quò suus ordo foret.
 Ille quaterdenos bis vixit, & ampliùs annos:
 Sic Martinum annis, vt pietate, refert.
 Vix mors ausa virum dubiis tentare sagittis,
 Nescia, Mortalis, Semideusne foret:
 Aggreditur trepidas, læso vix pectore, plantas:
 Decreuitque domo claudere, deinde thoro.
 Conatum virtus & inexpugnabile pectus
 Sustinuit, victi succubuerè pedes.
 Pallor abest: nescit fato expallescere virtus;
 Occiduo soli concolor ore rubet.

Et nota virtutis viuit morientis in ore :

Exiit mortis forma, sed arma manent.
Corpore defesso, mens indefessa vigeat,
Et cœli ambibat liberioris iter.

Odit degeneres artus, & inertia membra
(Nam caret officio pēsque manūsque suo.)

Indignata premi, torporis & inscia cessit,
Ut requiem membris irrequieta daret.

Exiit in superos, quos mente reuoluerat, orbes,
Factus & est hospes, qui peregrinus erat.
Spiritus æthereo descenderat igneus axe,
Liberâ quo scandit spiritus astra, die.

Diuinum in terras celso venit æthere Pneuma,
Bertrando ut rectam monstret in astra viam,
Sydera iam propiore oculo cognata recenset:

Diuiditur, cœlo pars sua, parsque polo est.
Illa quaterdenos diademate cincta per annos,
Funestâ ceruix fronde reuincta iacet.

Illa manus, quæ regis opes disperfit egenis,
Frigore ferali congelata riget.

Illi oculi bina astra bonis, duo fulgura prauis,
Ante diem extinctas occulere faces,
Ante diem! fallor, virtute grauatus & annis,
Maturusque polo non cadit ante diem.

Purpureo centum voluissem vellere lustra,
Si me ducta tibi stamina nente forent.

Sed malè lanificæ vitæ dant iura sorores,
Et pudet à sexu debiliore regi.

Quid non tota suis Turo bombycina textis
Sufficit expletis serica pensa colis?

Diues opum Turo sacræ cur aurea vitæ
Stamina, pro lanâ deficiente, negat?

Sed superûm inuidia est, verbis ignoscite diui,
Mens incauta magis, quàm scelerata fuit.




MVSÆ RECREATÆ IN ADVENTV

D. D. VICTORIS BOVTHILLIER
successoris.

O Dolor ! ô casus ! proh non solabile fatum !
Sed, qui scit gemit⁹ vincere, VICTOR adest.
Extinctam reparat VICTOR, lux altera, lucem ;
Sydere, ceu sydus deficiente micat.
A tura te nouit, nouitque Bononia testis,
Quàm vigili cures sedulitate gregem.
Et tibi trina, licet non sit Romana, Tiara,
Ter magni nomen trina Tiara facit :
Primus amor sacro venerari numen amore :
Proximus est agnis inuigilare tuis.
Facturus populis exempla sequacibus anteis :
Respondent verbis æmula facta tuis.
Cecropiam studiis animas, Latiâmque Mineruâ,
Pastorale ornas nobilitate Pedum.
Est seges ampla tibi, sed virtus amplior extat :
Elige quidve prius, posteriûsve velis.
Fratris certa fides longo se prodit ab vsu,
Ménsque ministeriis intemerata suis.
Otia ferre nequit, nec rerum mole grauari :
Sed curas mirâ diuidit, arte suas.
Sufficit innumeris vnus, simul impiger actis,
Inque labore quies, inque quiete labor.
Viuerè tu Musas primus Turone dedisti :

Te memor æternum viuere Musa dabit :
 Mille tuos plectris Helicon celebrabit honores ,
 Quos audire minus , quàm meruisse cupis .
 Acta videns ne quis inensuram ponat agendis ,
 Præteritis tenebras adiicienda dabunt .
 Urbi pererrantes in claustra reducet egenos ,
 Qui cingunt tritas obsidione vias .
 Cerno importunas templis exire phalanges ,
 Mendica hospitibus agmina stare suis .
 Hunc onerare colos , hunc exonerare videbis ,
 Hunc digitis lanas extenuare suis .
 Iam facit attentus , pulso crabrone , Sacerdos ,
 Pacatisque silent verba profana sacris .
 Et cum mendicis communi carcere frænas
 Iuramenta, dolos, otia, furta, neces .
 VICTORIS titulum claris virtutibus æquas :
 Et nomen , morum nobilitate reple .
 VICTOR ades. Præfente latet VICTORE cupressus ,
 Mutatis VICTRIX pullulat arbor agris .
 Surgit PALMA, viget LAVRVS, reuirescit OLIVA :
 Cedit & Alcinoj luxuriosus ager ,
 Quo fers cunque pedē , volucris VICTORIA pēnā
 Aduolat, & cœptum præuia sternit iter .
 VICTOR ades, sperat palmas Ecclesia VICTRIX ,
 VICTOR Io, Turo, concine VICTOR Io .





SELECTA EPIGRAMMATA.



DE ROMA EVERSA.



VID veterem Romam Roma in præ-
sente requiris?

In media Roma sepulta iacet:
Palluit extinctū signis tabētibus aurū,

Romam multa dies fecerat, vna tulit:

Romani Imperij solus manet Albula testis:

Mobilibus fauit mobile tempus aquis.

Firma ruunt, dum fluxa manent: & dispare sorte

Lapsa est vrbs stabilis, labilis vnda stetit.

Quid non æquales ambo traxere ruinas?

Est Saturnus edax, sed fugit esse bibax.

*Mercator Thessalonicam cum duobus li-
beris ingressus iubetur unum è liberis tor-
tori dare, ut numerum expleat cadendo-
rum: cum non posset, casus uterque est
filius.*

VNA mihi superest saturando victima cultro,
Victima de natis vna legenda tuis:

Legē habet & numeros, certōsq; vbi fixerit ictus,

Vaginam repetet sica quicquid suam?

Vota probo partim, partim vota improbo; votis
 Et potiar nostris, & potiêre tuis,
 Elige de geminâ, quam nolis vivere, prole;
 Et quam de gemina vivere prole velis.
 Aspicit hanc, probat hâc, illâ aspicit, approbat illâ;
 Vtraque digna fuit vivere, neutra mori.
 Quem legeret, nesciuit amor, nesciuit & ensis;
 Et quia cæcus amor, mors quoque cæca fuit.

De Sylua Bacchanalium die combustâ.

NE tibi cras capiti cinis imponenda deesset,
 Sylua hodie cineres igne cremata dedit.

*In Calvinum vetitis diebus carnem
 edentem.*

SATVRNI Venerisque die conuiuia carne
 Sternere christiadas Trina Tiara vetat.
 Et dum passuro flet quadragesima Christo
 Assidua terimus corpora nostra fame.
 Et dum grana Deum terris, messêsque rogamus,
 Cæruleus reficit corpora nostra cibus.
 Calvinus carnem æternos mandauit in vsus,
 An quia vult refici quæ fuit vsta cutis?
 Nunquid Pythagoræ redierunt dogmata? nūquid
 Calvinus prisco tempore Carneades?

*De Diuo Paulo moriente, & lac, loco
 sanguinis, emittente.*

ENSE ferit lictor, lactis fluit imber ab ictu,
 Dulcia nempe sibi funera lacte probat.

Caligula petit equum in Consulem.

QUID Fabios proſit cinctum veſtire Sabinū ?
 Turbāque nobilium quid trabeata iuuat?
 Sit collega mihi ſonipes, ſit conſul, & ultra,
 Si quid Roma ſuo conſule maius habet.
 Nō miramur equum cōmitem ſibi poſcere Caij,
 Poſtulat ille pecus, qui pecus ipſe fuit.
 Parta tibi iam, Roma, ſalus & gloria gentis,
 Erige iam Bruto conſule Roma caput.

De niue ſub finem Decembris.

ALBI CAT expirans niueo candore Decem-
 ber:
 Annum canities hæc docet eſſe ſenem.

De tumulto cauſidici.

MORS adeōne potens? Lites mihi mille li-
 cebit
 Soluere, ſola grauis lis mihi mortis crit.

De Ludouico Iuſto moriente.

MAGNA potes, maiora cupit te Gallia poſſe:
 Regnantēque Ioui te petit eſſe parem.
 Multa licet poſſis, votum eſt te plurima poſſe:
 Spem potis eſ noſtram vincere, vota nequis.
 Aſt ubi te potuiſſe vident finire labores,
 Optaſſent Galli te potuiſſe minūs.

De Porcia poſt coniugis mortem.

PORCIA quid flammās querit viduata marito,
 Et rapido accenſas ebibit ore faces?
 Quod vulnus fecit gladius, confecit vtrumque,

Nec malè disiunget, quos bene iunxit amor.
 Quid gladio occubuit Brutus, quid Porcia flam-
 mis?

Hic animam patriæ vouit, & illa viro.

De S. Lucia sibi oculos eruente.

LUCIA ne malè luceret, sibi lumen ademit,
 Gratiùs & superis nunc sine luce micat.

*Franciscus de Sales dicebat, si ablatos
 ab inimico sibi geminos oculos Deus re-
 stitueret, iis benignè inimicum aspectu-
 rum.*

NVMEN corporeo si posset lumine cerni,
 His oculis numen cernere dignus erat.

Maritus epitaphium ponit uxori.

VXOR, Io, iacet hîc, utrique est meta labo-
 rum,

Olli non maior, quàm mihi, parta quies.

Margarita tumulus lacrymis aspersus.

HIC tot inexhaustis fluxerunt flumina riuis,
 Ut meritò Oceanum dixeris esse nouum.
 Pro tellure fretum cernis, pro marmore conchâ,
 Nam pretiosa diem Margaritis intus agit.

*Cur vita hominum nunc sit breuiar,
 quàm prius.*

+ **T**VNC rudis errabat vano mors sæpius ictu,
 Sed nunc experto doctior ense ferit.

*De Diogene qui Herculis statuam
combussit.*

CARBONES versat Cynicus, cinerésque re-
uerfat,

Si qua suo lateat flamma sepulta foco,
Siccáque per vacuum conquirat ligna culinam;

Friget at igne focus, torre culina vacat.

Quid faciat? cilice excussum damnatur ad ignem

Herculis antiquo, quæ stat imago tholo:

Alcidísque cremans victricia brachia, dixit,

Vis nulla, aut nostras molliet ista fabas.

Qui totum infractis domuisti viribus orbem,

Orbiculos lentes disce domare meos,

Hic quoque sudabis, domitísque domabere pis:is:

Lens mage bis senis est metuenda feris.

Tum molles tactu, suauésque ad guttura senfit

Hercule perdomitas auxiliante fabas.

Tertius & decimus tandem fuit atque supremus

Herculeos inter maximus iste labor.

In contumacem mulierem.

VXORI quem tristis Hymen sociavit iniquæ,
Illi equidem misero fors inimica fuit.

Si quid amo, pugnax ruit in contraria coniux,

Nec confert sensus ad mea sensa suos.

Si volo fortè nigrum, vult vxor protinus album;

Album si cupio, protinus illa nigrum.

Anne hanc dissidij nutrix academia fouit?

An sæuo Eumenidum de grege quarta ruit?

Sed quid opis misero, vel quæ panacæa dolori?

Velle malum simula, tum volet illa bonum.

De Davide, dum suiret, aquam oblatam proiiciente.

QUID facis ô Princeps? nunquid iam Syrius ardet,

Et cuncta æstiuus sol tepescit coquit?

Nunquid & exhaustis Iordanes deficit undis;

Parcâque iam latice fontis origo negat?

Quin etiam siccâ cruciantur fauce phalanges,

Nec datur afflictis gutta petita labris.

Cur tibi cur, princeps, oblatam proiicis undam?

Undam, quæ tanto parta labore fuit?

O regem eximie mentis! nam sorte sub æqua

Quando sitit princeps, plebs recreata bibit.



FRANCIADOS
LIBRI DVO.

LECTORI BENEVOLO.

QVOTIES *Nouam Galliam loquentem audieris, intellige Poëtarum more quasi deam Nova Francia Presidem, quam imitatus Claudianum aliquando doctam, & peritam rerum, aliquando barbaram, & incultam induco; atque eo quidem ordine, ut primùm incommoda sua, miseriâsque exponat DELPHINO, ab eo Elegiarum initium, & finem paucis faciens; deinde verò auxilium fusè postulet.*



De Nouâ Franciâ D. IOSEPHO dicatâ.

*Iosepho arboribus diues Noua Gallia sacra est;
Quippe venit gnaro sylua secanda fabro.*



FRANCIADOS

LIBER PRIMVS

Incommoda & calamitatem Nouæ
Franciæ explicat.

ELEGIA PRIMA

AD DELPHINVM.

*Bella, & crudelitas Canadensium in
captiuos.*

ASPERA si scribam, si legeris aspera, parce,
Attramenta cruor, pennæque sica fuit.
Gnosia contorto didici torquere lacerto,
Mars doctor, bellum lectio, tela libri.
Sanguineo bellum calet insatiabile campo
Dux milésque pedes, nemo meretur eques.
Hanc rabiem fugit cum lacte parentis alumnus,
Ille furor teneris prima fit esca labris.
Sic pax rara mihi, pacis constantia nunquam,
Martius aut infert, aut subit arma locus,
Captiuos non ira brevis, non bellicus ardor,
Impetus aut dextrâ præcipitante necat.
Pascere stat ferro rabiem pœnisque furorem,
Tormentis oculos, suppliciiisque manus.

Parcendi ô feritas ! productâque vita dolori !

Non tam pœna necis, quàm mora tanta premit.

Improuisa minùs, quàm mors præuisa, fatigat :

Telô illa, at telis hæc ferit atque minis.

Mitiùs atroci feruus damnatus arena

Cingitur Armeniis præda voranda feris.

Nonnunquam religat syluestri brachia tranco,

Turbâque certatim docta ferire, ferit.

Syluicolæ in misero ne desit funere sylua,

Ecce aliam syluam densa sagitta facit.

Mortis & alterius, mors prouocat altera, gressum :

Vt pingues laniat carnificina boues.

In promptu pes tela facit, manûs arma ministrat,

Dente terunt, laniant vnguibus, ore vorant.

Hic malas onerat pugnis, fude perforat aures :

Hic quatit euulsiste tempora nuda pilis.

Sedibus ille oculos, dentes hic ore reuellit :

Hic aures gladio truncat, & ille manus.

Hic ligat, ille vorat, secat alter, & alter adurit,

Brachia, frontem, oculos, ilia, crura, pedes :

Atque vbi fuscatae crepitant ferrugine carnes,

In rigidas vstæ præcipitantur aquas.

Succedunt gelidis alterna incendia membris,

Pérque humeros errat titio, pérque sinus.

Membra stupes animata lacu, solidata fauillâ,

Non resoluta rogo, non liquefacta vado.

Inter aquas, ignesque, queam vt superesse dolori,

Frigida flagrantem temperat vnda rogam.

Membra ruunt per frustra, cadunt ex ossibus ossa,

Et luxata ferox dextra per exta meat.

Non est hîc, quæ meta solet, mors esse dolorum ;

Hîc vnâ non est cæde redempta quies.

Durior est segni quæ sica fatiscit in ictu,

Quàm quæ prompta manu deproperante ruit.
Dextra renascentes geminat moderata dolores,
Prodiga quæ plagæ est, mortis auara manet.
Mortuus en spirat: nec mors, nec vita relictæ est,
Dimidium viuit, dimidiûmque perit.
Nuda patent, sine pelle caput, sine carnibus ossa,
Et laruam facies excoriata facit.
Sanguis abit venis, de pectore labitur hepar,
Ilia ventre cadunt, osse medulla fluit.
Dpile stat mentûm, vultûs vacat area pelle,
Non secus ac pingi mortua calua solet.
Ora patent, patulôque horrent deformia rictu,
Ossea pro vultu rûdera vultus habet.
Forma caret formâ, vultus vultu, auribus aures,
Et totum à toto corpore corpus abest.
Denique cuique suus parti dolor, omniâque vnum
Vulnus membra vno iuncta cruore fluunt.
Viuerè cogat adhuc, & erit sæuissimus hostis:
Ipsâ, plus vitæ gratia, morte nocet.
Nec dapis humanæ tortori est nausea, sanguis
Dat potum, pellem vestis, & ossa rogam.
Impasti procul hinc ad pabula cedit vermes,
Nil mox, quod vobis esuriatur, erit.
Peior adest verme, in spirante cadauere, tortor,
Cui parat humanas viua popina dapes.
Quin etiam sua membra reo sorbenda secantur,
Vt tumultent artus viua sepulcra suos.
Fabula sacrilegus iam definit esse Thyestes,
Quique Prometheam viscere pascit auem.
Non seiuncta quidem natorum membra resorbet,
Peior at innatas congenitâsque dapes.
Quod mirum est, placidus, nō vt furia Orestes,
Imperturbato gutture membra vorat.

Vt Saturnus edax sua se per membra trucidat,
Sic Ianio ipse ferox, ac Ianiena sibi est.

Nulla labris crescunt propriæ fastidia carnis,

Pes consanguineo dente, manûsque perit,

Illius partis tumulus pars corporis ista est,

Cognatæ veniunt, intima mensa, dapes.

Fœdera dissoluit fraterna domesticus hostis,

Pars sua comparti præda voranda venit.

Quid miser interea? ridet, sibi plaudit, & ultro

Aspera dum suffert, asperiora petit,

Non gemitus ferro, lacrymâsq; opponere pœnis,

Quid tua mitis, ait, dextra, quid ensis hebes?

Tortorêsq; iacens inuitat, vt altius ensem

Lectâ parte sui nobiliore locent:

Si faciant, plagam ridens sensisse negabit,

Mille dabit vultu dissimulante iocos.

Vulnera sunt leni fomenta medentia tactu;

Dira tamen factas erubet hasta neces.

Per grauia, hæc grauiora; per ista, grauiissima poscit:

Semper & inuentis vltiora cupit.

Qua nece cumque perit, leuiore perire videtur

Et stolidè pariens in sua damna volat.

Gratatur velut expertâ dulcedine plagas,

Poscit & illæsus vulnera, læsus amat.

Liquitur accensa sensim pinguedine tostum

Corpus, vt admoto cerea tæda rogo.

Risus erit mutili supremus anhelitus oris,

Collusor tortor, plaga fritillus erit.

Exuit hic sensum pietatis, & ille doloris;

Mutua communis gaudia cultè alit.

De spirante nihil nisi risus corpore restat:

Dic vbi materies risibus apta tuis?

Dum lacerum pectus rimis hiscentibus extat,
Tum iocus exangui lætior ore sonat.

Quâ mage clade perit, mage cladem deperit ipsâ,
Et sibi, posse hosti displicuisse, placet.

Quid rides? quod nulla manet quæ dâna minetur?

Quod bona, quæ valeant tollere, nulla manet?
Flebilis heu risus, scutumque imbelle! retundi

Obice num risu ferrea fica solet?

Mors adeone parum est? hostis tibi fumus acerbas,

O nunquam ærumnis exsaturande tuis!

parcite crudeles membris exanguibus vrsæ?

Nil cutis, aut carnis quod repetatis, habet.

Parcite, vos oro, neque enim pro se ipse precatur;

Sed placet in varias mors geminata neces.

Cedite languentes, vel cædite fortiùs iræ,

Este minus segnes in pia fata manus.

Si nondum saturata fitis, tibi perpete fauces:

Vbere vitalis vena cruoris alet.

Altiùs effosso de vulnere riuus abibit,

Vberiore sacram prolue fonte sitim.

Hæc facies rabidos posset mollire leones;

Exarmare lupos, & cicurare tigres.

Non tanta Armenias rabies exsuscitat vrsas;

Non similes claudunt amphitheatra feras.

Cyclopas tortor superat feritate gigantes,

Mitior est isto Trinacris Ætna loco.

Singula quid memoro? si millia mille referrem

Tormina, mille mihi millia tecta forent.

Nam nec habet numerû, nec pœnæ copia nomē;

Non datur inceptis vltima meta malis.

Crebra cruentatis geminantur vulnera membris;

Plura tamen votum est, & grauiora dari.

Dum bene luctatus nece tandem concidat vnâ,

Passus, in assiduo funere, mille neces.
 Quod præstare audet, tibi scribere dextra veretur,
 Quæque dolor non est ferre, referre dolor.
 Quid necis ingeniũ, & falcis renouamus acumẽ?
 Est necis ingenium, falx & acuta satis.
 Vita tuis lacrymis, & nostro digna pudore,
 Sceptra cruenta fugit, sceptra quieta petit.
 Si mihi pax tecum cunis nascatur eisdem,
 Tota tibi totum fiet oliua nemus.

ELEGIA SECUNDA.

Conuiuia & fames Canadensium.

DELICIAE regum venatu pellerè curas,
 Iunctaque Dianæ, Martis & arma sequi.
 Concolor omnis vbi niueo velamine tellus
 Dedocet errantes antra larémque feras;
 Reticulis ego cincta pedes, & brachia telis,
 Martem vinco manu, Mercuriũque pede.
 Et cautâ pontes niueos indagine lustrò,
 Plagiferisq; noto crura manũsque rubis.
 Suppositas de monte ruens examino valles,
 Num tegat errantes cæca cauerna feras.
 Tum iuuenes vepreta citi, salicetæque calcant,
 Per querceta volant, pèrque vireta ruunt.
 Nec saxeta gradum, spineta, rubetæque sistunt,
 Lustræque ferrato vix adeunda pede.
 Iam circum clamare viri, latrare molossi,
 Formidare greges, & trepidare feræ.
 Fit fuga, sternuntur per inertes agmina campos,
 Pars sũde victa cadit, pars cane capta ruit.

Spicula quot cornu, tot habet sibi funera campus,
Ni geminat multas vna sagitta neces.
Qui prædam capit, ille vorat, dubitòq; frementes
An feriat citius dente, manùve feras.
Et placet exiguis leuiter earò tosta fauillis,
Qui cibus, est dubium, sistat alátve famem.
Aut audus prædam spreto vorat igne; nec escas
Prouida per longos contegit arca dies:
Quæque dies hodiernà capit, non crastina cernet,
Si mihi res desit, spes mihi semper adest.
Prandia tũc nō parca manus, sed opima ministrat
Optima de toto fercula tota penu.
Quanta dies cumque est, epulis exæstuat omnis,
Continuam æternat longa culina dapem.
Haud secus indulget genio, pinguique polentæ
Anser Francigenis esca dicata labris.
Sæpe dies cernâ, mensæ sunt carne minores,
Nec tam victa citò, quàm reuocata fames.
Carnes deliciae, solæ bellaria carnes,
Quis suus à sese, non datus arte, sapor.
Carpo cibos vt aperta potest compingere dextra,
Vt distenta dapes viscera ferre queunt.
Quod carnis cūque est, id vêtre recòditur, omnes
Et modios, omnes & superante modos.
Fercula quot, quantum, quæ quisque liguriit ore,
Ipso non leuis est ore referre labor.
Non prius abscedunt, quàm nausea pellat edētes,
Ingluuiésque cibos exsaturata vomat.
Fercula quid fertis, rursumque & fercula? vultis
Suauia ferre mihi fercula? ferre famem.
Faucibus vnum illis & idem omnibus argumētũ,
Fercula; fauce vocant fercula, fauce vorant.
Materies facit ipsa modos dulcescere labris.

Et quæ voce sonant carmina, dente probant.
Gens quoque tota bibax, & tota in prælia feruens,
Si quæ peregrinis bella gerenda scyphis.
Distrahat & vitam, si fortè licebitur emptor,
Vinum vel propria parte salutis emat.
Credit aquam præsens, vino præsentem, venenum,
Hostibus & solis pocula digna dari.
Quin cadis vt sacro quondã caper hostia Baccho?
Ilte est pernices vitis, & ille meri.
In vino vel lingua leuis, vel inane cerebrum;
Dicere, cum nescit, cumque tacere nequit.
Surdior est Surdo, Picæque loquacior ipsa,
Cum reticenda refert, cum referenda tacet:
His studiis menses abeunt & primus & alter,
Dum neget obstructas nix liquefacta vias,
Tunc, sed serò nimis, stat parcere rebus adesis,
Consilium vacuis aptat inane labris.
Ostrea tunc virus pelagi, mænâsque relictas
Putre pecus, ponto diffugiente, legunt.
Expiat impransum conuiuia lauta palatum,
Conditur suavi, ni sapit esca, fame.
Siccitas pelles, & scortea tegmina mandunt,
Nucida semesi fragmina piscis edunt.
Duratam fumo anguillam coquit olla recoctam,
Qui cibus in stomacho perstat inerte diu.
Attonitæ longæua stupent ieiunia quercus,
Labraque mortali non resoluta cibo.
A patre frustra puer si carnis edenda reposcat,
Frustra parens puero carnis edenda negat.
Si panis, potusque forent, suspiria; posset
Ebrius à lacrymis, & satur esse suis.
Poscitur æthra pecus, sed inops pec' æthra recusat,
Terfa rogatur opem, terra recusat opem.

Penſilis ingrata vix hæret in arbore fructus,
 Quæ macra ieiunus prandia venter amat.
 Sola ſed infami fructu vepreta redundant,
 Syluæque glande ferax exſuperante pluit.
 De quercu lectæ veniunt in prandia glandes;
 Excuffa in cœnam de vepre mora cadunt.
 Nudantur ſpineta ſuo, quercetæque foetu,
 Et ſapit humanis eſca ferina labris.
 Exanguis artus, exſuccæque tempora pallent,
 Infidîſque labant oſſa ſoluta fibris.
 Alternò trepidant & terrent obuia viſu
 Spectra, quibus nudat decolor oſſa cutis.
 Nunc macie ſidunt, nunc carne triclinia pinguent,
 Nunc ſupereſſe cibos, iâmque deeſſe vides.
 Mox cibus oppleta fugiens ex fauce redundat,
 Mox labra quæ fugiant dicere, labra vorant.
 Mutua ſuccedunt, vincuntque alterna viciffim
 Ingluuiemque fames, ingluuiésque famem.
 Mitte (maris princeps) famulos in prandia piſces,
 Auget dum regnum nix liquefacta tuum.
 Mitte cibos, potuſque, quibus non paſceris infâs,
 Sat tibi lacte ſitim pellere, lacte famem.

ELEGIA III.

*Difficultas itinerum in ſyluis Cana-
denſibus.*

PARCE precor: ſi ſermo rudis neget eſſe poëtâ,
 Non erò: vera loquar: ficta poëta canit.
 Tu mirare meos, ſimul & miſereſce labores,
 Sat, qui miretur, non miſeretur, erit.

Mille bis æterna protenditur arbore leucas,
 Umbrosus totus, nec cerealis ager:
 Nec mirum, haud aliâ refecatur sylua securi,
 Quàm quâ tempus edax omnia falce metit.
 Qua parte aspicio syluæ, mihi sylua malorum est,
 Sorsque mihi trunco durior arboreo.
 Æterni horrificant brumæ intractabilis imbres,
 Marmoreoque rigent vincta fluentia gelu.
 Sunt & inaccessi Phœbo Phœbéque recessus,
 Sûntque sepulcrales in mea tecta niues.
 Sylua catenatis densatur opaca vepretis,
 Et negat obstructas illaqueata vias,
 Nulla viatoris trito patet orbita gressu,
 Nec leue signato calle notatur iter.
 Flexilis incuruos sinuat labyrinthus in orbes,
 Sum Theseus, sed quis prouida Gnosis erit?
 Vix tot vorticibus constat Mæandricus amnis,
 Herculeum vix tot flexibus errat iter.
 Vix tot inexpliciti Cretea volumina septi,
 Quémque suus præceps terror, & error agit.
 Nescio num fluuiis vouear lapsura, vel antris,
 Tot loca deluso sunt peragrata pede.
 Dum vagus à recto deflectit calle viator,
 —Vnum, vota Deo fundere, restat iter.
 Prolem mater Olor, matrémque Ciconia portat,
 Dum metus est dubias, vel labor, ire vias.
 Deseror, vt triuiis exponit adultera natum,
 Quem lactare probrum, quémq; necare metus.
 Nix albet quocumque oculos intendere conor,
 Quoquæ pedem, aut dextram figere, spina riget.
 Vix Scythicæ vepreta colant impune sorores,
 Queis ferro vultus fluxit, & ære manus,
 Non labyrinthæi tot habet fallacia luci,

Sylua quot ambiguos curua recurua dolos.
 Quæque petita via est cursu, repetenda recurſu,
 Ipsa sibi gyris obuia facta suis.
 Non mouet in rectum, sed curuum obliquat in
 orbem,
 Confectum repetit pes vitiosus iter.
 Vt mola perpetuos iterat circumuaga cursus,
 Vt leuis æterno vertitur orbe rota.
 Haud secus implexo reuolubilis orbe viator
 It, redit, emensum sæpe reimensus iter,
 Fallaces præter dubiis erroribus orbes,
 Vallibus hinc premitur, montibus inde tumet.
 It pede pygmæo, qui se putat ire gigantis,
 Et quod habere putat, vix habet vllus iter.
 Deuius at surdos frustra inclamauero campos,
 Nallus aberranti monstrat arator iter.
 Metior astra oculis, linguæque remetior agros,
 Sed neque vox astris, vox neque prodit agris.
 Cedite sydereæ moles, atque ardua ligna,
 Latior vt cælo, sit Cererique locus.
 Quis mihi det certo tam constet semita ductu,
 Quàm petit intentum recta sagitta scopum.
 Tam facili, Delphine, leuem da tramite cursum,
 Quàm faciles peragrat piscis in amne vias.

ELEGIA QVARTA AD DELPHINVM.

Nix, & frigus Canadense.

QVI D niue nō possim, potuit si puluere scribi?
 Candida namque mea sepiâ facta niue.

Littera quippe suo fulget depicta colore.

Et merus in niueo carmine candor inest.

Non habet externum, proprium gerit illa colorē :

Quæ niueo , proprio charta colore nitet.

Sit procul hinc miniū, tyriū procul absit & ostrū,

Vnus erit niueus , si color vllus erit.

Nix mea me decuit , donec dabis ipsa colorem ,

Cœpero dum vultu nuda rubere tuo.

Tres niue marmorei frigent constante Decēbres,

Æquales aperit lubrica testa vias.

In pontem pontus glaciali fornice cessit ,

Et lacus à rigidis stat solidatus aquis.

Mentitur durum concreta fronte metallum

Nereus , & rigido ferrea terga vado.

Iustius haud vnquā dictū de marmore marmor ,

Æquoris aut nomen iustius æquor habet.

Nix infrā durata pedes & spina fatigat ,

Desuper intectum densa pruina caput.

Cuncta rigēt, cuncta albescūt, dubiūq; relinquunt.

Num mage dura gelu , num magis alba niue.

Quæque prius cymbā, nūc accipit hospita plaustrū

Vnda, negātque vndas congelata suas,

Sæpe sonat glacies agitato pendula crine ,

Sæpe gelu mentum candidiore nitet.

Sectilis ad potum ferienda bipennibus vnda,

Et putei duris effodiuntur aquis.

Terra latet niuibus , densa latet arbore cœlum ,

Non oculo cœlum , non pede tango solum.

Orbis iure nouus , meritō noua Gallia dicor ,

Bis duo sunt aliis, hîc elementa duo :

Terra latet, riget vnda; vnus iuuat ignis & æthra :

Si fumo, & ramis, ignis & æthra iuant.

Me miseram ! totis nunquam mihi vertitur annis

Vel nox cum somno, vel sine nube dies.

- Fallitur, & niueum laudat vulpecula cœruum;
Qui mihi vel niueum dixerit esse diem.

Crastinus albus erit, dico; non crastinus albet,
Miror; dico, dies proximus albus erit.

Tertius est isto nigrior, primoque secundus;
Nulla serenato lux mihi sole micat.

Labra sitis, premit ora fames, mēbra omnia frig⁹,
Vixque pigra surgit debile corpus humo.

Nix ab Anaxagora sapientiū alba negatur,
Atra quidem dici nix mea iure potest.

Nix quoties fortis regit æthera turbida nimbis,
Latior innubi mox nitet ore dies.

Nix mihi perpetua est, neque nos albescimus illa:
Mens mihi cum nigro corpore nigra manet.

Nostra rigere queror, nunquāq; albescere corda,
Non mage tecta gelu, quā niue terra latet.

Denique, qui decorent, niueos geris ipse colores,
Et mihi, quod cruciet de niue, frigus adest,

Veste negat pullum niuea conuertere peplum
Quæ sibi constans est lacryma, quæque mihi:

Nulla dies vitam niueo candore serenat,
Nix ut adest oculis semper, obestque meis.

Ite niues, & primo vere liquecite in imbres,
Soluite vobiscum corda reuincta gelu.

Ast ubi nix, durumque gelu soluuntur in vnda,
Putrescit mixto sordida lympha luto,

Casti sitis non tam turpi satiatur ab haustu,
Sydereo extingui non nisi fonte potest.

O calor exoriens ex te, reuolubilis in te
Ipse tibi lignum solus, & ipse focus,

Ardor edax, absolve niues, castumque liquorem
Exprime, flagranti qui leuet ora siti.

Huc, Delphine, veni, lacti nix concolor albet,
 Nil Plato, quàm liquidam lac docet esse niuem.
 Molles terra dapes & lactea fercula spondet,
 Mamma polus, nix lac, quo fouearis, erunt.
 Sydereo qui mira trahit cunabula cœlo,
 Vbere cœlesti, lactéque debet ali.
 Nix etiam sponsi ætherei caput alba pererrat,
 Et regit intactos alba pruina pilos.
 Cerne niuem, quam si temnas, cœlestia temnis,
 Scilicet æthereis nix venit ista plagis.
 Est niveus pueris candor, vultusque benignus,
 Ah meliore meam lumine cerne niuem.
 Cerne niuem, saltem castos habet illa colores:
 Ipse est virtutis dignus amore color.
 Lenta senescentis tardet tibi verticis ætas,
 Et videant Pylias tempora cana niues.

ELEGIA QUINTA AD DELPHINVM.

*Domus, & umbra sylvarum Cana-
densium.*

DET licet umbra thoros, sine te non apta so-
 pori est:
 Creditur esse quies, sed labor umbra mea est.
 Sedibus incertis dubioque erratica cursu,
 Huè illuc comites inter oberro feras.
 Et me nulla dies cernit, nulla astra sedentem,
 Nullos ipsa dies cerno, nec astra sedens.
 Dorsum currus, equique pedes, mihi dextera calter,
 Quolibet ebullit gesta culina loco.

Pelliceo contexta mihi centone supellex,
Nudaque semoto limina poste patent.
Quæq; viri domus est, magis est spelunca leonis,
Quique vir, ille viri nil nisi nomen habet.
Cogenitū domi porta trahens vt Cochlea tectum,
Errat, in exilio nullibi, vbique domi.
Vix terit immotis eadem vestigia plantis:
Stansque nequit noctem, stansque videre diem.
Vnâ sæpe mouet bis castra volatica luce,
Vincit solem, æquat mobilitate mare:
Quamq; domū extruxit Cynicus, versauit eandē:
Ipsa nouo cogor condere sole nouam.
Nexilibus crates surgit compacta quasillis,
Virgea claustra domus, fiscina claustra thoros.
In medio dicamne rogum, fumūne calentem,
Quo pars illa calet corporis, ista riget?
Vimineis vt aues caueis, sic mœnibus arctor,
Si caueis aditus, si reditisque patent.
Tota domus rima est, dom' est mihi tota foramē,
Tota domus porta est, tota fenestra domus.
Frondea, quem mittit fumū, domus ipsa resorbet,
Humida ligna, virens herba, niuēque fouent.
Iptus agit circum niger atra volumina nimbus,
Nix flammam alternat soluere, flamma niuem.
Turget olorinis numquam mihi culcitra plumis,
Arboreis summum est incubuisse thoros.
Membra nefas farto præbere leuanda grabato;
Sed grauis esse sibi sarcina membra solent,
Et iactata nouam quærunt hinc inde quietem,
Nescis quē vel locum quē me tenere situm.
Nunc stare incubens, nunc stans incumbere nitor,
Sed locus ex æquo displicet atque situs.
Nix ybi cœnosam peperit resoluta paludem,

Plus natat in stratis, quàm cubet hospes aquis.
 Iam sceptri, Delphine, tui residebo sub vmbra,
 Hoc, tuto vt lateam tegmine, ramus erit.
 Hactenus aëriam pro corpore prendimus vmbra,
 Brachia complexu lusa fuere suo.
 Vmbra diem saltusque rogos expectat amoris,
 Hæc est materies ignibus apta tuis.
 Perpetuâ nemoris, vitiisque in nocte moramur,
 Hanc geminam noctem, quot doluere dies!
 Non habet has populus tenebras scynticusque
 lentiumve,
 Hi solem absenti sole deesse vident:
 Hic densæ horrificant spissâ caligine noctes,
 Nec possum noctem nocte videre meam.
 Sed tu sol oreris, semperque remetiar vno,
 Téque oriente meum, téque micante diem.

ELEGIA SEXTA

AD DELPHINVM.

Incommoda, & commoda Canadensium.

NON fingam, DELPHINE, solent quæ mon-
stra Poëtæ.

Quid portenta velim fingere? vera sumus.
 Mōstra pauēt pueri, at puero puer Hercule maior,
 Indomitâ frangis monstra cruenta manu,
 Lacte Medusæos cunisque virilibus angues,
 Spumantésque domas vbere pastus apros.
 Nec monstrum est, quod monstra nigris habi-
 tantia syluis

Fran-

Francigeno flectant Hercule victa caput.
Vix putor humano de stipite furculus ortus,
Quisquilæ terræ; res inhonora sumus.
Non similes Getula feras Massyláque gignunt,
Bina licet monstris lustra timenda suis.
Namque senem occidit, quãdo non occidit ultro,
Matrem nata, patrem natus, auumque nepos.
Ni reuoluta parent abscindere stamina parca,
Impatiente parens prolis ab ense cadit.
Cumque cibus nolit, semel vno funere pascit,
Qui matris vixit lacte, labore patris.
O pietas, quæ sic pietatis dona rependit.
Hæc pia si soboles, impia qualis erit?
Sum lupus & tigris, leo sum, sum vipera, & ultra
Si fera quid tellus hoc grege peius habet.
Sic tigris patrem laniat, sic vipera matrem,
Sic armenta lupus, sic leo mactat ouem.
Æqualem præbent homines, & monstra timorẽ,
Destituorque feris præda, scopisq; viris.
Quis credat; morbus scelus est, & noxa senectus,
Sed scelus hoc fato, noxa luenda nece est.
Debilis æger vbi lentatur anhelitus oris,
Pallefcitque suis purpura deimpta genis.
Denique cum tenues seruant vitalia pulsus,
Vicinamque notat vena quieta necem.
Succorum vires, lectasque Machaonis herbas
Hippocrates nullus, nullus Apollo parat.
Cedat vana procul Podaliria turba. Melampus,
Herodes, Chiron, Clinicus, Hippocrates,
Vnus adest medicus, natus, vel fidus amicus,
Morte breui longum qui leuat omne malum.
Germina nulla creant meliores sanguine succos,
Non scalpro venam natus, at ense secat:

Occisor medicus, mors est panacea dolenti,
Vicini veniunt prompta sepulcra rubi.
Qui bello viguere duces, sublimè putrescunt ;
Claudere victores terra subacta timet.
Ductorum temerare manus & brachia parcit
Pulvis, & augustum lædere terra caput.
Scilicet ingentes æquaret vt vrna triumphos ,
Vnicus vrna capax debuit esse polus.
Terrane, quod monstris me terreat, ista vocatur?
Dicitur an cælum quod mihi celet opes ?
Argillam figulus madidâ dum molliit vnda,
Pernicemque cito mouit vt orbe totam,
Fabricat artifici circumuaga pocula gyro ,
Mater vt ipsa rota est, sic pater ipse faber :
Hydria sed primum delapsa recurrit in ortum,
Tâmque citò moritur , quàm citò nata fuit,
Nullus homo cunis olim melioribus ortus ,
Prodiit è lutea fictile corpus humo
Est pulvis, qui sponte leuem vanescit in auram,
Aurâque, quæ nullo pressa sequente fugit.
Non queror, auctori nec opus conuicia iacto ,
Facta tamen videor deteriore luto.
Nomina vix vitæ mihi sunt, sunt cætera mortis,
Vita minùs vitæ, quàm necis ista tenet,
Sæpe est durato potus sugendus ab amne ,
Quæque nequit mandi, sæpe voranda caro est.
Sola sitim, solúmque famem premit vnda , pecûsq;,
Et fluit hinc potus, currit & inde cibus.
Non redit alternis gemitus risûsque choreis,
Prouocat aut madidos lacryma sicca iocos :
Lætitiis quoties volui componere luctus,
Lætitiis luctus obstrepere meis.
Cælum adamante mihi, vitrea tibi fluxit ab vnda.

Et mihi sanguineo stella colore rubet.
Sydera inærentes rebus solantur in arctis,
Sed mihi vt Atlanti sydera pondus habent :
Luxit & infestum primis natalibus astrum,
Iret vt innubi lumine nulla dies.
Te peperit lux alma ,diem quâ sydera reddunt;
Me nox, nigrescit quâ tenebrosa palus :
Illa fuit tibi vita parens, quâ numina viuunt,
Non dicenda parens vita, nouerca fuit.
Et quamuis tot cœlo oculi, quot sydera fulgent,
Sunt oculata aliis, cœca sed astra mihi.
-Mille patent circum, cœlorum ad aperta, fenestræ;
Ad lumen nobis rimula nulla patet.
Depluit ipsa tibi nitidis pretiosa lapillis,
Quæ mihi saxosis grandinat æthra globis.
Per iuga syluestrem, per & Acroceraunia vitam,
Durior ipsa meis quercubus hospes ago.
Súm; Lycæthropos, pecudúq; propago virorúq;,
Eumenidum soboles, Gorgoneúque genus.
Monstra sumus naturæ, estis miracula cæli :
Gratia vos estis Numinis, ira sumus.
Hæc rigidus poterit qui lumine cernere sicco,
Cernere nil sicco lumine dignus erit.
Vsq; malum nihil est, sua sunt & cōmoda dānis,
Nec tibi continuis sum miseranda malis.
Vltro terra dapes, aut arcus donat inemptas;
Nullos luxuries dat nocitura cibos.
Pisa fabæque meo rident, tibi spreta, palato,
Dulcis & esca mihi, quæ sit amara tibi.
Non ego diuitias tormenta benigna requiro,
Lautæque magnificos quæro venena cibos.
Sibilat vndoso vocalis sylua susurro,
Factæque de volucrum voce diserta sonat.

Vernantes texunt umbracula frondea rami,
Muscosusque venit, mensa superba lapis.
Quod summū est, non sū rutilo pretiosa metallo,
Castoreæ pelles, aurifodina mea est.
Tartarei non hīc aperis penetralia ditis,
Aurum, quo ingenta te gravitate trahat,
Nec mea maternæ violas præcordia terræ,
Nec properæ virtus mortis in antra subis.
Non vultus conchis redolet, non dextra Sabæis,
Myrrha nec infectum lenit odora caput.
Non timor, adductas ne contrahat area rugas,
Aut aret informes fœda litura genas.
Non labor, an paruo tumeat verruncula cliuo,
Aut simulata levis vulnera musca tegat.
Quod fuit, hoc remanet, vitiūve aut gratia frōtis,
Nec fit fucata vultus ab arte novus.
Anne supercilij pilus aptum circinet arcum,
Nec vitrum, vitreas nec speculatur aquas.
Dicitis insanas, quas cælo ducitis, arces,
Quæ propior terræ, sanior ergo casa est.
Si mihi iura silent, pura est incuria rerum,
Quæ tamen à cura curia nomen habet.
Proscripti procul hinc posuere sedilia lites,
Clamorque silent iurgia rauca fori.
Si bene, qui latuit, vixit, probus incolæ sylvæ est,
Virtuti sacras hæc facit umbra domos.
Dura tamen tellus & barbarâ nomine dicor,
Fac nomen mendax, ut decet, esse meum.



ELEGIA SEPTIMA.

Religio, mores, & vitia Canadensium.

VIRGINEI, DELPHINE, tuo de stēmate flores,
Lilia nondum isto profiliere solo.
Venantes inter tuus haud iacet arcus, Apollo,
Nec tuus inter tot ligna, Cupido, rogos.
Virque maritatus vitiis, viduata pudore
Vxor, quid præter monstra pudenda ferent?
Luxuria est genitrix pueri, cunæque labores,
Pauperies nutrix, barbariæque cibus.
Ornantur villisque feræ, plumisque volucres,
Est arbor foliis, gramine rectus ager;
Pelle tegor, multo potius me corpore nudam
Sylua verecundis velat opaca comis.
Pro vinclis vestes reputo, pro carcere rectum,
Hinc fugit insolito tincta rubore Venus.
Non diuturna duos inter connubia durant,
Sed qui mane venit, sero recedit amor.
Non hinc stella Venus stat fixa; planeta sed errat:
Ut mare sic fluitat, quæ Venus orta mari est.
Non pudor ore sedet, pulchrôq; modestia vultu,
Ast ubi, cum caream fronte, sedere potest?
Multa quidem Mauors armatus prælia tentat,
Plura tamen miscet funera nuda Venus.
Mulciber ignipotens rursus tua tela, tuasque
Sentiat implicitus Marsque, Venusque plagas.
Nulla dies sibi nomen habet, sed rite vocari
Mercurij, aut Veneris nomine quæque potest.
Dixeris aut nullos, aut festos dixeris omnes,
Namque pari veneror relligione dies.

Syluicolæ, templum sylua est, sunt concio rixæ,
 Ira preces, rabies vota, libido Deus.
 Quique Deum sibi posse nihil prodesse precanti,
 Sic quoque peccanti credit obesse nihil.
 Perpetuos si vita dies ducenda daretur,
 Alterius vitæ vix foret vllus amor.
 Sidereæ diuûm, creduntur somnia, sedes:
 Creditur infernus, fabula vana, rogus.
 Pro doctore mihi magus est, pro numine demon,
 Pro veris credi vatibus ambo solent.
 Dicere sed vates de rebus vera futuris,
 Hi de præteritis non nisi falsa solent.
 Vindictam præter, venerẽ, geniûmque, gulámq;
 Nullum suspicimus, suscipimûsque Deum.
 Ipsa tamen trepidant mihi crimine corda peracto,
 Cui scelus, ante scelus, non nisi ludus erat.
 Occinit auctori ferali carmine crimen:
 Ante oculos, sceleris larua vagatur iners.
 O Deus, haud fulmen, fulgetra at sola timetur,
 Vnum illud sæuit, dum nihil ista nocet.
 Percute corda metu, tali mens indiget ictu,
 Ille mihi clypeus, quo tegar, horror erit.
 Viribus haud vllis, haud tempore flectitur ira,
 Nec prece, nec pretio, fraude nec arte rigor.
 O Rhadamantæâ solium constantius aula,
 Testis vbi Iudex, Causidicusque reus.
 Frigidus ad memorata riget subscellia sanguis,
 Quo, vel sancta Themis, iudice, lite cadat.
 Si dubiæ nutant trepidante cacumine laurus,
 Si Libanus cedris consita sylua timet,
 Quo dumeta gradu, virgulta, viretæque stabunt?
 Quo myrtheta situ, quo saliceta pede?
 Si metuunt altæ tectis nutantibus arces,

: Rudera nōne solo, iam ruitura cadent?

Quæ secura mihi multis de millibus arbor,

: Seruet vt excusso fulmine, laurus erit?

: Anne viros mutare nequis, qui tempora mutas?

An sum ficta tibi deteriore manu? [regnat,

Lex mihi nulla fere est, quæque est sine vindice

Ius nullum, nisi quod iudice ab ense datur.

Lex iter est luteum stulto, via libera cauto:

Quæ culicem innotant stamina, vespæ secar.

Viuit & ingenij celebratus raptor honore:

Queis locuples abiit legibus, hæret inops.

Virque graues haurit puteis vxorius vndas,

Ligna domum mulier secta virilis agit.

Hæc vir, & hic mulier verè sunt: omnia curat

: Fæmina agenda foris, & vir agenda domi.

Velifera vastum nunquam mare findo carina,

Tota sed exiguo cortice, & amne mora est.

Quæque ferunt gerulas remis impello carinas,

A fuste vt geritur, quem gerit ipse, senex.

De me mira tibi, de te mihi mira feruntur,

Mirus vterque suis mos inoleuit auis.

Hos mihi si mores, hæc si miracula soluas,

Quid mea religio, quid tua, testis ero.

Omnia causa hominū, Deus ipsum condidit orbē,

Orbe quid in toto nos elementa premunt?

Vna globum tellus vnum componit & vnda:

Ista quid æternū manat, & illa manet?

Cūm sedeat medio res abiectissima tellus,

Cur virtus medio res pretiosa sedet?

Damnatas quid quæris opes, quas patrius orcus,

Gignit, & indignas lumine terra tegit?

Cur pede stat suber, capiti cur pluma superstat,

A capite ad calcem num cupis esse leuis?

Dic quid cœcus amor, cùm nascitur ille tuendo?
 Visu natus amor, cœcus an esse potest?
 Qui cœlum videt vnus homo, cur despicit vnus?
 Dic cur, quam pedibus calcât, adorat humum?
 Nauita cur longos vt dirigat æquore cursus,
 Sæpius astra, semel vix speculatur aquas?
 Nitrea quid reuocant vetulas medicamina pelles,
 Occupat & frontis picta tabella locum?
 Dic mihi defectu cur sol & luna laborent?
 Aut cur ferali crine cometa rubet?
 Vnde leues veniant venti? quis viscera terræ
 Commouet? vnde polus fulguret, vnde tonet?
 Sólque bis octogies terra cur maior habetur?
 Namque bis octogies cernitur esse minor.
 Hęc mihi si soluas, quantum tua numina præstent,
 Quid mea relligio, quid tua, testis ero.





FRANCIADOS

LIBER SECVNDVS.

Auxilium postulat.

L V D O V I C O

S V O R E G I

NOVA GALLIA.

ELEGIA PRIMA.

BELLICA bis geminis contorque fulmina dex-
 tris,
 Rege sate, & regum iam LODOICE sator.
 Sustinet æquales iusto libra pondere lances,
 Nil iusto & miti nomine maius habes.
 Sis aliis iustus, tibi iam iustissimus ipse es,
 Prolem æquas meritis nam, Lodoice, tuis.
 Iam genitor natos numerabis, ausisque nepotes,
 Aspicias supero seriùs axe patrem.
 Iam transacta prior tibi stamina parca retexit;
 Felix ipse tibi prole superstes eris.
 Edomitâ Delphin terrâ tibi marmora subdit,

K v

Ad nutus current obsequiosa tuos.
Vel facilem statuent tibi soli flumina cursum,
Deside vel segnem stante palude moram.
Victa ubi terra tuos cœpit solidare triumphos,
Iam stagnare ambit, ni superetur aqua:
Ad nutus solitum renuens transire per alueum
Restagnante nouum quæret in orbe locum.
Vnda tibi tonsis, vt terra secatur ararîs,
Tot teritur rostris illa, quot ista rotis.
Nobilis vt primum fluitantia lilia classis
Ventosis vidi velificata iocis,
Dixi, non generant hanc nostra rosaria messem,
Non simili noster gramine frondet ager:
Spes nata hinc non vana fuit; sis nescio, sceptris
Dignior anne tuis, vtiliorve meis.
Me tibi deuictam non exprobet Anglus, at orbẽ
Ante tuos stupeat non cecidisse pedes:
Quaque ruis, pavor anteuolat, sequiturque ruina:
Dextera fulmineis æquiparanda globis.
Lentus at in pœnas, velox in præmia ferris,
Dêque reo pœnas sumere pœna tibi est.
Si quis obex generosa tibi molimina fistat,
Aut facis aut reperis marte, vel arte viam.
Si numeres, quot nostra dabit tibi sylua coronas,
Plusquam millenâ fronde virescet apex.
Vix auget superata tuos Rupella triumphos,
Gloria nos rupes vincere maior erit.
Vrbs, quæ terror erat, si per te sensit aratrum,
Sectile cur nostrum nescit atrata nemus?
Namq; tuû est, Canados feritatis mōstra, domare,
Si iacet auspiciis hæresis hydra tuis.
Nos mollire, feros plusquam est cicurare leones,
Est per sydereum, ducere saxa, Iouem.

Sic homines & monstra domas, emis omnia, &
omnes,

Hoc vnum, serò me cecidisse, piget.

Conditio victæ, victoris honore leuatur:

Gens celebranda minùs, nì cecidisset, erat.

Sè tibi Delphinus sceptris nascentibus addit,

Qui geminata ferat sceptrà, manúmque leuet.

Dignius hoc regnas, quia summo subdere regi,

Incipe bis gemina sceptrà mouere manu.

Patrem non superas primæua prole, sed æquas,

Natum namque tibi das, Lodoice parein.

Ecce thori ætherci fructus sub Virgine signo

Nascitur, vt casti fructus amoris erat.

Iam steriles bis dena thoros aspexerat ætas,

Hæcte, cum grandi fœnore, prole beat.

Ne leuiora solùm, dando in Delphine, dedisset,

Prolem ipsum tribuit numen, vt æqua daret.

Qui tibi dat natum, det dignum aliquândo nepotẽ,

Quique dedit patris, det quoque nomen aui.

Muneribus terræ, cœlum sua munera iunxit,

Nam tibi terra nihil, quod superaddat, habet.

Ingentes animas seclis naturâ laborat,

Non breuis heroas procreat hora duces.

Brutorúmque inter, proles pulcherrima, fœtus

Serius à cerua parturiente venit.

Perge, nouum peragra plantis victricibus orbem:

Res noua, res multo grandior orbe nouo est.

Respice qua liquidû Phœbus lauat æquore currû,

Et cadit occiduis immoriturus aquis.

Ille tuum tulit huc, non merget in æquore nomẽ,

Solis in occasu gloria firma tua est.



ANNÆ AVSTRIACÆ
 REGINÆ CHRISTIANISSIMÆ
 NOVA FRANCIÆ.
 ELEGIA SECUNDA.

SALVE, ô quæ partu celebres heroidas æquas,
 Aspice quàm gremio dulce recumbat onus.
 Gloria cunctarum, matri si cesserit vni,
 Gloria cunctarum quantula! quanta tua!
 Pone metum, fœcunda probant se viscera fructu,
 Et timidos vana suspicione leuant.
 Qui fuerat Gallis, timor est traductus ad hostem,
 Victorem natum qui vidit esse suum.
 Vagitus compesce leues, toto orbe tonabit,
 Postera cùm fortem fecerit hora virum.
 Sceptrum rege beas, te nato, pignore Gallos,
 Ambrosio per te Gallia lacte fluit.
 Iam facili partu soboles se mascula fundet,
 Iam didicere graues prole timere sinus.
 En spirat patrium puerili in pectore robur,
 Maternus tenero ludit in ore lepos.
 Digna puerperio merces, non ôque labore,
 Vel semel augustis basia ferre labris.
 Si sua cuique, dies reliquos, præmonstrat origo,
 Omnis & à prima pendet agenda dies,
 Vis dicam qualis natus, quantûsque futurus?
 Vnum hoc: filius est, ô Lodoice, tuus.

Vis iterum repetam quantus qualisque futurus ?
 Vnum hoc: & satis; est filius (Anna) tuus.
 Luna erat in geminis, geminos contraxit in vno
 Anna, & par natis iste duobus erit.
 Anna gemit; lacrymis nascuntur lilia: cœlo
 Mira venire queunt plus semel, vnde semel.
 Annæque bis denis suspirans parturit annis,
 Sed paritura sacro nil Samuele minus.
 Te per ego natum, per quidquid amabile nati est,
 Per si quid nato carius esse potest,
 Vnum hoc, sed lacrymis potius, quàm vocibus oro,
 Qui tuus est natus, sit pater ille meus.

NOVA FRANCIA ad antiquam Delphinum legat.

ELEGIA TERTIA.

FRANCIGENVN gens chara polo, gens le-
 cta Tonanti
 Gallia, non gemino, quem regis, orbe minor;
 Parce, tuis focios iungam si consona plausus
 Appendix sceptri quantulacumque tui.
 Scilicet æthereas animas, volucrèsque, notòsque
 Miror ad insuetos profiliisse iocos:
 Exhilarata salit nutante cacumine quercus,
 Antra repentinis sunt animata sonis.
 Culmina subsultant, in Gallica vertice prono
 Littora turritum vertere visa caput.

Mira solo : sed adhuc crescunt miracula ponto,
Vndosum Nereus tollit ab amne caput ;
Aptarique iubet celeres ad fræna quadrigas,
Tritonésque cauis insonuisse tubis ,
Rumpite , ait , residis tranquilla silentia ponti ,
Et mutum ad voces cogite voce pecus.
Tum sociant lætos Protheus madidúsque Palæmō,
Naiades , & Glaucus , Nereidésque choros ;
Squāmea tam ponti , quàm pennata agmina cœli ,
Quidquid & æthra fouet , quidquid & vnda
 tegit ,
Denique plaudentis respublica personat vnde ,
Respondet sociis æmula terra sonis.
Cantus erat , Delphinus Io ; ter Gallia felix
Viuat Io , noua spem , Gallia , sume nouam.
Quæ lux tanta oculis rerulit spectacula nostris ,
Nostris lux oculis charior illa fuit ,
Et prius incomptis iactui quæ fœda capillis ,
Explicui virides exhilarata comas ;
Inscripsi Delphina meis , Delphinæque truncis ,
Penna stylus , quercus pagina , sylua liber.
Restat danda salus : sed quam dabit ægra salutem ?
Certa mihi tecum nascitur ipsa salus.
Officiis parebo tamen , volucrémque ministrum
Expediam , nullus quem remoretur obex.
Cærule quis cœli findet ? quis cærule ponti ?
Marmora piscis arat , nubila sulcat auis ,
Nec cursum mihi penna dedit , nec pinna volucrē ,
Rara mihi in sterili marmore cymba natat.
Pennatis utinam possem plumescere membris
Fato , Nise , tuo , vel , Cytheræa , tuo.
Icare da volucres humeris sublimibus alas ,
Sim licèt Icaris præda futura vadis.

O vos pernici felicia numina gressu,
Membra quibus fluido sunt solidata vitro!
Quid faciam? Inter aues piscésq; citissimus offert
Æquoreus, vitreo cum grege, ductor opem.
Quique mea Delphin Delphinum voce salutet
Traicit obiectas officiosus aquas.
Sunt circū Rhōbus, Melanurus, Purpura, Cōgrus,
Salmo, Trulla, Draco, Cænia, Scombrus, Elops.
Et muti pisces cum muto Infante loquentur,
Cor suevit muto fortius ore loqui.
Ire ego quā nequeo, facilis mihi nuntius ibit.
Et tibi, quæ faustum littera portet, aue.
Gallia, te matrē mē mihi, dicā mē sororem?
Tu soror ipsa mihi, tu mihi mater eris.
Sed natam mater, soror ō me redde sororem,
Redde tibi cultu, lege, deoque parem:
O soror: hoc toties repeto quid nomen? eadem
Si non matre licet religione frui.
Heu! tua quando mei venient in colla lacerti?
Quid toties ibo, quā semel addis, eo.
Quippe semel tarda penetras huc naue quotānis:
Cum vertente tuus vertitur orbe labor.
Tardat an hiberni vos sæuior æquoris vnda?
An lethæa, leues vnde bibistis, aqua?
Autupor ad litus ventorum & murmura famæ,
Spēsque metum alternat fallere, spēmque metus.
Vento vana fides, vitreo spes vitrea ponto;
Spem tamen, atque fidem vêtus & vnda fouet:
Cursibus it iunctis oculorum & marmoris vnda,
Quò citius reducem gestet adaucta ratem.
Nescia perfidiæ veniant mihi lilia; namque
Vt Venerem, Anglorum me pupugere, rosæ.
Aduena conquirat, quæ non sibi Gallia fumpit:

Si nescis, dominum gens habet ista suum.
 Parce sotos aliis manibus præcerpere fructus :
 Sit messor frugum, qui fuit antè sator.
 O soror, vna tuas expectat sylua secures,
 Vt qui fronde viret, messe tegatur ager :
 Vos mare nauigiis, vos vomere findite campos,
 Et quas terra feret, transferet vnda dapes :
 Regalisque tuus quia flore superbiit hortus,
 Exemplum ducent fertilitatis agri.
 Plaude age quà Ligeris, quà lètat vterq; Vibiscus,
 Quaque rapax Rodanus, quaque Garûna ruît,
 Gallia nauali bis victrix Marte triumphat:
 Gallis, dum Delphin nascitur, vnda fauet.
 Plaude age, nec venisse puta sine numine prolem,
 Quæ tibi, bis dena messe negata, datur.
 Viue diu, nullòsque timens, cunctisq; timenda,
 Borbonij luncs nominis, orbis erit.

NOVA GALLIA Delphinum salutat.

ELEGIA QVARTA.

SALVE, Magne Puer, geminique parētis in vno
 Grande decus, Patris gloria, Matris honor.
 Exprime non solos vultus, sed facta parentum;
 Sis pectus matris, dextra caputque patris.
 Subdita te poscit dignum noua Gallia regem,
 Ad crines properat frondea sylua tuos.
 Marte satus, meritâ Martis petit arbore cingi,

Herculeâ , satus ex Hercule, fronde tegi.

Laurea te natum, nascentem vt purpura, cinget :

Laurea victoris , purpura regis erit.

Qualis eris, proh quâtus eris! quẽ proximus astris

Ipse pater natum se super esse cupit !

Tu vastæ , Delphin, qui nasceris arbiter vndæ,

Da desideriiis vela secunda meis.

Non potuere meæ statui primordia gentis,

Nobiliore die, nobiliore manu.

Vt te traicias toto ad nos æquore, nostra

Ligna quid in celeres non abiere rates ?

Rex maris, haud fluctus longũve vereberis æquor,

Traicies tuto rex tua regna vado.

Magni quippe nepos & Iusti natus, vtroque

Hæres dignus, auum laude, patrẽmque refers,

Tãmque benignus eris signo sub Virgine natus ,

Quam Iustus pater est, quã tibi Magnus auus.

Colligis heroas, quibus & superaddis honorem :

Flõsque sapit fructum, prima iuuenta senem,

Virtutes natus patrias imitabere, maius

Fingere nil possum, nil tibi velle minus :

Prima Deus patri cura est, natũsque secunda :

Sit tibi prima Deus cura, secunda pater.

Cresce puer, tecum patris quoque gloria crescet,

Non æquare patrem, non superare time;

Nam vinci placet, & grata est victoria victo,

Quæque tibi veniet laurea, patris erit.

Es puer, humanis nec ficta puertia curis?

Est puer, & curis sollicitatur amor.

Es puer ? hæc ætas sacro respondet amor,

Ipse facer pingi paruulus ambit amor.

Blanda soporiferis huc te vocat aura susurris,

Huc te somniferis sylua canora sonis.

Illa tibi virides præbebit frondea cunas,
Arboreosque lares, umbriferosque thoros.
Hic erit & vigilem quæ sopiit umbra draconem,
Quilibet & Morphei virgula, ramus erit.
Cantus avis, vox suavis erit, quæ dormiit Argus,
Quælibet ex campis herba, papaver erit.
Hinc Miluus, fugiet hinc noctua, Vultur, & omnes
Nocturnæ socia cum legione striges.
Dulce canent lectæ volucres, & in arbore nidum
Ominis infesti nulla reponet avis.
Delphinus medico curauit vulnera tactu,
Tergæque mergendis officiosa dedit.
Heu doleo, alternos non vena reciprocatur ætus,
Mæque docet, pulsu præmoriens, mori.
Viribus ipsa suis defecit inutilis herba,
Quæque operosa magis, nunc operata minus:
Ni venias, Delphine, meo panacea dolori,
Obsequiis restat pompa paranda meis.
O dignum superis, sed amabile sydus in imis,
Sydere sub tanto quid mea languet humus?
Sceptra tibi natura dedit, fortuna secundet,
Spem poteris nostram vincere, vota nequis.
Æquoreus patriis cum Delphin regnat in undis,
En mea perpetuis ora liquantur aquis;
Humida inexhaustis decurrunt lumina guttis,
Versus & in rigas sum nouus Acis aquas.
Primæque siccato vix fugit lacryma vultu,
Cum subit in madidas unda secunda genas.
Quid legem in verbis quæras? sunt verba doloris,
Sed quæ verba grauis non capit ipse dolor.
Me premit æternus, nullæque leuatus in hora
Manc labor, gemitus vespere, nocte dolor.
Pressa reluctanti suspiria pectore mustant,

Altius obstrueto non datur ore loqui.

Has ego per lacrymas rogo te, per amabile quid-
quid

Ingenuus candor, frons puerilis habet :

Ne primam, Delphine, feram à te prima repulsã,

In vita nil dum te renuisse scio.

EMINENTISSIMO
CARDINALI
DVCI DE RICHELIEV.
ELEGIA QVINTA.

SALVE, ô purpureo quem virtus muricè cinxit,
Què mare Proregem, què nouus orbis habet.
Si dubius forsan nutauerit orbis ab omni

Cardine, vel te vno cardine firmus erit,

Gallia pone metum, non lilia demetet hostis,

Lilia nam tignis sunt tria tecta tribus.

Liligeris ARMANDVS erat RICHELIVS armis,

Hoc armanda fuit Gallia consilio.

Francia te secura vno vigilante quiescit,

Téque nihil, toto quod fit in orbe, fugit.

Armatus per castra volas armatus in hostes.

ARMANDVS, tibi dum vita manebit eris.

Si, dum regna dedit sapientia, sæcla tulissent,

Vnus utrique polo ius dare natus eras.

Ipse precor, quando cura maiore vacabis,

(Si tamen est vlllo tempore cura minor.)

Ipse precor quæras quâ sim tibi parte leuanda,

Nam mala, nulla aliis parte leuanda, leuas.

Dûmque tuis orbem cernis pendere lacertis,

Non fugiunt oculos inferiora tuos.

Vtilitas non nora mihi est, licet agnitus error:

Anceps quid fugiam nescio, quidve sequar:

Ipse vides, atque ipse potes, dubiûmque relinquis

An sis consilio maior, an auxilio.

Quamuis centoculis radiet nox lucida stellis,

Tu sol vnoculo lumine plura vides:

Qui tibi doctor erit, Delphinos ille natatum

Erudiet, resuam fune ligabit aquam.

En noua præcipiti nutat mergenda profundo

Gallia, & erectas tendit ab æmne manus.

Heu succure rati, nutantibus Anchora nautis

In minitante salus turbine prompta venit.

En gemino quassata ratis succumbit ab hoste,

Fata ferente noto, fata ferente salo:

Nullaq; iactatâ mordax tenet Anchora puppim,

Nec tutum felix aura secundæ iter:

Hanc tua præcipitem feliciter Anchora sistat,

Aspiret studij ventus & aura tui.

Cûmque brevis vitæ nauem sors cæca gubernet,

Attamen haud dubius te duce portus erit.

Nô tua, cunctorum est tua dextra; priûsq; repedit,

Quàm mendicus opes, quàm petat æger opem.

Quid, Plato, Socraticos ficta petis vrbe ministros,

Doctorémque cupis regibus esse Iouem?

Si modò regales moneat Richelius aures,

Regi non fictum constat adesse Iouem.

Quod facis, id vereor ne fabula vana putetur,

Facta tua humanam non meruere fidem.

Fallor, in orbe deos si quondam fabula fecit,

Non alium, quàm te, finxerit illa Iouem.
 Ipsa laborabit scriptori credere fama,
 Non dabit illa fidem, ni leuiores facis.
 Præstiterit fecisse minus, ne maxima perdas,
 Humanam superant maxima sæpe fidem.
 Actaque ni taceas, & ni modereris agenda,
 Ne merita speres posteritate frui.
 Demere de cumulo, noua quàm superaddere
 præstat:
 Præteritis tollent adiicienda fidem.
 Pone modum, nocet ipsa sibi tua gloria; certant
 Ipsa sibi factis æmula facta nouis.
 Plus laudis diuisa feret, quàm iuncta potestas:
 Te maior, vires non capis ipse tuas.
 Altera virtutis pars sufficit, altera cesset:
 Vtraque nil operis, quælibet omne potest.
 Inde pij surgunt alio sub sole labores,
 Consilióque Tridens non tibi forte datus,
 Vtraque demissas flectit tibi Gallia fasces,
 Purpureóque patri, purpureóque duci.
 Anchora quid faciles tua non ausura per vndas,
 Cui fauet in regno rex maris ipse suo?

GALLIS.

ELEGIA SEXTA.

QUID quereris steriles speratis fructibus
 annos?
 Serò quidem victa est India, victa tamen.
 Græcia serò quidem, serò Iaponia victa est,

Serò quidem victa est Africa, victa tamen.
Si qua clade potes, non est grauiore moueri,
Si potes exemplo, non propiore potes.
Bellua sum fateor, volucrisque; at bellua nexis
Retibus, & visco decipjuntur aues.
Si qua parte fugax, non omni retia fallam:
Si nihil hic laqueus, non nihil ille dabit.
Sic visum superis, nondum sudoris abunde est;
Nec præfixa statis fructibus hora venit.
Cuilibet est sua meta viæ, compendia cœlum
Nescit, sed longis flexibus ambit iter.
Ipsa suo sese tempestas verberare frangit,
Plenior ipsa suo bulla tumore crepat;
Sic mea victa suâ rabies feritate remittet,
Barbariesque suo pressa furore cadet.
Prætentate vias, saltusque aperite bipenni,
Arbor robustâ concidet icta manu.
Sylua quidem ad primos obduruit hæctenus ictus,
Cedet at artifice mox superata manu.
Ibit in egregias mox sylua dolata figuras,
Surget & ad bifidas crux fabricata vias.
Infitus excisâ coalescet in arbore ramus,
Mox fruticeta vepres, mox nemus hortus erit.
Cedēt & platani, quibus est pro fructibus vmbra,
Dispositoque ferax ordine pomus erit.
Quo violenta nequit, pertingit lenta potestas:
Urget opus feruens, absque quiete, quies.
Adde parum paruo, paruam superadde pusillo;
Fit niueus globulus conglomerando globus.
Cuncta venenatæ mors frangit arundinis ictu,
Non tamen vna videt, funera cuncta, dies.
Hi celeri festinant gressu; hi deside lentant,
Quo pede quemque ferox pergere Parca iubet.

Nec temnas sterilem cereali gramine campum ,
Theſaurus ſterili ſæpe repertus agro eſt.
Si careant vepreta roſis , pomaria malis ,
Sunt vitiata dolis mala, dolore roſæ.
Laſa fuit Cytheræa roſâ, poi nô que Cydippe ,
Non mihi mala, mihi non nocuere roſæ.
Qualis inexpertum tentans puer inſcius amnem ,
Sæpius indoctum mergit in amne caput :
Mox habiles ex arte mouet ſine ſubere palmas ,
Securôque velut piſcis in amne natat,
Naufraga ſum flumîque rudis, ſed remige corpus
Nare manu , notis penſile diſcet aquis.
Ipſe fide à ſancta Lodoicus , Amantachar olim,
Nobile cognomen , nobile nomen habet.
Excusâ feritate iubas in vellera vertit ,
Multaque mutato regnat in ore venus,
Multa venus? veneris ſpurcû quid profero nomē ?
Plurima in ore nitet gratia , nulla venus.
Fronte decor, ſedet ore fides, in pectore candor.
Gallica ſtat vultu gratia, lingua labris.
Vt reducem vidi , meus eſt ô qualis alumnus ,
Sit Gallus , dixi , nescio , ſitne meus.
Hiccine ſylueſtri de robore natus , & altus ;
Qui mihi mortali pulchrior ore redit ?
Non mihi ſit natus , niſi qui tibi mollibus annis
In ſimiles artes erudiendus eat.
Tempore mandit equus lentas animoſus ha-
benas,
Grande ſuo tangit tempore culmen opus.
Non metit inculta fruges tellure colonus ,
Vt reddat ſegetes , antè ſerendus ager.
Aſpera iungentur lætis , atque humida ſiccis,
Alba nigris , duris mollia , blanda feris.

Se fugit hæc regio, vestrúmque recurrit in æuum,
Nec, quamuis iam sim barbara, semper ero.

NOVA FRANCIA PATRIBVS SOCIET. IESV.

ELEGIA SEPTIMA.

O Ignatiadæ, virtus quibus æmula cælo,
Gens cuius studiis inuia nulla plaga est:
Huc properate, quibus Deus est sola anchora,
merces

Danda fides, navis gratia, ventus amor.
Eia agite, & fortes faciendis vincite facta,
Turpe ratem medio deferuisse lacu.
Vnica vos pietas nostros dat adire penates,
Exiliúmque vagos quærere, & exitium.
Longa via est? at causa viæ facit ipsa leuamen,
Infidóque mari cogit habere fidem.
Longa via est? superâ gressus numerantur ab aræ,
Fit grauis ex sese sudor, amore leuis.
Ille triumphatis sol est Xauerus Indis,
Nullúmne occiduis ambiet esse iubar?
Sit licet in nostris nouitas, & gloria rebus,
Non tamen vt videas, aut videre, venis.
Officio exilium, cedit discrimen amorì,
Et toto non sunt orsa minora Deo.

Diui.

Diuinis ignita flagrant si pectora flammis,
Inuenies flammis, ut medeare, niues.
Frondosus diuinus amor latitare tenebris
Fertur, & vmbrosis vsque latere plagis.
Hæc habitat, gressusque tuos per inhospita ducet,
Crura dabit stabili firma locare gradu:
Obice si spina tibi fallit tibia gressum,
Diuino labens excipere sinu.
Siue cadas, felix casus te tollet in altum,
Puluinar capiti dextra Tonantis erit.
Esset & optandus tali cum scœnore lapsus,
Sæpius ut diua sustinere manu.
Plus satis, imo plus nimis est ad mille labores,
Numinis exceptum vel semel esse sinu.
Nec vigilis timeas insomnia tædia lecti,
Talia pro Christo tædia, somnus erunt.
Æger es? at morbus domino subseruit amor:
Quisquis amat, sanus, si modò sanus amor.
Inter opus, tenerum spera succrescere robur.
Prodigus audendi vix malus auctor amor.
Cætera nec cures, amor est satis, affer amorem,
Ille vel irato in armore portus erit.
Nullus odor thuri, nisi sole vel igne lique scat,
Suauius ut spirent balsama, secta iuuat.
Es rudis in lingua? subeunt pia munia linguæ
Vocales oculi, dextra, caputque loquax.
Nec pudet ore viros infanti verba secare,
Nec satis expertos dimidiare sonos.
Si quis verba tibi, si cui tu verba reponas,
Abnueris velox, annuerisve rogat.
Huc vos, non parvæ quibus ætas paruula curæ:
Ut maiorem ætas parua requirit opem,
In quibus vna fugit Pallas connubia Pluti

Pura quibus semper virgo Minerua manet,
 Si tamen inter vos nullo licet ære mereri,
 Dant vbi discipulos pisa fabæque tuos.
 Aures discipulus vendit, non verba magister:
 Nunquam, aut hîc, venter flaccidus aure caret.
 Quippe cibus auidi, solis his lusibus instant,
 Sunt vnæ pueris, nûxque trochûsque, dapes.
 Quæso dapes, & quæso dapes, gemit ingemit in-
 Vnum hoc ferò vale, mane precatur aue. [fans ;
 Et semel aspectas æternus adambulat escas,
 Téque humero blandùm subfiliente rogat.
 Deseruiffe fabas pueris Canadensibus vnum est;
 Et Gallis pueris deseruiffe nuces,
 Quærite Diogenem, rabies si tanta fabarum est,
 Is doctor vobis vnicus esse potest.
 Firmior annofo pueris est robore ceruix,
 Vix secet æratis ferrea lingua sonis.
 Tôtque modis toties trusum vix alpha reponit,
 Prima redundanti vix nota fauce sonat.
 Dic vbi Bistonius, moueat qui robora, vates?
 Qui trahat auritum Thrax citharista nemus?
 Perge age, rûpe moras, dum rebus idonea lux est.
 Rerum, cùm rapido tempore, tempus abit.
 Quique teris tempus, tecum terit omnia tempus,
 Saturnus natos deuorat ipse suos.
 Rumpe moras, te clara vocat laus stirpis auitæ,
 Si patriæ laudis degener esse fugis.
 Inuitant tardam flauentia gramina falcem,
 Spes ingens cœpit fructibus esse minor.
 Nemo potest nostræ haud expertus gaudia vitæ,
 Et licet expertus dicere nemo potest.
 Mille voluptates supereminet vna voluptas
 Vel semel æthereis incubuisse thoris,

Rumpe moras : es rebus inops ? te pascet egestas;
Hic nihil insipidum est , dum sapit ipsa fames :
Pésanda est hominum meritis, non tempore vita :
Quæ bona, longa satis; quæ mala, longa nimis.
Rumpe moras , celeres calcaribus incitat annos ,
Currentésque ferit cursor anhelus equos.
Fata seni sensim obrepunt , iuuenique senectus.
Hora fuit, tum cùm quæritur, hora quota est?
Rumpe moras , primisque nouum superadde
triumphum,
Nec laudem hanc titulis inficiare tuis.
De vita elapsum , de vita tolle futurum ,
Quantillum ex reliquo tempore tempus erit?
Rumpe moras, vires peragrandis cursibus addent
Mens eques, & stimulus gratia, corpus equus.
Lingula virtutis , non clepsydra temporis annos
Censet, vísne diu viuere ? viue Deo.
Rumpe moras, insana labat substructio molis,
Déque fide certa sit tibi certa fides.





NOVA GALLIA DELPHINO.

N tibi ab utroque sole palmæ sese tibi offerunt, DELPHINE, pollicetur ex oraculis suas Idume, suas ex officio Noua Gallia, ut intertextis utriusque ramis surgat tibi gemini orbis corona.

Venio ad te puerum antequam adolescas, quia politioris sermonis ignaram minùs pudebit coram infante loqui.

Æquoris vastitatem veniendo emensa sum, ut quantus esses, ex regno tuo colligerem; audeo dicere, maius est tibi natale imperium, quàm futurum est patrimonium, etsi ex patris victoriis nihil sit, quod non speres.

Antea fragili cortice fluuij-littus legebamus, Oceanum veriti; hætenus agris otium permisimus, serendi imperiti; Nato Delphino fidem dedit & securitatem Oceanus, exemplum fertilitatis duxerunt agri, tuæ maximè laudis feraces.

Quo tempore natus es, sol vndecimam dici horam in antiqua Gallia attigerat, in Nouâ eodem momento tecum nascebatur, nec vsquam aliàs

hîc meliori iure Gallus oriente sole cantauit.

Eo die sol cæli potuisset nobis non nasci, neque nox tamen solito longius perdurasset.

Sol horâ vndecimâ flagrat ardentius, in primo ridet benignius crepusculo; si solis radios sequuntur oculorum tuorum sydera, ardentiori visus es antiquam Galliam, benigniori lumine No-uam salutasse.

Nata sunt cum **L V D O V I C O** duo noua sydera, vt eius ortum pluribus oculis cælum aspiceret. Nunquam clariùs intuitus est polus, quàm nascentem Delphinum: sol enim ad meridiem sine nubibus properabat.

Nascente **L V D O V I C O** duo sydera cælum aperuit, nascente **D E L P H I N O** syderum principem in medio explicuit: nascente Patre geminauit noctis oculos, nascente filio solis mundi radios duplicauit.

Natus es exeunte æstate, quo tempore noua Gallia primùm inuenta est, vt idem mensis esset tibi natalis, & meæ felicitati.

Natus es ineunte Septembri, cum classis Gallica nouâ Galliâ de more solueret, vt tuo in regno primi omnium tibi seruiremus: visi sunt Tritones Delphinésque naui adnatantes, qui nostram tui salutandi felicitatem inuiderent.

Natus es eo anno, quo educandis pueris Canadensibus seminarium extructum est; vt coætanei liberalitatem tuam experiantur.

Natus es ea tempestate, qua vindemia & menses colliguntur, vt meæ sterilitatis te misereat.

Non in vrbe nasceris, quia nulli potestati tuæ muri, nulla mœnia; sed ruri, vt desertas regio-

nes non despicias; sed prope syluam, vt syluæ incolas agnoscas; sed quâ labitur Sequana, vt suum aqua principem non longè desideraret.

Debuit nasci DELPHINVS, cùm RICHELIVS teneret anchoram.

Tu belli pacisque interpres accedis, quidquid de utroque statueris, tota tibi sylua vel laurus, vel oliua futura est, si dubium fuit an rectores terris singulari cæli beneficio, an casu nascerentur, fecisti vt constaret.

Solerat in virgine dum nascebaris, quia ope Virginis nascebaris, cui dicata est antiqua Gallia, vt Noua Iosepho, soror vtraque Francia vtrique coniugi.

Expectabat nostra hæc tanta calamitas aliquem, qui sub virgine signo natus benignitatem humanâ superiorem exhiberet: sed commodè si me sylua malorum vndeque cingit, Delphini liberalitas nunquâ nisi cum Oceano exaresceret.

Luna maris dominatrix erat in geminis, vt gemini mundi commercium faceres: quod à nullo fieri potuit commodius quàm ab eo, qui intermedium mare tenet.

Inter miracula nasceris, quia perpetuum vita futura est miraculum.

Te viginti annis parentes genuere; quia solito diutius in te desudauit natura, opus non vulgare paritura; nec vnquam tamen properauit magis, viginti enim annis præstitit, quod integri sæculi iustum opus erat.

Tardè nasceris, sed quò longius fuisti desiderium nasciturus, iam natus cò maior es amor populorum.

Magna est regum Galliae in caelo potestas, unde lilia duxerunt, curandorum morborum virtutem acceperunt, victorias reportant, liberos obtinent.

Timuerant Galli in ANNA sterilitatem, sed feliciter ille timor traductus est ad hostes, qui suum nasci victorem cernunt; Gallumque, qui terreat leonem.

Age igitur paternis te exemplis applica, dum tuis nos obsequiis mancipamus.

Pater haereticis hydram elisit, tu crudelitatis & idololatriae portenta edomabis, sed quod ille expugnatis ciuitatibus, tu hic aedificatis praestabis.

Nec illa timeas idololatriae portenta: monstra quidem terrent pueros, sed non in cunis Herculem.

Omnia fortitudini dicuntur vel benignitati cedere, HENRICVS sua fortitudine, DELPHINVS sua benignitate praestabit, quod meretur intermedij LVDOVICI iustitia.

Pater inter principes Christianos Christianissimus effecit, ut multi non essent haeretici, ut haeretici rebelles esse non possint, tuum est ex brutis viros, ex viris Christianos efficere.

Debuit sub DELPHINI auspiciis mare traicere D. Petri tatis, quae littus nostrum nondum attigit; huic aspiret tui benignior aura studij, Borbonica faueant sydera, iuuet RICHELII anchora.

Iustitiae filia dici solet benignitas, non potuit esse iusto filius alter, quam benignus, hinc librae vicina est virgo.

Respice è cunis tuis ad solis cubile, hîc tui nominis splendor & claritas æternum stabit, vbi solis lux quotidie occidit.

Niveus ille pueritiæ candor meas respiciat nives, quæ totâ latè terrâ superfusæ alterum tibi in terrâ regnum firmiter stabiliunt, cum aquæ sint; liquefactæ tuum in mari imperium augent.

Nudi vivimus eâ veste, quâ puer nascitur; tu Porphyrogenitus eos teges & proteges, qui nuditatem non nisi nemoris nocte operiunt.

Nasceris Adeodatus, vt mihi Deum des, quem nenomine quidem cognoui.

Respice syluam, quæ tota in nauium fabricam cedere ambit, vt debita Delphino classis in Oceano decurrat.

Mitte ferrum & gladium, qui amica cæde hoc nemo amputet, & excindendarum urbium rudimenta faciat.

Gallia, nascente Delphino, nauali prælio triumphauit, iam incipiebat Delphinus vltra Oceanum victorias protendere.

Hîc tibi (quod nullibi reperias) dulcescit mare, quia pueris placent dulcia; lacus noster fluuij nomen habet à dulcedine, illius vastitas æquoris nomen meretur.

Denique regionem respice, cui nomen datum est Galliæ, dum pater populos deuincit omnes, quibus est lingua Gallica.

LVDOVICVS aliis quidem hætenus Iustus semper fuit, sed nunc est ipse sibi iustissimus, quia suis meritis dignum sibi præmium in DELPHINO rependit.

Crescere te vno ad felicitatis culmen poterat pater, hic vnus supererat gradus; hoc vno patre ad summam beatitudinem nasci poteras, hæc vna erat felicitatis via.

Iusti nomen habebis ex hæreditate, Benigni ex natali sydere, ex omnium votis, Magni, Victoris, Triumphantis.

Verum quidquid fortiter, quidquid iustè feceris, nihil nisi nepotem HENRICI, LVDOVICI filium præstiteris, quorum legata exsolues, vel opera miraberis.

Fallor, ne lacrymeris, paruule Alexander, ad patris victorias, en se tibi aperit nouus orbis sub alio sole, victoriarum campus immensus.

Terras omnes ambit Oceanus, tuo regno minus esse non debes; sed paribus cum tuo mari brachiis orbem circumplecti.

Quem si totum pater non deuicit, ideo fuit, quia limites posuit potestati suæ, tibi que gloriæ campum segetemque reservauit.

Fui hæcenus semper misera, sed tum miserrima, cum non eram tua: hanc gratiam si dissimulem, non merear; si non sentio, sum meis ipsa quercubus durior.

Iuuabit igitur cognominem sororem Gallia; nec prius mei sortisque meæ, quam sui nominis obliuiscetur.

Si patris exemplo venatione delectaris, en se tibi aperit mille leucarum sylua, brutis animalibus tibi depopulanda: si nostram leuare calamitatem tibi ludus erit.

Interea viue, vt viuam, & diu, vt æternum.

F I N I S.



INDEX.



INDEX.

ECCLESIASTES.

E PISTOLA nuncupatoria.	pag. 2
Caput primum.	p. 7
Caput secundum.	p. 19
Caput tertium.	p. 29
Caput quartum.	p. 41
Caput quintum.	p. 49
Caput sextum.	p. 55
Caput septimum.	p. 61
Caput octauum.	p. 77
Caput nonum.	p. 87
Caput decimum.	p. 95
Caput vltimum.	p. 109

DAVID POENITE NS,

sive septem Psalmi qui vocantur Pœnitentiales.

PSALMVS sextus Psalterij. Davidis pœnitentis primus. Dominene in furore tuo arguas me.
p. 127

Psalmus trigesimus primus. septem Psalmorum secundus. Beati quorum remissæ sunt iniquitates.
p. 129

I N D E X.

Psalmus trigesimus septimus, septem Psalmorum tertius. Domine ne in furore tuo arguas me, neque in ira tua corripas me. p. 131

Psalmus quinquagesimus, septem Psalmorum quartus. Miserere mei Deus secundum magnam misericordiam tuam. p. 137

Psalmus centesimus primus, septem Psalmorum quintus. Domine exaudi orationem meam, & clamor meus ad te veniat. p. 137

Psalmus vigesimus nonus, septem Psalmorum sextus. De profundis clamaui. p. 198

Psalmus centesimus quadragessimus secundus, septem Psalmorum ultimus. Domine exaudi orationem meam, auribus percipe obsecrationem. p. 139

H E X A E M E R O N

sive Moyses de opere sex dierum.

<i>Dies primus.</i>	p. 145
<i>Dies secundus.</i>	p. 147
<i>Dies tertius.</i>	p. 149
<i>Dies quartus.</i>	p. 155
<i>Dies quintus.</i>	p. 158
<i>Dies sextus.</i>	p. 162

I E R E M I A S L V G E N S.

THRENI sive lamentationes Ieremiae Prophetæ. p. 174

INDEX.

VESPERÆ MARIANÆ.

<i>PSALMVS centesimus nonus. Dixit Dominus Domino meo.</i>	p. 179
<i>Psalmus centesimus decimus secundus. Laudate pueri Dominum.</i>	p. 180
<i>Psalmus centesimus vigesimus primus. Lætatus sum in his quæ dicta sunt mihi.</i>	p. 181
<i>Psalmus vigesimus sextus. Nisi Dominus ædificauerit.</i>	p. 182
<i>Psalmus centesimus quadragesimus septimus. Lauda Ierusalem Dominum.</i>	ibid.
<i>Canticum Beata Maria Virginis. Magnificat anima mea Dominum.</i>	p. 183

MVSÆ TURONENSES

<i>In morte Illust. & Reuerendiss. D. D. Bernardi Déchaus, Archiepiscopi Turonensis mœrentes, & afflictæ : in aduentu Illust. & Reuerendiss. D. D. Victoris Bouthillier Archiepiscopi Turonensis recreatæ.</i>	p. 185
<i>Epitaphium Bernardi Déchaus.</i>	p. 186
<i>Musa mœrentes in morte D. D. Bert. Déchaus.</i>	187.
<i>Musa recreata in aduentu D. D. Victoris Bouthillier successoris.</i>	p. 191

SELECTA EPIGRAMMATA.

INDEX.

FRANCIADOS LIBRI DVO.

LIBER PRIMVS. *Incommoda & calamitates Noua Francia explicat.*

ELEGIA I. *Bella & crudelitas in captiuos.* p. 201

ELEGIA II. *Conuiuia & fames Canadensium.* p. 206

ELEGIA III. *Difficultas itinerum in syluis Canadensibus.* p. 209

ELEGIA IV. *Nix, & frigus Canadens.* p. 211

ELEGIA V. *Domus, & umbra sylvarum Canadensium.* p. 214

ELEGIA VI. *Incommoda, & commoda Canadensium.* p. 216

ELEGIA VII. *Religio, mores, & vita Canadensium.* p. 221

FRANCIADOS LIBER SECVNDVS

Auxilium postulat.

ELEGIA I. *Ludouico suo Regi Noua Gallia.* p. 225

ELEGIA II. *Anna Austriaca Regina Christianissima Noua Francia.* p. 228

ELEGIA III. *Noua Francia ad antiquam Delphinum legat.* p. 229

ELEGIA IV. *Noua Gallia Delphinum salutat.* p. 232

ELEGIA V. *Eminentissimo Cardinali Duci de Richelieu.* p. 235

ELEGIA VI. *Gallis.* p. 237

ELEGIA VII. *Noua Francia Patribus Societatis Iesu.* p. 240

S V M M A P R I V I L E G I I
Regis Christianissimi.

CAUTVM est auctoritate Regis, ne quis in regno eius, aliisve locis eius ditioni subiectis, librum qui sic inscribitur, **LAVRENTII LE BRVN** Nannetensis è Societate **IESV**, Ecclesiastes Salomonis Paraphrasi poëtica explicatus, &c. quovis charactere, aut forma excudere, aut alibi excusum vendere, aliòve quolibet modo distrahere possit intra duodecim annos computandos à die absoluta huius editionis, prater Sebastianum Cramoisy, Regis & Regina Architypographum, Regia Typographia Gubernatorem, necnon Urbis Exconsulem. Qui secus fecerit, multa est indicta, prout fusius in diplomate regio continetur. Datum Parisiis die 9. Februarij 1653. Sic signatum, De mandato Regis, **CRAMOISY**.

Hæc quarta editio absoluta fuit die 12.
Aprilis 1653.

Facultas R. P. Prouincialis
Societatis **IESV**.

EGO FRANCISCVS ANNAT Vice-Prouincialis Societatis **IESV** in Prouincia Francia, iuxta priuilegium eidem Societati à Regibus Christianissimis Henrico III.

10. Maij 1583. Henrico 1V. 20. Decembris
1606. & Ludouico XIII. 14. Februarij 1611.
concessum, quo Bibliopolis omnibus prohibetur,
ne libros ab hominibus Societatis nostra com-
positos, absque Superiorum eius permissu im-
primant: permitto Sebastiano Cramoisy, Re-
gis ac Regina Architypographo, Regia Typogra-
phia Gubernatori, necnon Urbis Exconsuli,
Poësim P. LAURENTII LE BRVN è So-
cietate IESV, virorum doctorum eiusdem Or-
dinis iudicio approbatam imprimere, ac liberè
diuendere possit. Datum Parisijs mense Aprilis
1653.

FRANCISCVS ANNAT.

11







